

KIDIMBU YA SAMBWADI



Matondo na nge, mpangi-bakala. Na yina beto ke bikana ya kutelama, beto sambila.

² Nzambi ya Ngolo nyonso, Yinto ya Luzingu, mpe Mupesi ya makabu nyonso ya mbote, ya kimpeve, beto ke vutula matondo mingi ntangu yayi samu na ntangu yayi ya kulutula mbote, ya kulutula nene, ya kubundana na Mvwandulu ya Nge; ya kele kidimbu ya nene ya baluzingu ya beto, Mfumu, ntangu yina beto ke zimbana ata fioti ve, ata ti ntangu yina me bikana. Mpe beto ke sambila, Nzambi, ti na nkokila yayi ya nsuka . . . Beto ke mona Masonuku, na kilumbu ya nsuka ya feti, Yesu telamaka na kati-kati ya bawu mpe bokaka, “Kana muntu kele na nsatu ya maza, bika ti yandi kwiza na Munu!” Mpe mu ke sambila, Tata ya Mazulu, ti yina ke salama diaka na nkokila yayi, ti beto lenda kuwa Ndinga ya Mfumu ya beto kubokila beto, mpe ke bokila beto na kisalu samu na Yandi, kutambula pene-pene na Yandi. Beto ke kuwa ti beto me kuwa Ndinga ya Yandi dezia, na kuzibuka ya Bidimbu yayi, na kuzonzaka ti ya kele kilumbu ya nsuka, mpe ntangu me kuma pene-pene. Pesa balusakumunu yayi yina beto me lomba, Tata, na Nkumbu ya Yesu Klisto, mpe samu na nkembo ya Yandi. Amen.

Beno lenda vwanda.

³ Mu ke zola kubwela yayi, ti, balukutakanu nyonso yina mu me kuzwaka ntete na luzingu ya munu, mu ke kwikila ti sabala yayi me vwanda ntangu ya kulutula nkembo ya luzingu ya munu nyonso na balukutakanu. Ata nyonso yina mu me . . . Mu me monaka bimangu ya nene kusalama, ya kieleka, na ntwala, mpe balukutakanu ya kubeluka ya nzutu, kasi yayi kele na zulu ya yawu. Ya me vwanda mosi ya bantangu ya nene, ya mambu ya ngudi ya luzingu ya munu, ya kele awa. Mpe na kumonaka mwa tabernacle kuzwa kumonana yayi ya kuswaswana; yina kaka ve, kasi kati kuzwa kumonana ya kuswaswana!

⁴ Mpe, ntangu yayi, mu vwandaka yufula Billy; yandi bakaka ntangu ya yinda, samu na kukwisa mpe kubaka munu. Yandi tubaka ya vwandaka na nkonga yankaka yina kuzwaka mbotika. Na yina, ya ke luta na zulu ya nkama mosi, na sabala yayi, bantu yina ke na kubotama na Nkumbu ya Mfumu ya beto Yesu Klisto. Na yawu, beto ke—ke vutula matondo. Mpe Nzambi sakumuna beno!

⁵ Mpe, ntangu yayi, kana beno kele ve na yinzo-Nzambi ya beno, beto ke bokila beno awa, na kukwisa mpe kubundana na beto. Beno bambuka kaka moyo ti dibuundu kele ya kuzibuka samu na muntu nyonso. Beto kele ata dénomination mosi ve, mpe mu banza mpe mu ke na kivuvu ti ya ke vwanda ata mbala

mosi ve dénomination. Kaka kubundana kisika babakala mpe bakento, mpe bana ya babakala mpe bana ya bakento, ke vukana pene-pene ya mesa ya Nzambi, mpe beto ke bundana pene-pene ya Ndinga, mpe beto kele na bima nionso na kimvuka.

⁶ Ntangu yayi, mpe beto kele na pasteur ya mbote, muntu ya kieleka ya Nzambi, mpe mu ke vutula matondo mingi samu na yawu. Kana beno ke bambuka moyo, na vision mosi, na mvula mosi me luta, Madia yina vwandaka ya kubumba na kisika ya yawu. Mpe ya kele kaka kieleka. Mpe beto kele . . .

⁷ Beto me kuzwa kisika ntangu yayi, ya kukubama, samu na bakalasi ya lukolo ya Lumingu, samu na bamvula nionso, mpe beto ke vutula matondo mingi samu na bweso yayi. Bayankaka tubaka, ntangu yankaka, kana ba lendaka kaka kuzwa bakalasi ya lukolo ya Lumingu kisika ba lendaka fidisa bana ya bawu. Ntangu yayi, beno, bawu me kuzwa yawu ntangu yayi. Na yawu, ntangu yayi, na yawu beno kwiza kaka mpe beno vwanda na beto kana beno kele ve na yinzo-Nzambi ya beno.

⁸ Na yina, kana beno kele na dibuundu ya mbote kisika beno ke kwendaka, mpe ke longaka Nsangu ya mbote, mpe nionso yina, mbote, yina kele—yina kele kaka kimvuka yankaka ya beto, beno me mona, kisika yankaka. Kasi kana beno kele ve na yinzo-Nzambi ya beno, mpe beno kele . . .

⁹ Mu me bakula ti mingi, me katuka bisika yankaka ya yinsi, samu na kusala yayi yinzo-Nzambi ya bawu. Mpe ya kieleka beto ke yamba beno awa na Ndinga ya Mfumu. Mpe mu ke bambuka moyo, mu banza, ntangu mu kwendaka, mu tubaka na beno ti—ti balukutakanu, na mutindu mu me zaba, ke vwanda awa na tabernacle.

¹⁰ Mu zaba ntete ve yina nyonso Mfumu me bumba samu na munu na bilumbu ke na kwiza na ntwala. Mu ke vutula yawu na maboko ya Yandi, ve ti ya vwanda mabanza to kima mosi. Mu ke vingila kaka, kilumbu na manima ya kilumbu, samu na Yandi na kutwadisa munu na kisika yina mu lendaka vwanda na lukutakanu ya kulutula mbote samu na Yandi. Mpe ntangu Yandi me manisa na munu, kuna mu ke na kivuvu ti Yandi ke yamba munu na Yinzo, na ngemba.

¹¹ Mpe, ntangu yayi, mu ke vutula matondo mingi samu na lusalusu ya bantu ya tabernacle. Mutindu Billy vwandaka tuba na munu sabala yayi, ti, mu banza, konso yinzo yina kele awa na nziunga ya tabernacle yayi me kuyamba muntu mosi na kati ya bawu. Ba zibulaka, bayinzo ya bawu mpe bisika, mpe bawu me yamba bantu yina vwandaka ve na kisika ya kukwenda. Ntangu yayi, ya kele mutindu yina Muklisto ya kieleka ke salaka. Mpe bayinzo yankaka me tula bantu bisika nyonso ba lendaka na bansongi ya yinzo, samu na kuzwa kisika ya kutula bantu yayi.

¹² Samu ti, yayi vwandaka ntangu mosi ya mpasi mingi, samu na diambu yina, mwa dyambu yina ke na kusalamaka, na lweka

ya yinza ya sport, mwa basketball to kima mosi, mpe—mpe ba kubamaka samu na yawu. Mpe kimvuka ya nene na . . .

¹³ Mu banza, ya me monisama awa na kati ya mwa dibuundu yayi, na kutala, pene ya makumi zole na nana to makumi tatu ya états-unis me monisama kaka awa na kati ya dibuundu, na ngaanda ya bayinsi zole ya nzenza, na yawu, mpe mwa reveal yayi. Na yawu, yina ke baka mwa kivinga ya fyoti, yawu mosi. Kuzaba ya . . .

¹⁴ Mu vwandaka lomba bubu yayi, na bantu yankaka. Mu tubaka, “Mu bakulaka ti ya vwandaka ve na bantu mingi ya Jeffersonville kuna, na lukutakanu.”

¹⁵ Muntu mosi zonzaka, yandi tubaka, “Beto lenda kota ve.” Mbote, yina, ya vwandaka yawu. Ya vwandaka samu na yina. Ndambu ya bapulusu, mpe nyonso yankaka yina, vwandaka zola kukwiza na lukutakanu, kasi bawu tubaka, bawu vwandaka kuna, bawu tubaka, kasi bawu kwisaka mpe bawu lendaka ve kukota, ti ya vwandaka yimeni ya kufuluka na ntwala ya ntangu ti ba lendaka kota. Na yawu bawu kuzwaka ntangu ya bawu, mu banza, bilumbu na ntwala, mpe bawu kwizaka ve. Na yawu ntangu yayi bantu ke na kwiza na bisika yankaka, na yawu beto me vutula matondo mingi.

¹⁶ Ntangu yayi, mu zaba ve. Kima yina ke landa ke landa yayi, ke vwanda Bampungu Sambwadi, na nsangu yankaka. Kasi, na kati ya Bidimbu, na kutala nionso kele na kati. Bansungi ya dibuundu ke landana, mpe beto me tula yawu ntete, yina vwandaka ya kulutila—yina vwandaka mfunu mingi, kasi . . . ya ntangu yina. Ntangu yayi, kuzibuka ya Bidimbu ke lakisa kisika Dibuundu ke kwenda, mpe mutindu Yawu ke suka. Mpe ntangu yayi, mu banza, Tata ya Mazulu me vwanda kieleka na lemvo samu na beto, samu na kubika beto kumona yina beto kele na yawu.

¹⁷ Mpe mu ke tuba yayi, na kutalaka banoti ya ntama yina mu me longaka, bamvula mingi me luta, mu vwandaka kwisa kaka mpe vwandaka tuba yina mu banzaka vwandaka mbote, mpe vwandaka landila kaka mutindu yayi. Ya vwandaka ntama na nzila. Mpe ntangu yayi, Bidimbu nyonso yiya ya yawu, mu kuzwaka yawu pene ya dilongi ya baminuti makumi zole, nyonso ya yawu. Minati-mpunda yiya, ya Apocalypse, mu losaka yawu nyonso kintwadi mpe tubaka, “Mpunda mosi basikaka na mpembe,” mu tubaka, “mu banza ya lendaka vwanda ti ya kele nsungi ya ntete. Mpe mpunda yina vwandaka landa vwandaka na nzala,” mpe na yina mu landilaka mutindu yina. Kasi, oh, ntangu kieleka Ndinga kuzibukaka, Yawu vwandaka bakilometele nkama ntama na yawu.

¹⁸ Na yawu, ya ke tuma beto na kutala mbote mpe kuingila. Mpe mu banza ti ya zolaka vwanda na ntangu yayi samu na kusala yawu. Ya lendaka vwanda na bima mingi yina ba tubaka,

yina lendaka wisana ve na bantu yankaka. Kasi mu ke kwikila, ntangu mupepe ya nene ke kwisa, mpe beto ke kutana na Mfumu ya beto, beno ke mona ti Yawu vwandaka ya kusungama. Yinga, tata. Ya—Ya—Ya kieleka.

¹⁹ Ntangu yayi, bantu yina kele na ngaanda ya mbanza, yina kele na nziunga na bisika ya mutindu na mutindu, ke katukaka na bizunga ya kuswaswana mpe bayinsi, wapi mutindu mu ke sepelaka na bukieleka ya beno na kukatukaka bisika nyonso ya ntama, mpe kubaka bakonze ya beno. Mpe bayankaka na kati ya bawu ke kondwa mpe bisika ya kuvwanda! Mu—mu zaba yawu, samu ti mu vwandaka na kiyeka ya kusadisa bayankaka na kati ya bawu samu na kuzwa kisika ya kuvwanda. Ba kondwaka mpe mbongo ya kudya, to kima yankaka, mpe na yina . . . mpe ba ke kwisa kaka, na mutindu nionso, na kuingilaka kima mosi kusalama, samu na kukeba yawu. Mpe na lukwikilu ya nene yina na kati ya yawu, ata ti kana ba fwana kwenda kukondwa kudya, to mpe kukondwa kisika ya kuvwanda, bawu zola kukwiza kuwa bima yango, bima yango kusalama, na mutindu nyonso. Ya kele kieleka ya kikesa, beno zaba. Mpe bantu yonso vwandaka kieleka nkama mosi na zulu ya nkama mosi!

²⁰ Mu kutanaka na semeki ya munu ya bakala kuna na manima, yina vwandaka . . . vwandaka mutungi ya yinzo-Nzambi, mpe nionso yina. Mpe mu vwandaka tuba na yandi wapi mutindu mu me sepela na kisalu ya yandi. Mu kele ve mutungi, to mu zaba kima mosi ve na zulu ya yawu. Kasi mu zaba yina kele nsongi yina ya angele ya kusungama, mpe ya ke monanaka ya kuyidika mbote samu na munu.

²¹ Mpe yandi tubaka, “Mu ke tuba na nge.” Yandi tubaka, “Ya me vwandaka ata fioti ve na ntangu ya mutindu yina, na mpasi, ti nge me monaka ntete ngwisani ya mutindu yina na kati ya babakala, ntangu bawu nyonso ke sala kintwadi.”

²² Mpangi Wood, Mpangi Roberson, mpe muntu nyonso vwandaka kaka na kisika ya bawu, nyonso. Mpe mpangi-bakala yina—yina yidikaka muningu, . . . Mu zola tuba diambu yina me tadila muningu mpe nyonso, na kati ya yinzo-Nzambi. Bawu tubaka, “Bima nionso vwandaka tambula mbote.” Ntangu ba vwandaka na nsatu ya kima mosi, ya lendaka vwanda na muntu yina me telama kuna samu na kusala yawu. Na yawu ya kele . . . Nzambi kele na kati ya manaka nyonso. Beto ke vutula matondo mingi samu na yayi.

²³ Mipesi-makabu mingi ya nene ya dibuundu yayi, yina me sadisa na kusala yawu, mutindu Mpangi ya beto Dauch mpe Mpangi-kento Dauch yina kele ya kuvwanda awa, mpe mingi yankaka yina me pesa me pesa na ntima ya mwasi samu na dyambu yayi. Mpe mu banza, kaka na ntangu yayi, ba ke kondwa ata fyoti ve mpe ba me futa yawu nyonso. Na yawu beto ke vutula matondo mingi samu na yawu.

²⁴ Beno bambuka moyo, ya kele dibuundu ya beno, samu ti beno kele kisadi ya Klisto. Mpe ya kele samu na yina ba me tunga yawu awa, kyelo ya kuzibuka samu na kusala bisadi, mpe samu na bisadi yina kele yimeni bisadi ya Klisto, samu na kukota mpe kusepela bawu mosi pene-pene ya kubundana ya Yesu Klisto. Mpe beto zola ti beno zaba ti muntu nyonso kele na kukwisa ya mbote na kati ya beto.

²⁵ Mpe ntangu yayi ntangu beno ke kuwa munu bantangu yankaka, na yisi ya ntangu ya kupakulama, kusemba ba-organisation, mu—mu zola ve kutuba yawu samu na kutelemina pasteur ya beno, to na kutelemina mpangi mosi ya bakala, mpangi ya kento, na kati ya dibuundu. Samu ti, na manima ya nyonso, Nzambi kele na bantu na kati ya konso organisation. Kasi Yandi ke ndima organisation ve; Yandi ke ndimaka muntu mosi na kati ya organisation. Mpe. . . Ya ke bakaka organisation ve.

²⁶ Na yawu, ntangu bantu ke kangama mingi na organisation, na yina bawu lenda mona kima yankaka ve kasi kaka yina dibuundu yina ke tuba, beno me mona. Mpe yina ke salaka kubundana na bayankaka, mpe ya kele sysiteme yina Nzambi me sepela na yawu ve, mpe ya kele diambu ya yinza yina me tumama ve na Nzambi.

²⁷ Na yawu, ntangu yayi, mu zola tuba ve samu na muntu mosi. Ya vwanda Bakatolika, ba-Juif, nyonso yina ya lendaka vwanda, to—to ba-Methodiste, ba-Baptiste, ba-Presbytérien, organisation nyonso, ata ba-organisation ve, mpe—mpe ba-denomination yankaka nyonso, mpe nionso yina, Nzambi kele na bana ya Yandi kuna na kati. Beno me mona? Mpe bambala mingi mu ke kwikila ti bawu kele na ngaanda kuna samu na lukanu mosi, samu na kupesa Nsemo, ke basisa bayina ba soolaka na bisika yayi nyonso bisika nyonso. Mpe—mpe na kilumbu yango ya nene, beto ke mona kuna, Dibuundu ya Mfumu Yesu Klisto ba ke bokila Yawu na—na ntangu ya nene ya lukutakanu na mipepe, mpe beto nyonso ke mata samu na kukutana na Yandi. Mpe mu ke—mu ke vingila ngunga yina.

Ntangu yayi, ya ke na mingi lendaka tubama!

²⁸ Mpe na nkokila yayi, na nkokila ya nsuka, ya nsuka, mutindu ntangu nionso, muntu nionso kele. . . Na lukutakanu ya kubeluka ya nzutu, mu ke mona, na yisi ya kuingila bima ya nene kusalama na kati ya lukutakanu ya kubeluka ya nzutu, yina ke pesaka bawu tension, mpe kidi-kidi. Mpe na yina mu me mona, kima ya mutindu mosi na nkokila yayi, ti muntu nionso kele na nsi ya kuingila wapi mutindu. . . Mpe konso nkokila, ya vwandaka mutindu yina, samu na kuzibuka ya Bidimbu yina.

²⁹ Ntangu yayi mu zola kukumisa yayi kieleka pwelele. Konso ntangu, konso ntangu yina Bidimbu yayi ke kuma na kisika ya yawu; nyonso yina mu me kwikilaka na Yawu, mpe mu

me tangaka yina bantu yankaka tubaka, ya vwandaka ya kuswaswana na yina me kwiza na munu na kati ya kivinga.

³⁰ Mpe dibanza ya munu, na ntangu yayi. . . Ya kele samu na yina mu vwandaka na lukutakanu ya kubeluka ya nzutu na suka yayi, samu mabanza ya munu ya kimuntu ke na kukumaka ntama mingi na mutindu ya munu mosi ya kubanza. Mu me meka na kuvwanda na—na kati ya kivinga mpe mu vwandaka kulumusa ba-store, mpe mu vwandaka pelisa nsemo. Yayi kele kilumbu ya nana. Mpe mu bakaka ve na ditoma ya munu, samu na ku—kukwenda kisika yankaka.

³¹ Mu fwana kwenda na bampangi yankaka, kuna na banke, samu na kusinie mwa banoti mpe nyonso, samu na mbongo mpe bima yina beto defaka samu na dibuundu yayi. Kasi mu—kasi mu me vutuka mbala mosi, mpe me kwenda mbala mosi samu na kulonguka.

³² Mpe kima ya ngitukulu, ya vwandaka ve na muntu mosi yina tubaka kima mosi. To, na mumesanu, ba ke na kukonkota, mpe ke na kubenda, mpe bisika nionso. Ya vwandaka ve na kima mosi. Ya vwandaka diambu ya ngitukulu.

³³ Kisika mu vwanda kudya, na yinzo ya Mpangi Wood. Ntangu nyonso ya ke vwandaka na matoma. Mpe bawu vwandaka na bantu nana to kumi ya luswaswanu yina zolaka kwiza vwanda na bawu na ntangu yayi, mpe ata mosi ve na kati ya bawu kwizaka.

³⁴ Na yina, na suka yayi, mu ke zimbana ata fioti ve na suka yayi, lemvo ya Mvulusi ya beto na kisadi ya Yandi ya kulemba, ya kulemba mingi. Ntangu, mu pesaka mvutu na kiuvu ya muntu mosi ya mputu, mpe, ya kulutula mbote na mabanza ya munu, mu banzaka ti mu me sala mbote. Mpe, na mbala mosi, ya vwandaka mutindu ti mu me—mu me botola kima mosi na mwana, mu vwandaka ya kufundisa mingi, mpe mu zabaka ve yinki ya vwandaka. Mpe mu banzaka, mu banza ti mutindu mu vwandaka kima mbangu samu na kusala kisalu yayi ya kubeluka ya nzutu, ti ntangu yankaka muntu mosi vwandaka ya kubela mingi, ti ba zolaka sambila kaka samu na yandi na nswalu. Mpe mu yufulaka bantu. Na mwa ntangu fioti, yawu monisamaka pwelele. Mpe muntu mosi tubaka, “Nge zola tanga dyaka ve masonuku ya nge—ya nge?” to kima mosi. Mpe na ntangu yina, mu lokotaka mwa kitini ya papié mpe mu tangaka yawu diaka, mu monaka yina yawu tubaka. Mu talaka na kati ya Babuku, mpe ya vwandaka nyonso ya kuswaswana, kyuvu yina mu vwandaka pesa mvutu. Beno me mona?

³⁵ Bika mu tuba na beno yayi. Ntangu Kimpeve ke kota, yina kele dibanza ya Klisto. Beno me kuma ntama mingi na mabanza ya beno mosi, tii, na dibanza ya beno mosi, mu. . . Yayi, beno. . . Ve munu. . . Ti mu meka ve na kutendula yawu, samu ti mu lenda ve. Beno me mona? Mu lenda sala yawu ve. Ya kele ve na muntu yina lenda sala yawu.

³⁶ Wapi mutindu bakala yina, yina kele Elie, yina telemaka kuna na zulu ya mongo, na nsi ya Mvwandulu ya Nzambi, mpe ke kulumusa Tiya na mazulu, mpe na manima mvula na manima ya Tiya? Mpe na manima yandi me kanga mazulu, mpe ya nokaka ve bamvula tatu mpe bangonda sambanu, mpe ke vutuka kaka mpe ke bokila mvula, na kilumbu yina mosi! Mpe na yisi ya kupakulama yango, mutindu. . . Mpe bakaka bankama yiya ya banganga-Nzambi mpe kufwaka bawu; mpe na manima yandi kwendaka mbangu na ntoto ya kuyuma, yandi bokaka samu na luzingu ya yandi, samu na boma ya kento mosi. Beno me mona? Jézabel, yandi zengaka ndefi ti yandi ke baka luzingu ya yandi. Ntangu, Achab mpe bawu nyonso vwandaka kuna, samu na kumona Mvwandulu ya Nzambi mpe kimangu ya nene yina salamaka. Beno me mona, ya yandi. . . Mpeve bikaka yandi. Na mutindu ya yandi ya kimuntu ya kubanza, yandi zabaka ve yinki mutindu kubanza, beno me mona. Yandi lendaka ve kubanza samu na yandi mosi.

³⁷ Mpe, beno bambuka moyo, Wanzio tulaka yandi na mpongi, mpe pemisaka yandi. Yandi vumbulaka yandi, pesaka yandi mwa ba-gâteau; na manima vutulaka yandi na kulala, mpe yandi pemaka; mpe vumbulaka yandi, mpe pesaka yandi mwa ba-gâteau dyaka. Mpe beto zaba ve yinki salamaka na muntu yango, bilumbu makumi yiya. Na manima yandi kwendaka kuna na caverne, kisika mosi kuna, mpe Nzambi bokilaka yandi.

³⁸ Beno meka ve na kutendula yawu na Kimpeve. Beno lenda ve kusala yawu. Beno me mona? Kima kaka mosi ya kusala, kele kukwenda kaka na ntwala. Mpe mu ke meka na kukumisa munu mosi pwelele mutindu mu lenda, kasi kubanda ntangu yayi mu ke. . . Mu banza ti mu ke meka dyaka yawu ve. Beno ke kwikila kaka kieleka, to ve. Mpe mu kele. . . Beno ke mona, mwa fyoti na mantwala, samu na yinki.

Ntangu yayi, mu me meka na kuvwanda ya kusungama. Nzambi zaba yawu.

³⁹ Mpe kyuvu yina na suka yayi. Mu vwanda meka na kupesa mvutu na yawu kaka na mutindu ya kusungama mutindu mu zabaka. Mu tangaka kaka kitini ya ntete ya nzila, mpe ya vwandaka. . . ya zolaka vwanda mbote ve. Kasi Mpeve-Santu, ke bakula ti mu. . . dibanza ya munu. . . Beno me mona, beno tala, bilumbu zole to tatu me luta, yina ke na kusalama. Beno me mona, mu—mu bokilaka bankama sambwadi. . . “mafunda sambwadi,” bankama sambwadi. Na suka yayi, yandi vwandaka meka, mpe bantu me zonzila yawu, beno me mona, mpe yina vwandaka talisa ti beno vwandaka landila. Ntangu yayi, yankaka, kisika mu vwandaka meka na kutuba “yembe,” mpe mu bokilaka yawu mwana-dimeme; kasi mu bakulaka yawu na nswalu nionso. Mpe na yina, awa, mosi yina mu monaka ve, Mpeve-Santu balukaka mpe bokilaka munu na yawu.

40 Ya kele kusiamisa ya mbala zole ti bima yayi kele kieleka. Ya kele. . . Nzambi ke na kutalaka na zulu, samu na kumona ti Yawu kele kieleka. Ya kele kieleka. Yandi zola. Yandi zola beno kuzaba ti Yawu kele Kieleka.

41 Yandi kele Yandi yina fidisaka Yawu, samu ti ya kieleka ya vwandaka ve. . . Ya vwandaka kaka ya kulutila na munu, me longuka mingi, na zulu ya yawu, kulutila beno. Mpe na yina beto kele. . . Mu ke vutula matondo mingi samu na luzabu, na kuzaba ntangu yayi Mfumu, wapi ngunga beto ke na kuzinga; beno me mona, beto ke na kuzinga kaka na ntangu ya nsuka, na ntwala ya kukwenda ya Dibuundu. Ntangu yayi kaka. . .

42 Beto vwandaka tuba, na yawu beto lomba diaka balusakumunu ya Yandi na zulu ya Ndinga.

43 Tata ya beto ya Mazulu, awa me kwisa na nkokila yina ya nene, ngunga mosi ya nene yina ntangu kima ya nene me salama. Ya vwandaka bisika nionso na bantu. Mpe, Tata, mu ke sambila ti na nkokila yayi ya ke zabana, kukondwa ntembe, na bantima ya bantu mpe mabanza ya bantu, ti bawu ke zaba ti Nzambi kele dyaka na zulu ya Kiti ya kimfumu, mpe ti Yandi zola dyaka bantu ya Yandi.

44 Mpe ya kele ngunga, ngunga yina yinza ke na nsatu ya kumona, ke na kubelama ntangu yayi, samu ti ya ke na kudila samu na mpulusu. Beto lenda mona bima ya kukubama samu na kuvutula yawu. Beto lenda mona bima ya kukubama samu na kunata Dibuundu na Mvwandulu ya Klisto. Beto lenda mona Kento ya makwela kubaka nzutu, kulwata bilele ya makwela, kukubama. Beto lenda mona bansemo ke boka. Beto zaba ti beto me kuma na nsuka.

45 Ntangu yayi, Tata ya Mazulu, na ntangu ya kukwenda kuna samu na kulonga, to samu na kulonga na zulu ya dyambu ya nene yayi, ya ngolo yina kusalamaka na Nkembo, mwa mafunda zole ya bamvula me luta, mpe kupesamaka na ntumwa ya nene ya luzolo, Jean. Mpe na nkokila yayi beto ke zonzila na zulu ya Yawu. Ti Mpeve-Santu kwiza na ntwala ntangu yayi na Ngolo ya Yandi ya nene ya luzayikisu, ti Yandi lenda monisa na beto kima yina Yandi zola ti beto kuzaba, mutindu Yandi me sala na bankokila me luta. Beto ke kukipesa beto mosi na Nge, na Ndinga, na Nkumbu ya Yesu. Amen.

46 Ntangu yayi, mutindu beno zola kubaka, mu banza, na Babiblia ya beno. Mpe yayi kele kaka nzila ya nkufi, nzila mosi ya Masonuku. Kasi, ya kele nzila ya nsuka, ya kele. . . Kidimbu ya nsuka, mu zola tuba.

Ntangu yayi, mazono na nkokila beto vwanza zonzila na zulu ya Kidimbu ya Sambanu.

47 Kidimbu ya Ntete, me talisa mbeni ya Klisto. Ntangu ya yandi lutaka, mpe beto monaka mutindu yandi basikaka.

48 Mutindu Kivangu yina talisamaka, na Ngolo ya Nzambi yina basikaka na ngolo ya mbeni ya Klisto, samu na kunwanisa yawu! Mu banza ve ti ya lenda vwanda na kyuvu na dibanza ya muntu na zulu ya yawu.

49 Na yina beto ke mona ti, ya kele kaka na manima ya yina, nsungi ya dibuundu yina, Bivangu yina me zimbana.

50 Na manima, beto me mona, beto me soba, disolo ya muvimba, ya kele diaka ve na Bivangu ke basika. Beno me mona? Kasi, ya me talisama, ya me kwenda na ntwala, tii na ntangu ya Lukwamusu, na manima Dibuuundu me kwenda.

51 Wapi mutindu ya kulunga ya ke wisana na bansungi ya dibuundu! Mu ke mona ve kisono mosi, kima mosi yina salamaka ve na mutindu ya kulunga, ata mpe na bansungi mpe nyonso, mpe bantangu. Beno banza na yawu. Ya ke lakisa ti, ya zolaka vwanda Nzambi salaka yawu. Dibanza ya muntu zolaka bakula yawu ve. Mpe ntangu yayi beto ke tala ti, mpe, beto . . .

52 Mfumu bika beto baka Masonuku, Masonuku ya Santu, yina Yesu tubaka ke salama. Mpe wapi mutindu beto zolaka tala yawu? Mpe awa, me kwiza mpe me monikisa, mpe me nata kaka yawu kieleka. Dilongi ya Yandi kuna, vwandaka pesa mvutu na yawu, vwandaka basika kieleka na dibanza, Bidimbu sambanu, kasi Yandi zimbanaka ya Sambwadi. Beno me mona?

53 Na yina ntangu Bidimbu zibukaka, Nzambi, beno tala awa, Yandi nataka luzayikisu mpe kidimbu mosi ya Sambwadi. Beno me mona? Ya kele kinsweki ya kulunga na Nzambi. Beno tala. Ntangu yayi beto ke tanga na kati ya Biblia, na Kidimbu ya Sambwadi. Ya kele na Apocalypse, kapu ya 8.

Mpe ntangu yandi zibulaka kidimbu ya sambwadi, ya vwandaka swi na mazulu miniti makumi tatu.

54 Mpe ya kele nyonso yina beto me kuzwa na yawu. Ntangu yayi beto ke tala.

55 Mpe beto ke meka ve na kusimba beno ntangu ya yinda, samu ti mingi ya beno ke sala nzietolo, dyaka, na nkokila yayi, samu na kuvutuka na yinzo. Mpe mu banzaka diaka, kuzwa lukutakanu ya kubeluka ya nzutu na suka yayi, yina ke bika beno kwenda na suka yayi, beno zolaka vingila dyaka ve. Mpe ntangu yayi beto . . .

56 Mpe munu, mpe, mu fwana sala nzietolo na—na Tucson, na Arizona, kisika mu ke zingaka. Mpe ya kele kisika mu ke zingaka ntangu yayi. Mpe na manima mu—mu zola kuvutuka awa, kana Mfumu zola, na ziunga . . . Dibuta zola kuvutuka mwa bilumbu fioti na Ngonda ya sambanu. Mpe, ntangu yayi, mu banza ti mu ke kutana na beno nyonso kuna, na lukutakanu na ntangu yina.

57 Lukutakanu yina ke landa na manaka ya munu kele na Albuquerque, na New Mexico. Mu banza ti ya ke vwanda na kilumbu ya yivwa, kumi, mpe kumi na mosi. Mu ke vwanda

kuna na Kilumbu ya yiya mpe na Kilumbu ya tanu ya Santu. Na yawu, mu zolaka kuzwa nyonso, mpe mu vwandaka na manaka yankaka kisika mu zolaka sala yawu ve tii na ntangu yina, na yawu mu ke vwanda na Kilumbu ya yiya na nkokila mpe na Kilumbu ya tanu na nkokila, na Albuquerque, na New Mexico.

⁵⁸ Mpe na manima—mpe na manima yina ke landa, yina me zabana, pene-pene, ya kele yina me zabana ve. Beto zaba ve ya kieleka. Ya ke vwanda na bankundi ya munu ya mbote, kimvuka ya *Kuboka ya Kati-kati ya Mpimpa*, na . . .kuna na Southern Pines, na Caroline du Nord.

⁵⁹ Mpe bawu kele na allo-allo na ntangu yayi, na yina, bawu me fidisa ba-télégramme, nsangu, mpe nionso yina, mpe ya me kuma pene-pene, samu na nkonga yankaka, na Ditadi ya Fioti; ya bantu ya Nkumbu ya Yesu yina mu kuzwaka na bawu balukutakanu, kuna na Cow Palace na été yina me luta. Ba ke na lukutakanu ya bawu na Little Rock, na Arkansas. Mpe ba vwandaka lomba, kubanda mvula me luta, na kuzwa kaka nkokila mosi. To, ba ke zola nionso ya yawu, kasi ba ke kubama samu na nkokila mosi. Mpe na yawu mu tubaka na bawu, na kuzabaka kaka ve yinki ya kusala, mu tubaka ti bawu lenda samuna yawu fioti na ntwala, “ya me zabana ve.” Na yina ba ke zabisa yawu fioti na ntwala.

⁶⁰ Yandi me bokila? Uh-huh. Mbote mingi. Yinki nge ke tuba? [Mpangi-bakala mosi me tuba, “Hots Springs.”—Mu.] Hot Springs, mutindu yina? Mu me zimbana. [“Makumi zole na yiya.”] Makumi zole na yiya ya . . . [“Ngonda ya tanu.”] Ngonda ya tanu? [Muntu mosi me tuba, “Makumi zole na yiya tii na kilumbu ya makumi zole na tanu ya Ngonda ya sambanu.”] Makumi zole na yiya tii na kilumbu ya makumi zole na nana ya Ngonda ya sambanu. Ntangu yayi ba zabisaka yawu, “Ya me zabana ve,” ya zola tuba, “kana ya kele luzolo ya Mfumu.” Beno me mona? Mu ke . . .

⁶¹ Yayi kele kikuma mu ke zolaka kusala bima yayi. Beno ke longuka mwa fyoti na ntwala, ntangu yayi, beno me mona. Ntangu mu ke kwenda na kisika mosi, mu ke zolaka kutula makulu ya munu kuna, na kuzabaka ti Nzambi tubaka, “Kwenda kuna.” Na yina kana mbeni ke telema bisika nionso, mu ke tuba, “Mu kele awa na Nkumbu ya Mfumu Yesu. Vutuka na manima!” Beno me mona? Beno me mona? Beno me mona? Mpe beno kele—beno kele kieleka, na kisika ya beno, beno me mona. Ntangu Yandi me fidisa beno konso kisika yina, Yandi ke kengila beno. Beno me mona? Kasi kana beno kwenda, na kubanzaka, na yina mu zaba ve; Yandi lenda vwanda kuna ve. Na yawu mu—mu zola vwanda ya kieleka mutindu mu lendaka vwanda. Mu me bakaka mingi yina Yandi tubaka na munu ve na kubaka, kasi mu—mu ke zolaka kuvwanda ya kieleka ntangu nionso. Mfumu kusakumuna beno nionso ntangu yayi.

⁶² Ntangu yayi, ntangu yayi beto ke tala, yayi kele kaka nzila mosi awa, beto ke zola kusala kima mosi kaka mwa—mwa fyoti na ntuala awa. Beno tala, beto me lemuka kapu ya 7. Kapu ya 6 ke suka na yina ya Sambanu, na Kidimbu ya Sambanu. Kasi, na kati-kati ya Kidimbu ya Sambanu mpe Kidimbu ya Sambwadi, ya kele na kima ke salama. Beno me mona? Mpe mutindu—mutindu ya kele kaka mbote na kisika ya yawu ya kulunga, na kati-kati, kapu ya 6 mpe ya 7. Ntangu yayi beno tala na kapu ya 7, beto ke mona, na kati-kati ya Sambanu mpe ya Sambwadi, ya kele na mpwasika. Mpwasika, na kati-kati, ya kapu ya 6 mpe ya kapu ya 7 ya Buku ya Apocalypse, mpe ya kele na kati-kati ya Kidimbu ya Sambanu mpe ya Sambwadi ti mpwasika yayi kele. Ntangu yayi beto zola bakula yayi. Ya kele mfunu mingi ti beto bakula na mwa ntangu yayi.

⁶³ Ntangu yayi beno bambuka moyo, na manima ya kapu ya 4 ya Apocalypse, Dibuundu me kwenda. Na manima minati—mpunda yiya me basika, Dibuundu me kwenda. Beno me mona? Nyonso yina salamaka na Dibuundu, salamaka tii na kapu ya 4 ya Buku ya Apocalypse. Nionso yina salamaka na nsalulu ya mbeni ya Klisto, kwendaka tii na kapu 4. Mpe Kidimbu ya Yiya ya Apocalypse, bawu zole mbeni ya Klisto mpe Klisto, sukaka. Mpe mbeni ya Klisto ke kwiza samu na kubeba ya yandi, mpe na makesa ya yandi; mpe Klisto ke kwizaka na makesa ya Yandi.

⁶⁴ Ya kele mvita ya ntama yina bandaka ntama kuna, na simu yina yankaka ya ntangu. Mpe kuna bawu vwandaka. . . Ba losaka Satana mpe bawanzio ya yandi na ngaanda, mpe na yina bawu kwizaka na ntoto. Mpe bitumba bandaka diaka, samu Eve bukaka kibaka kisika ba vwandaka keba yandi, na manima ya Ndinga ya Nzambi. Mpe kubanda na ngunga yina kaka, Satana nungaka bitumba na zulu ya Ndinga ya Nzambi, samu ti mosi ya bantu ya Yandi, muntu ya kulemba, me kubwisa bikaku. Mpe ya kele kieleka mutindu yina yandi ke nungaka bitumba ntangu nionso, ya vwandaka samu na mosi ya bantu ya Yandi me katula bikaku ya Ndinga.

⁶⁵ Mpe yawu salamaka na nsungi yayi ya nsuka ya dibuundu, na nzila ya systeme ya organisation. Na yina, dibuundu ya kieleka, ya santu ya Nzambi ya moyo, samu na munati—mpunda ya luvunu, lendaka ve kundima Ndinga, mpe me balula dibuundu na Ndinga samu na kundima dogme.

⁶⁶ Ntangu yayi, bantu yikwa zaba ti ya kele na zulu ya dogme ti dibuundu ya Catholique ya Rome me tungama? Bawu ke ndimama yawu? Kieleka. Kieleka. Kieleka, bawu ke ndimaka yawu. Ya kele nyonso ve. Katolika, kieleka, ya ke nyongisa ve bansatu ya bawu, samu ti bawu zaba yawu. Ba me bwela kaka mosi ya malu-malu, awa ntama mingi ve, ti Marie kuvumbukaka. Beno ke bambuka moyo na yawu, awa mwa bamvula me luta, pene ya bamvula kumi. Bantu yikwa ke bambuka moyo na yawu? Na kati ya zulunale, kuna. Ya kieleka. Beno me mona?

Bima nionso, “ba-dogme” ya malu-malu. Beno me mona, ya kele nyonso dogme, Ndinga ve. Beno me mona?

⁶⁷ Nganga-Nzambi mosi, na masolo ntama mingi ve, yandi tubaka, “Tata Branham,” yandi tubaka, “Nzambi kele na kati ya dibuundu ya Yandi.”

Mu tubaka, “Nzambi kele na kati ya Ndinga ya Yandi.”

Yandi tubaka, “Beto fwana swana ve.”

⁶⁸ Mu tubaka, “Mu ke na kuswana ve. Mu ke na kusala kaka nsamunu mosi. Nzambi kele na kati ya Ndinga ya Yandi. Ya kieleka. ‘Muntu nyonso yina ke katula kima mosi na Yawu, to ke bwela kima mosi na Yawu,’ tubaka Ndinga.”

⁶⁹ Yandi tubaka, “Mbote, Nzambi pesaka. . . Klisto pesaka ngolo na Dibuundu ya Yandi, mpe tubaka na bawu: nyonso yina bawu ke kanga na ntoto, ya ke vwanda ya kukanga na Mazulu; mpe yina. . .”

Mu tubaka, “Ya kele kaka Kieleka.”

⁷⁰ Yandi tubaka, “Beto kele, na. . . na zulu ya musiku yayi, ti beto kele na ngolo ya kukatula disumu.”

⁷¹ Mpe mu tubaka, “Kana nge ke sala yawu mutindu ba pesaka yawu na Dibuundu, mpe mutindu bawu salaka yawu, mu ke ndima yawu. Kana nge ke sala yawu, ya kele na maza awa, samu na kuzwa ‘mbotika na Nkumbu ya Yesu Klisto samu na lemvo ya masumu ya nge,’ beno me mona, ve na muntu mosi ke tuba na beno ti masumu ya beno kele ya kulemvokila.” Beno me mona? Beno me mona? Ya kieleka.

⁷² Beno tala mbote Pierre na bafungula, na Kilumbu ya Pentecote. Beno bambuka moyo, yandi kele na bafungula yina bawu ke na kuzonzila. Mpe bantu tubaka, “Babakala mpe bampangi, yinki beto lenda sala samu na kuzwa mpulusu?”

⁷³ Pierre tubaka, “Beno balula ntima, mosi na mosi ya beno, beno botama na Nkumbu ya Yesu Klisto” (samu na yinki?) “samu na lemvo ya masumu, mpe na manima beno ke kuzwa dikabu ya Mpeve-Santu. Samu nsilulu kele samu na beno, mpe bana ya beno, bayina kele ntama, ya mingi Mfumu Nzambi ya beto ke bokila.” Ya kele kieleka. Na yawu yina ke sukisa dyambu kukondwa nsuka. Nyonso me mana. Ya me suka.

⁷⁴ Ntangu yayi, kasi, beno me mona, mbeni ya Klisto kwizaka na kati, mutindu beto talisaka yawu mpe talisaka yawu. Wapi mutindu ya luzayikisu! Oh, la la! Mpe na kubanza, bamvula nyonso yayi, beto monaka yawu kulandila na kukwenda na ntwala. Mpe awa ya kele kieleka, mbala mosi, MUTINDU ME TUBA MFUMU.

⁷⁵ Ntangu yayi, mpe beto ke tala mpwasika yayi ntangu yayi, na kati-kati, kapu ya 6 mpe ya 7. Ntangu yayi, kapu ya 7 ya Apocalypse, awa kele. . . yina ke monisa kusalama. Ya kele ve na

kati awa kaka samu na kima mosi ve. Ya kele ve ya kutula na kati, na kati-kati ya yayi, samu na kima mosi ve. Beno me mona? Ya kele awa samu na lukanu mosi, mpe ya kele luzayikisu yina ke monikisa kima mosi. Beno tala mutindu ngitukulu mpe mutindu landila mathématique ya kele kaka na kati ya Masonuku! Beno me mona? Kieleka.

⁷⁶ Beno ke kwikilaka na ba-mathématique ya Nzambi? Kana ve, kieleka beno kele ya kuzimbana na... Kieleka beno ke zimbana na kati ya Ndinga, kana beno banda na kutula yiya to sambanu, to—to kima mosi, na nganda ya bampova ya mathématique yina ba me yidika na ndonga. Ya kieleka beno ke kuzwa, ngombe mosi ya kento ke na kudia matiti na zulu ya yinti, kisika mosi kuna. Kieleka beno ke basika. Samu ti, Nzambi ve... Ndinga ya Yandi nyonso ke salaka ya muvimba na—na—na mathématique. Yinga, tata. Ya kulunga, ya kulutula kulunga! Ya kele ve na bisono yankaka ya kusunama mutindu Yawu, mutindu Yawu, ya kulunga mingi na mathématique.

⁷⁷ Ntangu yayi, kapu ya 8 ke monikisa kaka dyambu ya—ya Kidimbu ya Sambwadi, kisika kima yankaka ve me monisama pwelele, ntangu yayi, kima mosi ve. Ya me monisama ve na Kidimbu ya Sambwadi... ntangu yayi, ya kele ve na kima ya kusala na kapu ya 7 ya—ya Apocalypse. Luzayikisu ya yawu, ya Kidimbu ya Sambwadi, kele kieleka swi. Mpe kana mu vwandaka kaka na ntangu... Mu ke meka na mwa bisika fioti, samu na kulakisa beno.

⁷⁸ Kubanda na mbandukulu, na Genèse, ya Sambwadi yayi ya ka-... to ya Sambwadi yayi kele—kele—kele ya kuzonzila. Kubanda mbandukulu ya kieleka, na Genèse, Kidimbu yayi ya Sa-...

⁷⁹ Bidimbu yayi vwandaka kwenda na ntwala. Beno lenda bambuka moyo ve, na suka yayi, beto me lakisa ve mutindu bima yayi ke landana? Mpe beno tala mbote, na nkokila yayi, beto ke lakisa ndandani ya yawu. Mpe beno ke mona ti, ntangu ya me kuma na Kidimbu yina ya Sambwadi, yandi ke zenga yawu. [Mpangi Branham me fina misapi ya yandi—Mu.] Yinga.

⁸⁰ Yesu Klisto, ke na kuzonzaka, Yandi mosi, Yandi me tubila ntangu ya nsuka. Mpe ntangu Yandi kuzwaka... Tubilaka Bidimbu nyonso sambanu. Ntangu Yandi kumaka na Sambwadi, Yandi telamaka. Yawu yina, beno me mona. Ya kele kima ya nene.

⁸¹ Ntangu yayi, ntangu yayi, beto ke zonzila awa ntangu yayi na kapu ya 7 yayi, na mwa ntangu fioti, samu na—nakusala kyamvu na yawu, kati-kati ya Kidimbu ya Sambanu mpe ya Sambwadi. Samu ti, ya kele kaka na bima yina beto fwana landila, na ntangu yayi, kele Sambanu... kati-kati ya Kidimbu ya Sambanu mpe ya Sambwadi, ba ke bokila Israël na kubasika.

⁸² Ntangu yayi, mu kele na bankundi mingi ya mbote ya Bambangi ya Yehowa yina kele ya kuvwanda awa, kaka yina . . . to yina vwandaka. Mu banza ti bayankaka na kati ya bawu kele dyaka Bambangi ya Yehowa. Kasi ba ke tubaka ntangu nionso, yawu yina Tata Russell tubaka, nkama na makumi yiya na yiya ya mafunda yayi, kele Kento ya makwela ya kimpeve ya Klisto. Beno me mona? Bawu . . . Ya kele ve.

⁸³ Ya kele na kima ve ya kusala na nsungi ya dibuundu, ata fyoti. Bawu kele kieleka Israël. Ntangu yayi, beto ke tanga yawu na mwa minuti fioti. Ntangu yayi, ntangu ya mpwasika yayi, na kati-kati ya Sambanu . . . ya Bidimbu, kele lubokilu mpe kutulama ya kidimbu ya nkama na makumi yiya na yiya ya mafunda ya ba-Juif, ya kubokila na ntangu ya Lukwamusu, na manima Dibuundu me kwenda. Beno me mona? Ya kele ve na kima ya kusala na nsungi ya dibuundu, ata fyoti. Oh, ba me bokila, mpe na mutindu ya kulunga na ngwisani na Masonuku. Basabala tatu na ndambu ya nsuka ya Daniel, yina ba me zenga samu na “bantu ya Daniel,” beno me mona, Bantu ya makanda ve. Samu na “bantu” ya Daniel, mpe Daniel vwandaka Juif!

⁸⁴ Ntangu yayi beno tala, Israel, Israel ke kwikilaka kaka na baprofete ya yandi, mpe, na manima ba me siamisa bawu.

⁸⁵ Mpe ya ke na nsungi ya dibuundu ve, kubanda na Dibuundu ya ntete ya bantumwa, dibuundu ya ba-Protestant me kuzwaka ntete profete. Beno tuba na munu nani ya vwandaka, mpe beno lakisa yawu na munu. Ata mbala mosi ve! Bawu vwandaka, na nsungi ya ntete ya bantumwa, mosi ba bokilaka Agabus, yina vwandaka profete yina ba siamisaka. Kasi na . . . Ntangu Bantu ya makanda kotaka, na kuzwa difwa ya Nzambi, mpe Paul balukaka na Bantu ya makanda. Na manima ya Pierre, mutindu beto tangaka mazono na nkokila, Mfumu talisaka na yandi, ti, “Yandi ke basisa bantu na kati ya Bantu ya makanda, samu na Nkumbu ya Yandi, Kento ya Yandi ya makwela,” na yina ay me vwandaka ata fioti ve, na zulu ya ba-page ya masolo, profete ya Bantu ya makanda. Ntangu yayi beno vutuka kaka na disolo mpe beno tala. Samu na yinki? Ya kieleka, ya ke vwanda ya kuswaswana na Ndinga. Ya kieleka.

⁸⁶ Ntangu ya ntete yina basikaka, vwandaka nkosi, yina *vwandaka* baprofete: Ndinga.

Yina yankaka basikaka, vwandaka kisalu, munkayulu.

Yankaka basikaka, vwandaka mayele ya yimbi ya—ya muntu.

⁸⁷ Kasi ba me sila beto, na kilumbu ya nsuka, ti ya ke vutuka diaka na Dibuundu, samu na kusungika yina nionso ba longaka mbote ve, kondwaka, salamaka ve, yina ba yambulaka. Samu ti, ba me samuna yawu na ntwala awa ti Nsangu ya wanzio ya sambwadi ke manisa mansweki ya Nzambi. Mpe, na yina, beto

me tala Yawu nionso. Beto ke mona ti Yawu kele ya kieleka na ngwisani na Masonuku. Yawu yina kikuma.

⁸⁸ Ntangu yayi, beno lenda banza, ntangu muntu yayi ke kota na kisalu? Ntangu yandi ke sala yawu, beno bambuka moyo, ya ke vwanda ya kukikulumusa mingi mpe nionso yina, ti mabuundu ke kondwa yawu ntama mingi ve. Mpe beno lenda banza, mabuundu, dyaka na yisi ya binkulu ya basungiki, ke kuzwa ntete profete me katuka na Nzambi, nani ke telemina ngolo malongi ya bawu mpe ba-organisation?

⁸⁹ Ntangu yayi, ya kele kaka na muntu mosi yina lendaka lungisa yawu, kaka na Mpeve mosi yina me vwandaka ntete na zulu ya ntoto, yina mu zaba. To ke vwanda . . . Ya fwana vwanda Elie, na ntangu ya yandi. Mpe ba zabisaka yawu na ntwala ti ya ke vwanda, yina kele kima yankaka ve kasi Mpeve ya Klisto.

⁹⁰ Ntangu Klisto kwizaka, Yandi vwandaka ya kifuluka. Yandi vwandaka Profete. Yandi vwandaka Nzambi ya baprofete. Beno me mona? Beno me mona?

⁹¹ Klisto, beno tala mutindu bawu yinaka Yandi. Kasi Yandi kwizaka kieleka mutindu Ndinga tubaka ti Yandi ke kwiza. Kasi na kuvwandaka ti Yandi vwandaka Profete, bawu vwendaka mpe bawu kwendaka ntama na Kimfumu ya Nzambi, na kubokilaka Mpeve ya Nzambi, yina vwandaka kuswasikisa mabanza mpe nyonso yankaka yina, “mpeve ya yimbi.” Yandi tubaka, “Yandi vwandaka—yandi vwandaka nganga-nkisi, to dyabulu,” ya kele.

⁹² Nganga-nkisi kele dyabulu, beno me mona, mpeve ya dyabulu. Kieleka. Beno zaba yawu? Kieleka. Kutuba na ntwala kele kumekula profete, yina kele kieleka luvwenzu na ntwala ya Nzambi.

⁹³ Ntangu yayi beno tala. Ya me bokila, na ngwisani ya kulunga na Masonuku, na nsuka ya bamvula tatu na ndambu ya Daniel.

⁹⁴ Beno tala, ba me tuba na mukwikidi ya Israel—bakwikidi, na Ngwisani ya Ntama, na kukwikila baprofete ya bawu na manima profete me siamisama. “Kana ya kele na mosi na kati-kati ya beno, yina kele ya kimpeve to profete, Munu Mfumu Mu- . . . Nzambi ya nge ke kukitalisa Munu mosi na yandi, mpe kutuba na yandi na ba-vision, na nzila ya bandosi, kutendula bandosi.” Muntu mosi kele na ndosi, profete ke vwanda na kiyeka ya kutendula yawu. Mpe kana—kana yandi kele na vision, yandi ke tuba yawu. “Mu ke sala Munu mosi kuzabana na yandi na nzila ya ba-vision mpe bandosi, kusala Munu mosi kuzabana. Mpe kana yina yandi ke tuba kusalama, na yina beno kuwa profete yina, samu ti Mu kele na yandi. Kana ya salama mutindu yina ve, na yina beno vwanda ve na boma ya yandi.” Yinga. Ya kieleka. “Beni kwenda ntama, beno bika yandi swi, beno me mona.” Ntangu yayi ya kele . . .

⁹⁵ Ntangu yayi, Israël ntangu nyonso ke kwikila yawu. Mpe beno ke mona ve? Samu na yinki?

Ntangu yayi mu zola beno kusimba lesu yayi ya mbote, na nkokila yayi, ntangu yayi.

⁹⁶ Samu na yinki? Samu, yina kele ntumunu ya Nzambi, samu na bawu. Mu ke kipe ve ba-tracte yikwa ti Bantu ya makanda lenda kuma kuna mpe ya kumwangana. Mu ke kipe ve lutangu beno ke luta na Israel na Biblia na yisi ya diboko ya beno, na kutalisaka *yayi*, *yina*, to *yankaka*; bawu ke kuzwa ata mbala mosi ve kima kasi profete. Ya kele kaka kieleka. Samu ti, profete kele yandi yina kaka lenda baka Ndinga ya Nzambi mpe kutula Yawu na kisika ya Yawu, mpe kuvwanda profete yina me siamisama. Ba ke kwikila yawu. Ya kieleka.

⁹⁷ Mutindu mu vwandaka tuba na Juif mosi awa na Benton Harbor, ntangu John Rhyn, yandi vwandaka mpofo luzingu ya yandi nionso, na kutala, yandi kuzwaka kumona ya yandi. Ba nataka munu kuna, na yinzo yina ya David. Mpe rabbin yayi basikaka na mandefo ya yandi ya yinda. Yandi tubaka, “Na wapi lutumu nge pesaka Jean Rhyn kumona ya yandi?”

Mu tubaka, “Na Nkumbu ya Yesu Klisto, Mwana ya Nzambi.”

⁹⁸ Yandi tubaka, “Ntama na Nzambi dibanza ya kuzwa Mwana!” Beno me mona? Mpe yandi tubaka, “Beni bantu lenda zenga Nzambi ve na bitini tatu mpe kupesa Yandi na Juif. Kusala Banzambi tatu na Yandi; beno kele nkonga ya mimpani!”

⁹⁹ Mu tubaka, “Mu ke zenga Yandi na bitini tatu ve.” Mu tubaka, “Rabbi, ya ke vwanda kima ya ngitukulu samu na nge na kukwikila ti mosi ya baprofete ya nge tubaka yawu. . . kima ya luvunu?”

Yandi tubaka, “Baprofete ya beto ke tuba kima ya luvunu ve.”

Mu tubaka, “Nani Esaie 9:6 vwandaka zonzila?”

Yandi tubaka, “Mesiya.”

¹⁰⁰ Mu tubaka, “Na yina, Mesiya ke vwanda Profete-Muntu. Ya kieleka?”

Yandi tubaka, “Yinga, tata. Ya kele kieleka.”

¹⁰¹ Mu tubaka, “Talisa munu kisika Yesu kondwaka yawu.” Yandi tubaka. . . Mu tubaka, “Wapi mutindu Profete ya Mesiya ke vwanda na Nzambi?”

Yandi tubaka, “Yandi ke vwanda Nzambi.”

Mu tubaka, “Ya kele kieleka. Ntangu yayi nge me kuzwa yawu na yintu.”

¹⁰² Na yina sadisa munu, Juif yina vwandaka ya kutelama kuna mpe masa ya meso vwandaka kulumuka na matama ya yandi, yandi tubaka, “Mu ke kuwa nge ntangu mosi na ntwala.”

Mu tubaka, “Rabbi, nge ke kwikila yawu?”

103 Mpe yandi tubaka, “Tala,” yandi tubaka, “‘Nzambi kele na kiyeka na matadi yayi kubasisa bana samu na Abraham.’” Mu zabaka ti yandi vwandaka na Ngwisani ya Malu-malu.

Mu tubaka, “Kieleka, Rabbi! Ntangu yayi wapi mutindu samu na yawu?”

104 Yandi tubaka, “Kana mu longa yawu, mu ke vwanda kuna,” beno zaba kisika kisika ya bawu kele ya kuvwanda na zulu ya mongo kuna, “kuna na bala-bala, ke lomba dimpa ya munu.”

105 Mu tubaka, “Mu ke zola mingi kuvwanda kuna kulomba dimpa ya munu.” Juif kele dyaka na maboko ya yandi na mbongo, beno zaba. Beno me mona? Beno me mona? “Mu ke zola mingi. . .” Mpe nkumbu ya yandi na wolo, na . . . Mu tubaka, “Mu ke zola kuvwanda kuna, na kudyaka ba-biscuit ya mungwa mpe kunwa maza ya mpamba, mpe kuzaba ti mu vwandaka na ngwisani na Nzambi, mpe kieleka; ti mu zolaka vwanda awa na nkumbu ya munu na zulu ya yinzo yango ya nene, na bisono ya wolo mutindu yina, mpe kuzaba ti mu vwandaka ntama na Nzambi. Mu zaba yawu.” Yandi zolaka dyaka ve kuwa munu, na yawu yandi kotaka.

106 Kasi yawu yina. Beno lenda zenga Nzambi ve na bitini zole to tatu, na kubokilaka “Tata, Mwana, mpe Mpeve-Santu,” mpe kusala Banzambi tatu mpe kupesa yawu na Juif. Musiku ya Yandi ya kieleka kele, “Nge ke vwanda na banzambi yankaka ve na ntwala ya Munu. Mu kele Mfumu Nzambi ya nge.” Yinki Yesu tubaka? Yesu tubaka, “‘Beno kuwa, O Israël, Mu kele Mfumu Nzambi ya beno, Nzambi mosi.’” Tatu ve; ata mbala mosi ve ti beno ke pesa yawu na bawu. Ve. Ata profete mosi ve ke zonza na zulu ya Banzambi tatu. Ve. Kisika mosi ve. Beno ke kuwa yawu ata fioti ve. Ve, tata. Yina ke bumpani mpe mumpani mutindu yawu me kwisa. Yinga, tata.

107 Beno tala. Kasi baprofete yayi ke kwiza. Yina kaka ve. . . Baprofete, ntangu yayi, kele Apocalypse 11. Beto me tanga ndambu ya yawu. Mpe mu zola ti beno tanga yawu mutindu beno ke longuka yawu, na ba-bande mpe nionso yina. Bawu kele kieleka baprofete yina me siamisama, na nzila ya kidimbu ya baprofete. Na manima Israël ke kuwa yawu.

108 Ntangu yayi, samu na beno, bankundi ya munu ya Bambangi ya Yehowa, beno bakula ntangu yayi ti yayi, nkama na makumi yiya na yiya ya mafunda, kele na kima ve ya kusala na Kento ya makwela. Ya kele ve na mwa Masonuku samu na kusimbisa yawu. Ve, tata. Ba kele ve. Ba kele ba-Juif. Musolami yina ba me bokila na ntangu ya bamvula tatu na ndambu ya nsuka ya basabala makumi sambwadi ya Daniel. Ntangu yayi ya kele. . .

109 Mu—mu ke landila na kutanga yayi. Ya kele ve mingi samu na beno nionso awa, kasi, beno me mona, bantu, ba-bande yayi ke kwenda bisika nionso, beno me mona. Mpe beno ke bakula

yawu. Beno ke kuwa munu kuvutuka na manima. Ya kele samu na lukanu yina.

¹¹⁰ Beno tala. Ntangu yayi beno mona mutindu bawu zolaka, bampofa, beno ke mona mutindu bawu vwandaka . . .? Yesu, to, Nzambi kufwaka meso ya ba-Juif, samu na kupekisa bawu na kuzaba Yesu. Kana bawu zabaka, kana bawu zabaka kaka ti . . . Na kumonaka kidimbu yina Yandi salaka, kana bawu vwandaka na kitezo ya bawu ya kulunga, mutindu bawu vwandaka vutuka na yisi ya musiku ntangu Nzambi tumaka bawu na yina me tala profete, mpe bawu monaka Yesu kusala yawu, bawu tubaka, “Yayi kele Mesiya.” Samu na yinki ya vwandaka?

¹¹¹ Bayina na nsungi yina, bayina bankumbu ya bawu vwandaka ya kusonama na Buku ya Luzingu ya Mwana-dimeme, bantumwa ya Yandi mpe nyonso yankaka, bawu monaka yawu mpe ndimaka yawu.

¹¹² Samu na yinki bayankaka ya bawu ve? Beno me mona, bawu vwandaka ya kufwa meso. Bawu lendaka ve na kumona yawu. Bawu ke mona yawu ve, ntete. Mpe ba ke mona yawu ve tii kuna yandi ke butuka mutindu yinsi, na ntangu mosi. Yina lenda ve . . .

¹¹³ Ndinga lenda kubwa ve. Beno bambuka moyo, Ndinga lenda kubwa ve. Beno kipe ve ba-sensation yikwa beno kele na yawu, mpe nionso yina ke salama, kasi Ndinga yina lenda kubwa ve. Ya ke vwanda kaka kieleka mutindu Nzambi tubaka yawu vwandaka. Beno me mona? Ntangu yayi, beto me bakula ti bima yayi fwana salama.

¹¹⁴ Mpe ya kele samu na yina bawu zabaka ve Yesu ntangu Yandi kukitalisaka Yandi mosi na mutindu ya kulunga samu na kuvwanda Profete.

¹¹⁵ Mpe mwa—mwa kento ya Samarie yina vwandaka kuna na dibulu ya masa. Yandi vwandaka ata fioti ve na Samarie; Yandi kwendaka kuna, yandi tubaka ti Yandi fwana kuluta kuna, mpe Yandi kwendaka kuna. Mpe ya vwandaka na ntwenya ya kento yina. Mpe yandi, na kitezo ya yandi, yandi vwandaka mbote mingi na kuzwa Nsangu ya mbote kulutila banganga-Nzambi yina ya misambidi mpe bima ya kilumbu yina. Yandi salaka yawu. Ya kieleka. Ntangu yayi, beno me mona?

¹¹⁶ Kasi, na ntwala ya kulosama ya bawu nionso, kasi mosi ya bantu ya bawu ya lukumu ndimaka ti bawu zabaka ti Yandi vwandaka Mulongisi yina Nzambi tindaka.

¹¹⁷ Mu vwandaka tuba na mosi ya badokotolo ya kulutila mbote yina kele na etats-unis, na bureau ya yandi, ntama mingi ve. Muntu mosi ya mayele mingi na Louisville, muntu ya kieleka ya kikesa. Mpe mu tubaka na yandi, mu tubaka, “Dokotolo, mu zola kuyufula nge kiuvu mosi.”

Yandi tubaka, “Mbote mingi.”

118 Mu tubaka, “Mu me tala kidimbu ya nge ya medesine, yinti. Nge ke na nyoka ya kuvinga na dikunzi mosi. Yinki yawu ke lakisa?”

Yandi tubaka, “Mu zaba ve.”

119 Mpe mu tubaka, “Ya kele samu na yayi: ya vwandaka kidimbu ya kubeluka ya Kinzambi, kisika Moise zangulaka nyoka ya kisengo na ntoto ya kuyuma, beno me mona, yina vwandaka kaka kidimbu, kaka kidimbu ya Klisto ya kieleka.”

120 Ntangu yayi, bubu yayi, nkisi kele kidimbu ya kubeluka ya Kinzambi. Mpe ata ti mingi na kati ya bawu ke kwikila yawu ve, badokotolo ya kieleka ke kwikila yawu. Kasi bayankaka na kati ya bawu ke kwikila yawu ve. Kasi bendele ya kieleka yina bawu ke zangula ke talisa Ngolo ya Nzambi ya Ngolo nionso, kana bawu zola kukwikila yawu to ve. Beno me mona? Ya kele kieleka. Ya kele na nyoka ya kisengo yina kele ya kunamika na zulu ya dikunzi, na zulu ya bendele ya medesine.

121 Ntangu yayi beno tala ba-Juif yayi. Ntangu yayi, makalu ya kimpofo vwandaka na meso ya bantu yayi. Bawu, bawu lendaka ve kusadisa yawu; ya vwandaka kuna, mpe Nzambi tulaka yawu kuna. Mpe bawu kele kuna tii nsungi yina ba silaka bawu, baprofete yayi ke na kwiza. Beno lenda fidisa ba-missionaire, beno lenda sala nyonso yina beno zola; Israel ke balula ntima ata fioti ve tii kuna baprofete yayi ke kota na kisalu, mpe ya ke vwanda na manima ya Enlevement ya Dibuundu ya Bantu ya makanda.

122 Kulutila ve ti nsungi ya ngombe lendaka kuzwa lubokilu ya nkosi, samu ti Nzambi me tuba na kati ya Ndinga ya Yandi ti Mpeve ya ngombe vwandaka basika. Mpe na nsungi ya ba-reformateur, muntu mosi me basika. Beno me mona? Beno kaka . . .

123 Ya kele kaka kima yina beno . . . bawu lenda kuzwa. Ya kele . . . Mpe, na kati kuna ntangu yayi, bawu kele ya kufwa meso. Ya kele kaka nyonso yina kele samu na yawu. Ntangu yayi beno tala.

124 Kasi nsungi ke na kwiza ntangu ya Bantu ya makanda ke mana. Ya kele na yinti, mpe nsimbulu vwandaka Juif, mpe ba zengaka yawu; mpe ba namikaka Bantu ya makanda, “yinti ya olive, ya mfinda,” mpe ke buta mbuma ya yawu. Ntangu yayi, ntangu ba ke zenga Kento ya makwela ya Bantu ya makanda, na yinti yina ya Kento ya makwela mu vwandaka zonzila, mpe ba ke nata yawu na Mvwandulu ya Nzambi; Nzambi ke kusuna Bantu ya makanda ya kukondwa lukwikilu yina, na lweka awa na lweka (mwense ya kulala), mpe ke namika dyaka. Yandi silaka na kusala yawu.

125 Mpe tii ntangu yina, beno fwana zaba kaka kisika beno kele . . . Kana beno zaba kisika beno ke na kukwenda, mbote,

mbote mingi. Kana beno zaba ve, na yina, beno ke na kutekita na kati ya mpimpa.

¹²⁶ Ntangu yayi, ya kele ntangu ba-Juif ke balula ntima, na nsungi yango. Ntangu yayi, mutindu nsungi ya dibuundu, na yisi ya ngolo ya nsilulu ya kupakulama, bawu ke kuzwa Klisto; kasi, ntangu yayi, ve na yina Bantu ya makanda kele na kati. Ntangu yayi beto lenda mona wapi mutindu ya nsangu ti bapofete yayi zole, ya Apocalypse kapu ya 11, ke longa. Ntangu yayi beno lenda mona pwelele kieleka yina bawu ke sala. Samu ti, bayina bikanaka, to nkama mpe makumi yiya na yiya ya mafunda, bayina ba soolaka ntete, ke kuzwa Kidimbu ya Nzambi.

¹²⁷ Beto tanga kaka. Ntangu yayi beno kuwa kieleka na bukebi ntangu yayi. Ntangu yayi mu zola beno kutanga na munu, kana beno lenda, samu ti mu ke vutukila kaka yayi na mwa ntangu fyoti, kapu 7, ntangu yayi, yayi kele na kati-kati ya Kidimbu ya Sambanu mpe ya Sambwadi.

*. . . na manima ya bima yayi—na manima ya bima yayi
(Bidimbu yayi) . . .*

¹²⁸ Kidimbu ya Sambanu zibukaka, mpe ya kele ntangu ya Lukwamusu. Muntu nionso me bakula yawu ntangu yayi? [Dibuundu me tuba, “Amen.”—Mu.] Kidimbu ya Sambanu zibukaka, mpe Lukwamusu vwandaka landila. Na manima ya yayi, yinki?

*. . . na manima ya bima yayi mu monaka bawanzio
yiya ya kutelama na bansongi yiya ya ntoto, ba
vwandaka kanga mipepe yiya ya ntoto, ti ya zolaka fula
ve na zulu ya ntoto, to na zulu ya mubu, to na zulu ya
yinti nyonso. (Bawanzio yiya!)*

*Mpe mu monaka wanzio yankaka kuzanguka na esete,
yandi vwandaka na kidimbu ya Nzambi ya moyo: mpe
yandi bokaka na ndinga ya ngolo na bawanzio yiya,
na bayina ya pesamaka na kutalisa mpasi na mubu,
ntoto . . . mubu,*

*Na kutubaka, Beno talisa ve ntoto mpasi, to mubu, to
bayinti, tii beto ke tula kidimbu na bisadi . . .*

¹²⁹ Kento ya makwela ve. “Bisadi.” Bana ya babakala ve. “Bisadi.” Israel ke vwandaka ntangu nionso bisadi ya Nzambi. Dibuundu kele bana ya babakala, beno me mona, na nzila ya mbutukulu. Israel kele kisadi ya Yandi. Beno tala mbote, konso kisika, ya kele ntangu nyonso. Abraham vwandaka kisadi ya Yandi. Beto kele ve bisadi. Beto kele bana, bana ya babakala mpe bana ya bakento. Yinga.

. . . ya . . . ya Nzambi ya beto na mbunzu ya bawu.

¹³⁰ Ntangu yayi beno tala mbote.

. . . Nzambi ya beto na mbunzu ya bawu.

Mpe mu kuwaka lutangu ya bayina wandaka ya kutula kidimbu: . . .

131 Ntangu yayi mu zola ti beno kuwa mbote ntangulu ya yawu.

. . . mpe ba tulaka kidimbu na nkama na makumi yiya na yiya ya funda ya makanda nyonso ya bana ya Israël.

132 Yandi pesaka bawu bankumbu ya kulunga. Ntangu yayi, kana ya kele na British-Israël discerner yina kele ya kuvwanda awa, beno kuwa mutindu yayi ke bebisa nsamunu ya bawu, beno me mona.

Ya dikanda ya Juda kutulamaka kidimbu mafunda kumi na zole. (Yina ba ke bokila, “dikanda.”) Ya dikanda ya Ruben ya wandaka ba tulaka kidimbu na mafunda kumi na zole. Ya dikanda ya Gad. . . mafunda kumi na zole.

133 Beno tala mbote—beno tala mbote makanda ya beno ntangu yayi.

Mpe ya dikanda ya Aser ba tulaka kidimbu mafunda kumi na zole. . . dikanda ya Nephthali mafunda kumi na zole. . . dikanda ya—ya Manassé. . . mafunda kumi na zole.

Mpe dikanda ya Siméon. . . ba tulaka kidimbu mafunda kumi na zole. Ya dikanda ya—ya Levi wandaka ba tulaka kidimbu na mafunda kumi na zole. Ya dikanda ya Issacar. . . mafunda kumi na zole. (Issacar, mu banza ti beno ke tangunaka yawu.) . . . mafunda kumi na zole.

. . . dikanda ya Zabulon. . . funda kumi na zole. Mpe dikanda ya Joseph wandaka ya kutula kidimbu mafunda kumi na zole. Ya nyonso. . . Na dikanda ya Benjamin wandaka ya kutula kidimbu mafunda kumi na zole.

134 Ntangu yayi, ya kele na makanda kumi na zole, mafunda kumi na zole na dikanda mosi. Bambala kumi na zole fwokula na bambala kumi na zole. . . kele yinki? [Dibuundu me tuba, “Nkama mpe makumi yiya na yiya ya mafunda.”—Mu.] Nkama mpe makumi yiya na yiya ya mafunda. Ntangu yayi beno tala mbote. Bawu vwandaka, bawu nyonso, ya makanda ya Israël.

135 Ntangu yayi beno tala mbote, “Na manima ya yayi. . .” Ntangu yayi awa me kwiza nkonga yankaka. Ntangu yayi, Kento ya makwela me kwenda, beto zaba yawu. Kasi beno tala mbote nkonga yayi kukwiza.

Na manima ya yayi mu talaka, mpe, tala, nkonga ya nene ya bantu, yina muntu ve lendaka tanga, ya bayinsi nyonso, . . . makanda, mpe bantu, mpe ndinga, telamaka na ntuala ya kiti ya kimfumu, mpe na ntuala

ya Mwana-dimeme, ya kulwata ba-robe ya mpembe, mpe mandala na diboko ya bawu;

Mpe bokaka na ndinga ya ngolo, na kutubaka, Mpulusu na Nzambi ya beto yina me vwanda na zulu ya kiti ya kimfumu, mpe na Mwana-dimeme.

Mpe bayinsi nyonso...telamaka pene ya kiti ya kimfumu, mpe bakuluntu mpe bivangu yiya, mpe kubwaka na ntwala ya kiti ya kimfumu na bizizi ya bawu, mpe sambilaka Nzambi,

Na kutubaka, Amen: Balusakumunu, . . . nkembo, . . . ndwenga, . . . matondo, . . . buzitu, . . . ngolo, . . . lenda, kuwanda na Nzambi ya beto samu na ntangu nyonso mpe ntangu nyonso. Amen.

Mpe mosi ya bakuluntu . . .

136 Ntangu yayi yandi kele na ntwala ya bakuluntu awa. Na yina, beto me mona yandi, na kati ya Bidimbu.

Mpe mosi ya bakuluntu vutulaka, na kutubaka na munu, Banani kele bayayi . . .

137 Ntangu yayi, Jean, na kuvwandaka Juif, bakulaka bantu ya yandi mosi. Yandi monaka bawu na mutindu ya dikanda. Ya kele kieleka? Yandi ndimaka mpe bokilaka mosi na mosi ya makanda.

138 Kasi ntangu yayi, ntangu yandi ke mona bayayi, yandi kele na kutala ya kukangama. Mpe kuluntu zaba yawu, na yawu yandi tubaka:

. . . Banani kele bayayi yina kele ya kulwata ba-robe ya mpembe? mpe wapi kisika bawu me katuka?

139 Jean, pesaka mvutu ntangu yayi:

Mpe mu tubaka na yandi, Tata, nge zaba.

140 Jean zabaka bawu ve, beno me mona; makanda nyonso, bandinga nyonso, mpe yinsi.

. . . Mpe yandi tubaka na munu, Bayayi kele—yandi tubaka na munu, Bayayi kele bawu yina me basika na lukwamusu ya nene, (na bampova yankaka, Lukwamusu ya nene), mpe me sukula ba-robe ya bawu, . . . me kumisa yawu mpembe na menga ya Mwana-dimeme.

Na yawu bawu kele na ntwala ya kiti ya kimfumu ya Nzambi, mpe ke sadila yandi kilumbu mpe mpimpa na tempelo ya yandi: mpe bawu . . . yandi yina kele ya kuvwanda na zulu ya kiti ya kimfumu ke zinga na kati-kati ya bawu.

Ba ke vwanda diaka ve na nzala ya madia, to ba ke vwanda diaka ve na mpwila; to dyaka nsemo ke lezima

na zulu ya bawu—mwini ke lezima na zulu ya bawu, to tiya mosi.

Samu ti Mwana-dimeme yina kele na kati-kati ya kiti ya kimfumu ke kudisa bawu, mpe ke twadisa bawu na bayinto ya maza ya moyo: mpe Nzambi ke kusuna . . . masa ya meso nyonso na meso ya bawu.

141 Ntangu yayi beto zibula . . . beto baka Kidimbu.

Beno me tala, bawu vwandaka . . . Ya ntete, beto ke banda ntangu yayi, na Israël.

142 Mpe kuna beto ke mona dibuundu ya kuvedisa, ve Kento ya makwela; dibuundu ya kuvedisa, na nzila ya Lukwamusu, beno me mona, beno me mona, ke na kukwiza awa, lutangu ya nene ya bantima ya kieleka yina basikaka na—na Lukwamusu ya nene. Ve Dibuundu; Yawu me landila, Kento ya makwela. Beno tala dibuundu.

143 Ntangu yayi beto ke tala, na manima ya mwa ntangu fyoti, Yesu tubaka ti Kiti ya kimfumu ke vwanda, mpe mutindu . . . bawu ke telama na lufundusu, mosi na mosi.

144 Ntangu yayi, beto ke tala ntangu yayi ti bantu yayi vwandaka ya kukanga na Kidimbu ya Nzambi ya moyo (ya kele kieleka?), ba—Juif yayi. Yinki kele kidimbu ya Nzambi ya moyo?

145 Ntangu yayi, mu ke na kubokila ve mosi, mu ke na kulwadisa bansatu ya beno. Mu ke na kutuba kaka, beno me mona. Beno zaba, ti, na kutangaka na manima ya bantu mingi ya mayela bayina sonikaka na yayi, na kutubaka ti nkonga yayi awa, yina ba me sukula na menga, kele kieleka Kento ya makwela?

146 Beno zaba ti bantu ya mayela mingi mpe ke tubaka ti nkama mpe makumi yiya na yiya ya mafunda kele Kento ya makwela? Wapi . . . Ya kele na kima fwana salama awa, yimbi . . . na kati awa kaka, samu ti ya kele na kima mosi ke tambula mbote ve ntangu yayi.

147 Beno tala, bampangi ya beto ya ba-Adventiste ke tubaka, ti, “Kidimbu ya Nzambi, ke na kuzitisa kilumbu ya saba.” Beno zaba yawu. Kasi mu zola kitini mosi ya Masonuku na zulu ya yawu, samu na kulakisa saba yango, to kuzitisa kilumbu ya saba, ya kele Kidimbu ya Nzambi. Beno me mona? Ya kele kaka muntu me benda dibanza yina.

148 Kasi kana beno ke tanga Ephésiens 4:30, ya me tuba, “Beno nyongisa ve Mpeve-Santu ya Nzambi, na yina na beno kutulamaka kidimbu tii kilumbu beno . . . na mpulusu ya beno,” yinga, tata, ntangu kisalulu ya kivukisi me salama, mpe beno me kwisa; Klisto me kwisa samu na kuvulusa Bantu ya Yandi. Ba me tula beno kidimbu; ya kele ve tii na reveil yina ke kwisa. Ntangu beno kele mbala mosi ya kutula kidimbu na Mpeve-Santu, ya kele kisalulu ya kumanisa, ti Nzambi me yamba beno, mpe ya kele ve na kima ya kukwenda ntama na yawu.

149 Beno ke tuba, “Mbote, mu kuzwaka Yawu, mpe mu me kwenda.” Ve, beno—beno vwandaka na Yawu ve.

150 Nzambi tubaka ti Yawu ke kwenda na Kilumbu ya Mpulusu. Ntangu yayi, uh-huh, beno ke swana kaka na Yandi, mpe beno ke mona yinki ya zola kutuba. “Tii Kilumbu ya Mpulusu.”

151 Beno tala. Mutindu ya vwandaka... Mutindu bawu vwandaka bayina bikanaka landila nsodolo, ba-Juif yayi kele bayina bikanaka landila nsodolo. Na bilumbu ya ministere ya ntete ya Elie na ba-Juif, kisika bakwikidi mafunda sambwadi vwandaka pene-pene ya diboko ya Nzambi, ntangu yayi ya kele na ntangu yankaka yayi, yina ke na kwiza na ntangu ya bawu, samu na kuvwanda nkama mosi na makumi yiya na yiya ya mafunda landila nsodolo. Ti, Nsangu na ntangu yina, samu na kukwikila Nsangu, kuvwanda nkama mosi na makumi yiya na yiya ya mafunda.

152 Ntangu yayi, beno ke tuba, “Oh, ntangu yayi kaka minuti, mpangi, Mu zaba ve kima ya ‘kusoola yayi. Mbote, mu me tangaka yawu kuna ata fioti ve.”

153 Mbote mingi, ntangu yayi beto mona kana ya kele kieleka, to ve. Beto vutuka na Matthieu, mpe beto kwenda kuna mpe beto tala kana beto lenda mona ve mwa kima mosi na zulu ya yayi kisika mosi. Mu ke kwikila ntangu yayi ti mu kele ya kusungama. Mu kele ve na yawu ya kusonika awa, kasi me kwiza kaka na dibanza ya munu. Beto baka, na nsuka, na nzila ya 30; kisika beto kwendaka mazono na nkokila, nsuka ya Kidimbu ya Sambanu, na nzila ya 30. Ntangu yayi beto tanga yawu mpe beto mona ntangu yayi kisika beto ke kuma, na nzila ya 31. Beno me mona? “Ba ke mona Mwana ya muntu kukwiza na nkembo.” Ntangu yayi nzila ya 31.

Mpe yandi ke fidisa bawanzio ya yandi na muningu ya nene ya mpungi, mpe ba ke vukana kintwadi samu na musolami ya yandi kubanda mipepe yiya, kubanda nsuka ya mazulu na yankaka.

154 “Musolami” ke basika. Yinki ya kele? Mpe ntangu ya Lukwamusu. Nzambi ke bokila musolami ya Yandi, mpe ya kele ba-Juif na kati ya ntangu yina, bantu ya kusolama. Biblia ke zonzila na yawu. Paul zonzilaka na yawu, “Landila nsodolo.” Ya ke vwanda na nkama mosi na makumi yiya na yiya ya mafunda landila nsodolo, yina ke kwikila Nsangu, na kati ya ba-million yina ke vwanda kuna.

155 Ya vwandaka na mafuku na Palestine, na bilumbu ya profesu ya Elie, mpe mafunda sambwadi kuzwaka mpulusu na kati ya mafuku.

156 Ntangu yayi, “landila nsodolo.” Na yina, mafuku ya ba-Juif ke na kuvukana na yinsi ya bawu. Ya me kuma yinsi. Ya ke vwanda na mafuku ya bantu na kati kuna, kasi kaka nkama mosi

mpe makumi yiya na yiya ya mafunda “bayina ba soolaka” ba ke baka. Bawu ke kuwa Nsangu.

157 Kima mutindu mosi ya kele na kati ya Dibuundu ya Bantu ya makanda. Ya kele na Kento ya makwela, mpe Yandi kele musolami. “Mpe ba ke bokila yandi landila nsodolo.” Beno tala, yayi nionso ke fwanikisa Dibuundu, na mutindu ya kulunga, bakwikidi ya kusolama.

158 Bayankaka ke kwikilaka ve. Beno lenda tuba yawu kaka. Beno ke tuba na muntu Kieleka, mpe ti ya siamisama na nzila ya Ndinga, mpe na manima ya kusiamisama; yandi ke tuba, “Mu ke kwikila Yawu ve.” Beno lenda kaka . . .

159 Beno sakana dyaka ve na yawu. Yesu tubaka na yawu ve. Yandi tubaka, “Ya kele kaka mutindu kulosa misanga na ntuala ya bangulu.” Beno me mona? Yandi tubaka, “Bika bawu kaka. Ba ke baluka mpe ke dyata beno na yisi ya makulu ya bawu. Ba ke seka beno. Beno kwenda kaka mpe beno bika bawu. ‘Kana mpofo ke na kutwadisa mpofo . . .’”

160 Mu kwendaka na bakala mosi, ntama mingi ve, to, yandi kwizaka na munu, mu zolaka tuba. Yandi vwandaka tuba, bisika nionso, bisika nionso, samu na kunwanisa kubeluka ya Kinzambi. Mpe yandi kwisaka, mpe yandi tubaka, “Mu ke kwikila ve kubeluka ya nge ya Kinzambi.”

161 Mu tubaka, “Ya munu, mu banza, ya ke vwanda mbote ve, samu ti mu kele na mosi ve.” Mpe yandi . . . Mu tubaka, “Kasi Nzambi kele ya kulunga.”

Yandi tubaka, “Ya kele ve na kima ya mutindu yina.”

162 Mu tubaka, “Nge me wumela mingi samu na kutuba yawu, nkundi. Yinga, nge me—nge me vingila mingi samu na yawu. Mu banza beno lendaka tuba, mwa bamvula me luta, kasi yayi kele nsungi yankaka ntangu yayi. Ya kele na mafuku ya kupesa kimbangi, beno me mona.” Mu tubaka, “Nge me—nge me lutisa ntangu mingi ntangu yayi, mpangi, samu na kutuba yawu.”

163 Yandi tubaka, yandi tubaka, “Mbote, mu ke kwikila yawu ve; mu ke kipe ve yina nge ke sala.”

Mu tubaka, “Ya kieleka ve. Beno lenda ve.” Beno me mona?

164 Yandi tubaka, “Kufwa munu meso!” Yandi tubaka, “Kana kieleka nge kele na Mpeve-Santu, mutindu Paul,” yandi tubaka, “kufwa munu meso.”

165 Mu tubaka, “Wapi mutindu mu lenda sala yawu ntangu nge kele yimeni ya kufwa meso?” Mu tubaka, “Tata ya nge me kufwa meso ya nge na Kieleka.” Mu tubaka, “Nge, nge kele yimeni ya kufwa meso.”

166 Mpe yandi tubaka, “Mu ke kwikila ve; mu ke kipe ve yina nge lendaka sala, wapi mutindu beno lenda siamisa, to kima ya mutindu yina. Mu ke kwikila yawu kaka ve.”

167 Mu tubaka, “Ya kieleka. Ya vwandaka ve samu na bantu ya kukondwa lukwikilu. Ya vwandaka kaka samu na bakwikidi. Yawu yina.” Beno me mona?

168 Yinki ya vwandaka? Beno me mona, beno zaba kaka kuna, nsodolo kele na nsuka. Beno lutisa kaka ve ntangu na yawu, ata fyoti ve. Yesu salaka kima mutindu mosi, Yandi tubaka, “Beni bika bawu. Kana mpofo ke na kutwadisa mpofo, bawu nionso ke kubwa ve na dibulu?”

169 Kasi ntangu Yandi kwisaka na mwa kento ya kindumba, [Mpangi Branham me fina misapi ya yandi—Mu.] yawu bulaka tiya! Yinki ya vwandaka? Ya vwandaka nkuna yina ba soolaka yina vwandaka kuna, beno me mona, yina monaka Yawu kaka ntangu yayi. Ntangu Yawu kwizaka na Pierre, ya vwandaka na nkuna yina ba soolaka yina vwandaka kuna, beno me mona, mpe bawu monaka Yawu. “Mpe nionso yina Tata me pesa, me” (na ntangu me luta) “me pesa Munu, bawu ke kwiza. Bawu ke kwiza na Munu.” Oh, la la! Mu zola yawu! Yinga, tata. Beno tala, bakwikidi ke kwikilaka Yawu.

170 Bantu ya kukondwa lukwikilu lenda kwikila Yawu ve. Na yawu, ntangu yayi, kana muntu zola kuzonzila samu na nkuna ya nioka mpe nionso yina, mpe beno meka na kutalisa bawu, bawu ke kuwa Yawu ve; ke kwenda kaka. Beno bika kaka bawu. Beno me mona, Nzambi ke zonzila ve, to dyaka bana ya Yandi ke sala ve.

171 Beno tala, Nzambi kele nkama mosi na makumi yiya na yiya ya mafunda ya bantu ya kusolama Bazwife ke fukimina ve kibulu, kimvuka ya ba-denomination ya yandi, to biteki, to konso kima yina, ata ti yinsi ya bawu kele na ngwisani na yawu na ntangu yina. Israël kele na ngwisani, kasi awa kele nkama mpe makumi yiya na yiya ya funda yina ke sala yawu ve. Yina kele musolami.

172 Kima mosi ya kele kaka awa na kati ya Dibuundu ya Bantu ya makanda ntangu yayi, kele nkonga ya kusolama. Beno lenda benda bawu ve na mutindu ya bima yina. Bawu ke kwikila yawu ve. Ve, tata. Ntangu Nsemo mbala mosi me bula bawu, ya me sukisa dyambu kaka kuna. Bawu ke mona. . . ke mona yawu kusalama, na manima kumona yawu me siamisama mpe me talisama mutindu yina. Mpe bawu ke tala awa na kati ya Biblia, ke mona Ndinga yina ke kwenda kaka. Mbote, nge lenda kaka—nge lenda kaka na kutala na kati ya bawu, samu ti bawu ke kwikila Yawu. Kaka yina. Kaka yina. Ata ti bawu lenda tendula Yawu ve, kasi bawu zaba ti bawu kele na Yawu. Na yawu, mutindu mu ke tuba, ya kele na bima mingi mu lenda tendula ve, kasi mu—mu zaba ti ya kele kieleka na mutindu nionso. Uh-huh. Mbote mingi.

173 Ntangu yayi vwandaka na kati-kati ya Kidimbu ya Sambanu mpe ya Sambwadi, yina Yandi ke bokila bantu yayi, zonzaka na

nzila ya Yesu na Matthieu kapu 24 mpe na nzila ya 31, ti beto me tanga kaka, beno me mona. Bampungi awa, bambangi zole ya . . . Ntangu mpungi ke wakana, ya kele mpungi ya bambangi zole ya nsungi ya lemvo samu na ba-Juif. Mpungi mosi ke bula, beno tala, mpungi mosi ke bula. Yandi tubaka ti Yandi ke bula mpungi. Ntangu yayi beno tala awa, 31.

Mpe yandi ke fidisa bawanzio ya yandi (mosi ve, beno me mona; ya kele na zole ya bawu) na muningu ya nene ya mpungi, . . .

174 Yinki ya kele? Ntangu Nzambi ke kubamaka samu na kutuba, ya kele na muningu ya mpungi. Ya kele ntangu nionso Ndinga ya Yandi. Ya ke na kubokila mvita, beno me mona. Nzambi ke na kutuba. Bawanzio yayi ke basika na muningu ya mpungi.

175 Mpe beno me tala, na Nsangu ya wanzio ya nsuka, mpungi ke wakana. Nsangu ya wanzio ya ntete, muningu ya mpungi; ya wanzio ya zole, mpungi vwandaka bula, ntangu Yandi fidisaka yawu. Beno tala, kasi ntangu ba samunaka Bidimbu, yawu nionso vwandaka na kima mosi ya nene, ya Kinzambi, samu na kubokila nkonga ya bantu; ya vwandaka na mpungi mosi yina vwandaka bula, mpe Bidimbu Sambwadi vwandaka zibuka.

176 Beno tala, “Kuvukisa ba-Juif ya Yandi ya kusoola na bitini yiya ya mazulu.”

177 Yandi sonikaka Bidimbu sambanu, mutindu beto me mona, kasi Kidimbu ya Sambwadi ve. Yandi me tubaka ata kima mosi ve na kati awa samu na Kidimbu ya Sambwadi, kisika mosi ve.

178 Beno me mona, kaka ntama, na nzila ya 32, ke balula nzila, ya ntangu ya kubokila ba-Juif yina ba soolaka. Ntangu yayi beno tala mbote awa, beno me mona.

179 “Mpe Yandi ke fidisa bawanzio na mpungi, mpe ke vukisa Musolami na bansongi yiya ya mazulu.” Ntangu yayi Yandi ke banda . . .

180 Beno me mona, Yandi ke tuba kima mosi ve na yina me tala Kidimbu ya Sambwadi awa. Beno me mona? Yandi zonzaka na Kidimbu ya Sambanu; ya Ntete, ya Zole, ya Tatu, ya Yiya, ya Tanu, mpe ya Sambanu.

181 Kasi beno tala:

Ntangu yayi beno longuka kingana ya yinti ya fiki; Ntangu bintala ya yawu kele dyaka na lembami, mpe me basisa makasa, beno zaba ti été me belama:

Mutindu mosi beno, ntangu beno ke mona bima yayi nionso, beno zaba ti ya kele pene-pene, na kielo.

182 Ya nsuka yina, kyuvu yina bawu yufulaka Yandi, “Mpe yinki ke vwanda kidimbu ya nsuka ya yinza?”

183 “Ntangu beno ke mona ba-Juif yayi. . . Ntangu beno ke mona bima yankaka yayi kusalama, beno zaba yinki ke salama. Ntangu yayi, ntangu beno ke mona ba-Juif yayi. . .” Na kuzonzaka na ba-Juif! Ntangu yayi beno tala mbote. Wapi kompani Yandi ke na kuzonzaka, Bantu ya makanda? Ba-Juif! Ba-Juif! Beno me mona?

184 Ntangu yayi Yandi tubaka, “Ba ke yina Nge ke yina ya bayinsi nionso samu na Nkumbu ya Munu,” mpe nionso yina, mutindu.

185 Ntangu yayi, “Ntangu,” Yandi tubaka, “beno ke mona ba-Juif yayi kubanda na kubasisa makasa ya bawu kuna,” ntangu Israel ke banda na kuvutuka, na kukota na yinsi ya yandi. Ntangu yandi ke kuma kuna, (Dibuundu me kubama na Enlevement), ya kele kaka na bamvula tatu na ndambu yina me bikana tii nsuka ya yinza ya ntama, mpe yandi ke basika na poto-poto, mpe tala ke na kukwizaka Millenium, na ntoto ya malu-malu—ya malu-malu. Yandi tubaka, “Mpe na kielo!” Ntangu yayi, funda mosi ya bamvula na zulu ya ntoto kele kaka kilumbu mosi na Nzambi. Mpe bamvula tatu na ndambu, yinki ya ke kwenda? Ya ke na basekonde mingi, na ntangu ya Nzambi. Ya kele samu na yina Yandi tubaka, “Ya kele na kielo.”

Ya kieleka mu ke tuba na beno, ti, Nsungu yayi ke yokama ve, ya ke zimbana, bantu yayi, tii bima nyonso yayi kele. . .

186 Yinki, yinki ke zimbana ve? Ba me meka na kufwa ba-Juif, na ntoto, ntangu nionso. Ba ke vwanda ata fioti ve na kiyeka ya kusala yawu.

187 Kasi beno tala. Nsungu yina ya ba-Juif yina monaka kuvutuka ya bawu, na Palestine, nsungu yina ke mona bima yayi kusalama. Mpe kaka bamvula zole ya nsuka, yandi kumaka yinsi ya muvimba, na mbongo ya yandi mosi mpe nionso yina. Yawu yina.

188 Ntangu yayi wapi kisika beto kele, nkundi? Bidimbu mpe nyonso ke na kuzibulaka; ntangu yayi beto ke na kutala yayi na kati-kati awa. Yawu yina. Beno me mona kisika beto kele ya kuvwanda?

189 Mu banza ti beno ke bakula Yawu. Mu me longuka ve. Mu zaba yina mu ke tubila, kasi ntangu yankaka mu lendaka tendula ve—kutendula Yawu, samu na kutuba yawu na beno. Kasi mu ke na kivuvu ti Nzambi ke bakaka Bandinga yina kele ya kuvukisa, mpe ke kabula yawu kaka, beno me mona, mpe ke bika beno zaba yina Yawu kele. Samu ti, ya kele, beto kele na mwelo. Beto kele awa na ntangu. Ntangu yayi beno tala.

190 Beno me mona, kaka ntangu yayi, Yandi ke baluka na ba-Juif yayi, mpe na ntangu ya nsuka. Yandi ke tuba yina ke salama. Beto me zaba yawu ntangu yayi. . . Beto me zaba, beto me zaba yawu mbote, ti ba me kombula makanda. Bawu vwandaka,

bamvula funda mosi na bankama zole na tanu. Bawu pesaka profesi ti ba mwangisa yawu na mipepe yiya. Beno zaba yawu? Beto zaba yawu.

¹⁹¹ Na yina, beto fwana vutuka ve mpe kubaka yawu, kubaka yawu, samu mu kele na kima mosi awa ya mfunu mingi mu zola ti beno kumona, na ntete beno vwanda ya kulemba mingi, mpe mu me lemba mingi.

¹⁹² Beno tala. Beto zaba, mpe konso dikanda, landila bantangu ya makanda, to nyonso yina beno zola kubokila yawu, to na géologie, to bisika ya makanda, ba kele diaka ve kintwadi. Ba me mwangisa bawu, bisika nionso.

¹⁹³ Ba-Juif, ke na kuvukanaka na Jérusalem, kele ve . . . Bawu zaba mpe ve makanda ya bawu. Ba kele diaka ve na bendele ya makanda to nyonso yina. Nionso ba me zaba, na yina, ti ba kele ba-Juif. Ba pesaka profesi na kuvwanda mutindu yina, yinza ya muvimba. Ntangu yayi, babuku ya bawu me beba. Bawu zaba ve.

Beno ke tuba, “Wapi dikanda nge me katuka?”

“Mu zaba ve.”

“Wapi dikanda?”

“Mu zaba ve.”

¹⁹⁴ Mosi ya Benjamin, mosi ya *yayi*, mpe mosi ya *yina*. Ba me zaba ve kisika ba me katuka. Ba me bebisa babuku ya bawu, na bamvita, mpe bamvula makumi zole na tanu. Kima mosi kaka ba me zaba, ba kele ba-Juif. Yawu yina kaka. Na yina, ba me zaba ti ba me vutuka na yinsi ya bawu. Bawu dyaka . . . Beno tala, ata ti bawu zaba ve makanda ya bawu, kasi Nzambi zaba.

¹⁹⁵ Mu zola kaka yawu! Beno zaba, Yandi tubaka mpe ya kele . . . “Nsuki nyonso na zulu ya yintu ya nge kele ya kutanga.” Hum! Beno tala, Yandi ke zimbisa kima mosi ve. “Mu ke vumbula yawu diaka na kilumbu ya nsuka.”

¹⁹⁶ Kasi bawu me zimbisa babendele ya makanda ya bawu—bawu—bawu, mpe *nani* ya kele, mpe kana bawu kele *yayi* to *yina*; bawu zaba ve kana bawu kele ya Benjamin, to kana ti bawu kele ya Ruben, to—to ya Issacar, to kisika bawu kele. Kasi, na mutindu nyonso, Nzambi ke bokilaka bawu awa.

¹⁹⁷ Ntangu yayi beno tala, na Apocalypse 7, beto ke tanga yayi. “Funda kumi na zole” ya konso dikanda, ya kusolama, na nyonso ya yawu. Ya kele na mafunda kumi na zole ya konso dikanda, yina kele ya kusoola, mpe bawu kele kaka ya kuvwanda awa na ndonga. Oh, la la! Yinki bawu kele? Bawu kele na ndonga ya dikanda. Kasi, bawu kele ve ntangu yayi, kasi bawu ke vwanda. Bawu kele na ndonga ya makanda. Yinki ke vwanda na ntumunu ya dikanda? Ve Juif nyonso, ve. Kasi ya kele bayina ba soolaka, nkama na makumi yiya na yiya ya mafunda, ke vwanda na ndonga ya dikanda. Oh, la la!

198 Mutindu mu ke zola kulakisa beno! Beto ke kota ve na kati ya yawu. Kasi ya kele kieleka yina Dibuundu fwana vwanda, uhuh, kaka na ndonga.

199 Ntangu yayi mu zola ti beno tala mbote-mbote mpe beno tanga na munu, na mwa ntangu fioti. Ntangu yayi awa kele na kima yina mu banza ti beno me talaka ata fioti ve na lubokilu ya dikanda. Mu tubaka na beno, ntangu fyoti me luta, na kutanga Apocalypse 7. Beno tanga na munu, mpe beno tala mbote makanda yango. Na Apocalypse 7, Dan mpe Ephraïm kele kukondwa mpe ba tangaka yawu ve. Beno me tala yawu? Joseph mpe Levi vwandaka ya kutula na kisika ya bawu. Beno me tala yawu? Dan mpe Ephraïm kele kuna ve. Ve, tata. Kasi, Joseph mpe Levi vwandaka ya kutula na kisika ya—ya—ya Dan mpe Ephraïm.

200 Samu na yinki? Bawu . . . Nzambi ke bambuka moyo na konso nsilulu ya Ndinga ya Yandi. Oh, mu ke zola kulonga na zulu ya yawu. Beno me mona? Nzambi ke zimbana kima mosi ve, ata ti ya ke monana mutindu yina.

201 Mutindu Yandi tubaka na Moise. Israel vwandaka kuna, “bamvula nkama yiya.” Kasi bawu zolaka mata na ntangu yina. Yandi tubaka na Abraham, “Mpe nkuna ya yandi ke vwanda na yinsi ya nzenza bamvula nkama yiya, na yina Yandi ke basisa bawu na diboko ya ngolo.” Kasi na yina Yandi tubaka na Moise, “Mu me bambuka moyo na nsilulu ya Munu, mpe mu me kulumuka samu na kulungisa yina Mu me tuba.”

202 Nzambi ke zimbanaka ve. Yandi ke zimbanaka ve bansingulu ya Yandi, to dyaka Yandi ke zimbana balusakumunu ya Yandi. Kasi, konso nsilulu yina Yandi salaka, Yandi ke kangama na yawu.

203 Awa kele samu na yina bawu vwandaka kondwa, ntangu yayi, kana beno tala mbote. Ntangu yayi beno tanga. Mu zola ti beno tanga na munu ntangu yayi. Beno kwenda na Deutéronome, makumi zole na . . . na nzila ya 29 kuna, to kapu ya 29, mu zola tuba. Ya kele na kikuma samu na makanda yayi na kuvwandaka ve kuna. Nyonso kele na kikuma samu na yawu. Deutéronome, beto zola kubaka kapu ya 29 ya Deutéronome. Ntangu yayi, Mfumu na yawu sadisa beto, ti beto lenda bakula ntangu yayi. Ntangu yayi beto zola kubanda na Deutéronome, kapu ya 29, na nzila ya 16. Ntangu yayi beno kuwa. Moïse ke na kuzonzaka.

(Samu ti beno zaba mutindu beto me zinga na yinsi ya Egypte; mpe mutindu beto lutilaka na bayinsi yina beto lutaka;

Mpe beno me mona busafu, mpe biteki ya bawu, yinti . . . ditadi, mbongo . . . wolo, yina vwandaka na kati ya bawu:)

204 Muntu nyonso wandaka tambula na mwa kima mosi to yankaka, mwa kiteki ya Santu Cecile. Beno zaba, kima ya mutindu yina, beno me mona. “Na yina ti . . .” Beno kuwa.

Bika ti ya vwanda ve na kati-kati ya beno bakala, . . . kento, to dibuta, to dikanda, yina ntima ke manga bubu yayi na MFUMU Nzambi ya beto, samu na kukwenda mpe kusadila banzambi ya bayinsi yayi; bika ti ya vwanda ve na kati-kati ya beno nsimbulu yina ke basisa ndikila mpe absinthe;

Mpe ya ke salama, ti ntangu yandi ke kuwa bandinga ya kusinga yayi, ti yandi—ti yandi ke kukisakumuna yandi mosi na kati ya ntima ya yandi, mpe na kutubaka, mu . . . ke na ngemba, ata ti mu ke tambula na kati ya mabanza ya ntima ya munu mosi, . . .

205 Beno me mona, bantu ke tubaka, “Oh, yandi me sakumuna yandi mosi.” Beno zaba, kusala mwa kulunsi to kima mosi, mutindu bawu ke salaka ntangu yayi, beno me mona; kima mutindu mosi, beno me mona. Mpe beno ke mona ti ya kele nkadulu ya mimpani, beno me mona, ya kele mutindu mumpani.

. . . yandi ke kukisakumuna yandi mosi na ntima ya yandi mosi, . . . yandi mosi na dibanza ya yandi mosi, samu na kubwela kukola na mpwila:

206 “Beno kunwa kaka, yina ke sala luswaswanu mosi ve; ntangu nionso beno ke kwenda na yinzo-Nzambi, beno ke kuma mbote.”

Na yina MFUMU ke lemvokila yandi ve, kasi kuna nyanzi ya MFUMU . . . musoki ya yandi ke kubwa na zulu ya muntu yina, mpe ya bansingulu nyonso yina kele ya kusonama na kati ya buku yayi (“Beno katula ve Mpova mosi na Yawu, to kubwela mosi na Yawu,” beno me mona.) ke vwanda na zulu ya yandi, mpe MFUMU ke vwanza yandi . . . ke vwanza nkumbu ya yandi na yisi ya mazulu.

207 Ya kele na yina yandi kele awa na zulu ya ntoto, beno me mona, “na yisi ya mazulu.”

Mpe MFUMU ke kabula na yandi yimbi na makanda nyonso ya Israel, landila kusinga nyonso ya ngwisani yina kele ya kusonama na buku yayi ya musiku:

208 Na yawu, “Kana muntu ke sadila kiteki, to ke bumba kiteki na zulu ya yandi, to sakumuna yandi mosi na mabanza ya yandi mosi, mpe kusadila biteki,” Nzambi tubaka, “bakala, kento, dibuta, to dikanda, ba ke katula nkumbu ya yandi nyonso, na kati-kati ya bantu.” Ntangu yayi, ya kele kieleka? Wapi mutindu kieleka!

209 Kusambila biteki me sala kima mutindu mosi na dibuundu, bamvula me luta, mpe me sala bubu yayi. Mpe mu me tala . . . Beno tala mbote mutindu mbeni ya Klisto mekaka na

kusala kutambula ya ntama. Bantu yikwa zaba ti dyabulu ke fwanikisaka mpe ke bakaka kifwanikisu na manima—na manima ya basantu ya Nzambi?

²¹⁰ Yinki kele—yinki kele disumu? Ya kele kima ya mbote yina ba me bebisa. Yinki kele luvunu? Ya kele kieleka yina ba me lakisa na mutindu ya yimbi. Yinki kele pité? Ya kele kusalu ya kulunga, kima ya kulunga landila musiku, yina ba me sala yimbi. Beno me mona?

²¹¹ Ntangu yayi, na kumekaka na kusala yayi, “katula nkumbu,” beno talaka na nsungi ya dibuundu, kibulu mosi yina ke sadilaka biteki ya bantu ya kufwa, mpe nionso yina, mekaka na kutelemina Nkumbu ya Mfumu Yesu Klisto, mpe pesaka bisalu mutindu Tata, Mwana, mpe Mpeve-Santu. Kima mutindu mosi, na nsingulu na manima ya yawu, mutindu yina.

²¹² Dan mpe Ephraïm salaka kaka yawu, na yisi ya muntu ya luvunu ya ntinu na Israel, muntu ya luvunu, Jéroboam. Ntangu yayi, beno tala, na Ntete ya Rois na kapu 12. Mu zaba ti beto kele. . . Yayi, samu na munu, ya—ya—ya—ya kele na lufulu na yina beto lenda tala, yina beto ke mona. Ntete ya Rois, mu zola kwenda na kapu 12, na nzila ya 25 tii na nzila ya 30.

Na yina Jéroboam . . . Sichern na zulu ya mongo ya Ephraïm, mpe zingaka kuna; mpe kwendaka kuna na . . . mpe tungaka Penuel.

Mpe ntangu yayi Jéroboam tubaka na . . . na—na kati ya ntima ya yandi, (beno me mona, mabanza ya ntima ya yandi), Ntangu yayi kimfumu ke vutuka na yinzo ya David:

²¹³ Yandi vwandaka na boma, beno me mona, samu bantu lendaka kwenda.

Kana bantu yayi kukwenda na zulu na . . . munkayulu na yinzo ya MFUMU na Jérusalem, na yina ntima ya bantu yayi ke vutuka dyaka na mfumu, mpe na Rehoboam ntinu ya Juda, mpe bawu ke kufwa munu, mpe ke kwenda . . . samu na Rehoboam—Rehoboam ntinu ya Juda.

Wapi kisika ntinu me bokila, mpe me sala bana-bangombe zole ya wolo, mpe tubaka na bawu, Ya kele mpasi mingi samu na beno na kukwenda na Jérusalem: beno tala banzambi ya beno, O Israel, yina basisaka nge . . . na yinsi ya Egypte.

Mpe yandi tulaka mosi na Bethel, mpe tulaka yankaka yina na Dan.

Mpe kima yayi kumaka disumu: samu ti bantu kwendaka na kusambila na ntwala ya yina, mpe na Dan.

²¹⁴ Beno me mona, Ephraïm na Béthel, mpe Dan, mpe bawu tulaka biteki. Mpe bayayi kwendaka na kusambila yayi.

215 Mpe beto me kuma kisika yango, beto ke kota na nsungi ya Millenium, na kutala, mpe Nzambi ke bambuka kaka dyaka disumu yango. Ba me tanga bawu kuna ve. Hé! Nkembo! Kaka kieleka mutindu Yandi ke bambuka moyo na konso nsilulu ya mbote, Yandi ke bambuka moyo na konso mpeve ya yimbi, mpe. Beno bambuka kaka moyo, ntangu. . .

216 Ya kele samu na yina mu ke kwikilaka, bankundi ya munu, mu ke mekaka ntangu nyonso na kuvwanda na Ndinga yango, ata mutindu ngitukulu Yawu ke monana.

217 Beno me mona, ntangu yayi, ba lendaka ve kubanza samu na yawu kuna. Ba banzaka yawu ve na ntangu yina. Ba banzaka, “Mbote, ba me kangama na yawu.” Mbote mingi.

218 Kasi awa bawu kele kuna na nsungi ya Millenium yayi ke zola kubanda, ntangu bankumbu ya bawu mpe makanda ya bawu kele “ya kutelemina” na yawu, samu ti bawu vwandaka sadila kusambila ya biteki, ti Nzambi singaka.

219 Yandi tubaka ve ti Yandi “yinaka” ba-Nicolaïte mpe Jézabel yina? Beno vwanda ntama na yawu. Yandi tubaka ve ti Yandi ke kufwa bana ya bakento ya Jézabel na lufwa ya “lufwa,” yina kele kukabwana ya Kukonda nsuka na Mvwandulu ya Yandi? Beno tula kivuvu na yawu ve, ata fyoti ve. Beno kwenda ntama na yawu. Na yawu, Nzambi ke bambuka moyo. Beno tala.

220 Kasi beno me tala kuna, ya vwandaka samu na “kukatula menga”? Samu na yinki? Na yisi ya Mazulu ya vwandaka ve na Munkayulu na malu-malu yina zolaka pesa yandi Mpeve-Santu, samu na kubika yandi kumona bima yayi. Kasi yandi salaka yawu, na mutindu nyonso, na dibanza ya yandi mosi.

221 Kasi, Ezéchiél, na vision ya yandi, na Millenium, yandi ke mona dyaka bawu na mutindu ya kulunga. Ezéchiél, kana beno zola kutanga yawu. Beno sonika yawu kaka, mpe beno lenda tanga yawu, samu na kukeba ntangu. Ezéchiél 48:1 tii na 7, beno tanga mpe 23 na 29. Ezéchiél monaka kieleka konso dikanda kaka na ndonga. Mbote mingi.

222 Mpe, diaka, na Apocalypse 14, Jean monaka bawu diaka na ndonga ya dikanda, ya kele kieleka, konso dikanda na kisika ya yandi. Yinki kusalamaka?

223 Beno ke bambuka moyo, Yandi tubaka, “Na nsi ya mazulu, ti ba ke katula nkumbu ya yandi na ndonga ya bandinga.” Ntangu nyonso yina yandi vwandaka na yisi ya mazulu, ya ke vwanda dyaka ve. Mpe nkama na makumi yiya na yiya ya mafunda kele awa na lweka ya dikanda, dyaka. Kieleka. Kasi, beno me mona, bawu vwandaka ya kufwa meso. Bawu vwandaka kaka na minkayulu ya bangombe mpe bankombo. Beno me mona? Ntangu yayi beno tala, Yandi basisaka bawu, “na yisi ya mazulu.”

224 Kasi Bantu ya makanda, na bilumbu ya Mpeve-Santu, na kutelemina Yawu; ba katulaka nkumbu ya nge ya muvimba na Buku ya Luzingu, “mpe lendaka ata fioti ve kuzwa mulemvo, na yinza yayi to na yinza ke kwisa.” Ya kieleka? Na yina ya kele kisika beto me telama.

225 Israel, na nsi ya bankombo, mameme, bawu—bawu vwandaka na kisika mosi. Ntangu nyonso yina bawu vwandaka na zulu ya ntoto awa, makanda ya bawu vwandaka kondwa. Ba zolaka kota ata mbala mosi ve. Ntangu yayi, nyonso. . . Ntangu Yandi bokilaka bawu, kuna, nkama mpe makumi yiya na yiya ya mafunda, bawu vwandaka kondwa. Ya kele kieleka. Mpe ba kele ve ya kutanga na kati bawu. Mpe Joseph mpe Lévi kele ya kutula na kisika ya Dan mpe Ephraïm. Ntangu yayi beno lenda tala yawu. Kaka kuna ya kele, na ntwala ya beno, beno me mona. Mpe awa kele nsilulu ya Nzambi, kuna na manima, bankama mpe bankama ya bamvula na ntwala ya yawu.

226 Ntangu yayi, yinki kusalamaka? Ba vedisaka bawu na ntangu ya nsungi ya mpasi ya Lukwamusu.

227 Ntangu yayi, kana Nzambi ke vedisa mwense yina—yina, yina vwandaka kento ya mbote, kasi yandi kondwaka kaka na kuzwa mafuta na mwinda ya yandi, mpe Yandi ke sukula yandi na lukwamusu kuna na kati. Yandi ke tula makanda ya bawu mbala mosi na kati kuna, samu na kima mutindu mosi, mpe ke vedisa bawu na ntangu ya Lukwamusu. Samu ti, ya kele mvedolo. Ya kele lufundusu. Kasi, beno me mona, bawu, na manima. . . Mpe, beno tala awa, awa me basika nkama mpe makumi yiya na yiya ya mafunda, na manima ya mvedolo ya Israel. Mpe awa me kwiza mpe mwense ya kulala, me kwiza, ya kuvedila, mpe me kuzwa ba-robe ya mpembe. Beno me mona? Mutindu ya kele ya kulunga! Mutindu kitoko ya kele!

228 Kaka mutindu Jacob, na ntangu ya mpasi, beno me mona. Bawu. . . Jacob, na ntangu ya mpasi. Yandi salaka yimbi. Kasi yandi lutaka na ntangu ya mbote samu ti yandi salaka yimbi na mpangi ya yandi, Ésau. Beno me mona? Yandi vunaka, samu na kuzwa bukuluntu ya yandi. Kasi yandi lutaka na mvedolo na ntwala yandi kuzwa nkumbu ya yandi kusoba na Jacob na Israel, yina kele kifwani ya mutindu ya Nzambi, yina ba me fwanikisa bubu yayi.

229 Ntangu yayi, beto ke baka ntangu yayi nzila ya 8 ya, to, nzila ya 1te, mu zola kutuba, ya kapu ya 8; ya Apocalypse 8:1.

230 Mu zaba ti beno me lembe. Kasi, ntangu yayi, beno meka kaka na kuwa na mwa ntangu fioti ntangu yayi. Mpe, Nzambi ya Mazulu sadisa beto, ya kele kisambu ya munu.

231 Beto fwana bambuka moyo ti Kidimbu yayi ya Sambwadi kele nsuka ya ntangu, ya bima nionso. Ya kieleka. Bima yina ba sonikaka na kati ya Buku ya Bidimbu Sambwadi, yina ba kangaka, ya dikani ya mpulusu na ntwala ya mbandukulu ya

yinza, ya ke suka nionso. Ya kele nsuka; ya kele nsuka ya yinza yayi ke na kunwana. Ya kele nsuka ya yinza yayi ke na kunwana. Ya kele nsuka ya nyonso. Na kati kuna, ya kele nsuka ya Bampungu. Ya kele nsuka ya Bambungu. Ya kele nsuka ya ntoto. Ya kele . . . Ya kele mpe nsuka ya ntangu.

²³² Ntangu kele diaka ve. Biblia me tuba mutindu yina. Matthieu, kapu ya 7. . . Mu zola kutuba, Apocalypse, kapu ya 7 ya ka- . . . 10 mpe . . . mpe 1 tii na nzila ya 7. Ntangu ke basika. Wanzio tubaka, “Ntangu ke vwanda dyaka ve,” na yina ti, na bilumbu ya kima ya nene yayi ke salama.

²³³ Bima nionso me kuma na nsuka, na ntangu yayi, nsuka ya—ya. . . na nsuka ya Kidimbu yayi ya Sambwadi. Beno tala. Ya kele nsuka ya nsungi ya dibuundu. Ya kele nsuka ya Kidimbu ya Sambwadi. Ya kele nsuka ya Bampungu. Ya kele nsuka ya Bambungu, mpe nsuka ya beto mpe ke twadisa na Millenium. Ya kele na Kidimbu ya Sambwadi.

²³⁴ Ya kele kaka mutindu ba ke losaka fusée na mupepe. Mpe fusée ke pasuka *awa*, ya ke mata mpe ya ke pasuka dyaka. Ya ke basisa bambwetete tanu. Mosi ya bambwetete yango ke panzana mpe ke basisa bambwetete tanu na yawu; mpe dyaka mosi ya bambwetete yango ke pasuka mpe ke basisa bambwetete tanu na yawu. Beno me mona, ya ke landila mutindu yina tii ya ke zimvana.

²³⁵ Ya kele, yina, Kidimbu ya Sambwadi. Ya ke sukisa kaka ntangu samu na yinza. Ya ke sukisa ntangu samu na *yayi*. Ya ke sukisa ntangu samu na *yayi*. Ya ke sukisa ntangu samu na *yayi*. Ya ke sukisaka ntangu. Bima nionso sukaka kaka na Kidimbu yina ya Sambwadi.

²³⁶ Ntangu yayi, wapi mutindu Yandi ke sala yawu? Ya kele yina beto zaba ve. Mutindu yina ve? Beto zaba ve.

²³⁷ Ya kele mpe ntangu samu na bima nyonso yayi, mpe kukota na Millenium.

²³⁸ Beno tala, kuzibuka ya Kidimbu yayi vwandaka nene mingi, ti, Mazulu kumaka swi na nzila ya Yawu, “swi, kima mosi ve vwandaka ningana na kati-kati ya ngunga mosi.” Ntangu yayi, Yawu kele nene! Yinki Yawu kele? Yawu vwandaka swi, Mazulu. Kima mosi ve ninganaka, kati-kati ya ngunga mosi.

²³⁹ Ntangu yayi, kati-kati ya ngunga lendaka vwanda ntangu mingi ve kana beno ke kuzwa ntangu ya mbote. Kasi, na kati-kati ya lufwa mpe Luzingu, ya monanaka mutindu Millenium. Ya vwandaka nene mingi!

Yesu tubilaka Yawu ata mbala mosi ve. Ata mosi ve ya bawu yankaka.

²⁴⁰ Jean lendaka mpe ve kusonika na Yawu. Ve, ba yiminaka yandi na kusonika *awa*. Beno me mona, ya kele kaka . . . kaka . . . Yandi sonikaka Yawu ve, kasi yayi kele swi.

241 Mpe bakuluntu yiya mpe makumi zole yina telamaka na ntwala ya Nzambi, Kuna, ba ke na kubula na ba-harpe ya bawu; ba ke na kubika kubula ba-harpe ya bawu.

Bawanzio kangaka bankunga ya bawu, na Mazulu.

242 Beno banza! Ba-Chérubin mpe ba-Seraphin, yina Ésaïe kumonaka Yawu na tempelo, na ba-léolte. . . to tatu kele ya kuvwanda na mapapu. Tatu. . . Zole na zulu ya kizizi ya yandi, mpe zole na zulu ya makulu ya yandi, mpe ke pumbuka. Mpe yandi kele kilumbu mpe mpimpa, kuna, na ntwala ya Nzambi, na kuyimbaka, “Santu, santu, santu, kele Mfumu Nzambi ya Ngolo nyonso!” Mpe na yina bawu kotaka, to kotaka na tempelo, makunzi ya tempelo ninganaka, na mvwandulu ya bawu—ya bawu.

243 Mpe Ba-Séraphin yayi ya santu vwandaka swi. Bawanzio bikaka kuyimba. Uh-huh. Fiou! Ba vwandaka pumbuka na Mvwandulu ya Nzambi, ba vwandaka yimbila, “Santu, santu, santu,” Bawu kangaka yinwa. Ata Bawanzio ke yimba. Ata lukumu. Ata—ata lukutakanu na autel. Ata, kima mosi ve. Ya vwandaka swi; ya kotaka na kati ya swi, swi ya lufwa na Mazulu, miniti makumi tatu.

244 Basoda nionso ya Mazulu vwandaka swi samu na kati-kati ya ngunga yayi, ntangu dinsweki ya Kidimbu ya Sambwadi na kati ya Buku ya Mpulusu zibukaka. Beno banza na yawu. Kasi, Yawu me zibuka. Mwana-dimeme ke buka Yawu. Beno zaba yinki? Bawu vwandaka na boma ya ngolo ya Yawu, mu banza. Bawu zabaka ve; Yawu vwandaka kuna! Bawu telemaka kaka.

245 Samu na yinki? Yinki Yawu kele? Ntangu yayi, ata mosi ya beto zaba. Kasi, mu ke—mu ke tuba na beno, na luzayikisu ya munu—ya munu na Yawu.

246 Mpe, ntangu yayi, mu me tumama ve na kuvwanda fanatiki. Kana mu kele, mu me zaba yawu ve, beno me mona. Mu kele. . . Mu ke vwandaka ve na kikalulu ya kubendama na mambu ya luvunu mpe mambu ya mabanza.

247 Mu me tuba mwa bima, ya lendaka vwanza ya ngitukulu samu na bantu yankaka. Kasi ntangu Nzambi ke kwisa pene-pene, na manima ya Yawu, mpe ke siamisa Yawu mpe ke tuba ti Yawu kele Kieleka, na yina ya kele Ndinga ya Nzambi. Beno me mona? Ya lendaka monana ya ngitukulu, mutindu yina. Beno me mona?

248 Mpe ntangu yayi, mutindu mu me telama na estrade na nkokila yayi, mu vwandaka na luzayikisu yina me monisama pwelele. Ya kele na kati ya bima tatu. Yina mu ke tuba na beno, na lusalusu ya Nzambi, samu na dyambu mosi ya Yawu. Mpe kuna beno. . . Beto tala yawu, ntete. Awa kele luzayikisu, na kubanda yina mu zola kutuba na beno, yina Yawu kele. Yinki salamaka, ya kele. . . Banzasi Sambwadi yina yandi kuwaka

bansazi, mpe ba yiminaka yandi na kusonika; ya kele yina dinsweki kele, na manima ya Banzasi Sambwadi yina me basika.

²⁴⁹ Ntangu yayi, samu na yinki? Beto lakisa yawu. Samu na yinki? Ya kele dinsweki yina muntu ve zaba. Ba pekisaka Jean na kusonika na zulu ya Yawu, mpe—mpe kusonika kidimbu mosi samu na Yawu. Samu na yinki? Yayi kele samu na yinki ya vwandaka ve na kusalu na—na kimpika na Mazulu: ya lendaka pesa kinsweki. Beno me mona yawu ntangu yayi? [Dibuundu me tuba, “Amen.”—Mu.]

²⁵⁰ Kana Yawu kele nene mingi, Yawu fwana kota, samu ti Yawu fwana salama. Kasi ntangu Banzasi Sambwadi . . .

²⁵¹ Ntangu yayi beno tala. Ntangu Bawanzio sambwadi basikaka samu na kubula Bampungi ya bawu, ya vwandaka na nzasi mosi. [Mpangi Branham me konkota na chaire mbala mosi—Mu.] Ntangu Israel vwandaka ya kuvukana, ya vwandaka na mpungi. “Ntangu ntangu ke vwanza diaka ve,” mpungi ya nsuka, nzasi mosi.

²⁵² Kasi awa kele Banzasi Sambwadi, kaka na ndonga: mosi, zole, tatu, yiya, tanu, sambanu, sambwadi, lutangu ya kulunga. Banzasi Sambwadi na ndonga, me wakana, ve . . . ya ke kaka—kaka mosi, zole, tatu, yiya, tanu, sambanu, sambwadi, mbala mosi. [Mpangi Branham me konkota na chaire bambala sambwadi—Mu.] Na yina, Mazulu lendaka ve kusonika Yawu. Mazulu lenda zaba ve yina me tala Yawu, kima yankaka ve, samu ya kele na kima ve ya kukwenda na ntwala. Ya vwandaka ntangu ya kupema. Ya vwandaka nene mingi, ti, Yawu vwandaka ya kubumbama na Bawanzio.

²⁵³ Ntangu yayi, samu na yinki? Kana Satana lendaka simba Yawu, yandi lendaka sala kubeba ya nene. Ya kele na kima mosi yandi zaba ve. Ntangu yayi, yandi lenda tendula konso kima yina yandi zola, mpe kumekula konso dikabu yina, (Mu banza ti beno ke na kulongoka), kasi yandi lenda zaba Yayi ve. Ya kele mpe ve ya kusonama na kati ya Ndinga. Ya kele dinsweki ya muvimba.

²⁵⁴ Bawanzio, bima nionso, vwandaka swi. Kana ba ninganaka fioti, ya zolaka basisa kima mosi, na yina ba vwandaka kaka swi, yimeni, ba yambulaka na kubula harpe. Bima nionso kangamaka.

²⁵⁵ Sambwadi, lutangu ya kulunga ya Nzambi. Sambwadi, [Mpangi Branham me konkota na chaire bambala sambwadi—Mu.] kaka kuna na mulonga. Banzasi Sambwadi me wakana kaka kintwadi, mutindu bawu vwandaka ke tanguna kima mosi. Beno tala, na ntangu yina, Jean bandaka na kusonika Yawu. Yandi tubaka, “Kusonika Yawu ve.”

²⁵⁶ Yesu ata mbala mosi ve kuzonzaka na Yawu. Jean zolaka sonika Yawu ve. Bawanzio zaba kima ve na zulu ya Yawu. Yinki Yawu kele? Ya kele kima yina, Yesu tubaka, “Mpe Bawanzio ya Mazulu zabaka ve” kima na zulu ya Yawu. Beno me mona? Beno

me mona? Yandi zabaka Yawu ve, Yandi mosi. Yandi tubaka, “Nzambi kaka” lendaka zaba Yawu.

257 Kasi Yandi tubaka na beto, ntangu beto “ke banda na kumona bidimbu yayi kukwiza.” Ntangu yayi beno ke na kukuma kisika mosi? [Dibuundu me tuba, “Amen.”—Mu.] Mbote mingi. Beno tala, beto “bandaka na kumona bidimbu yayi kukwiza.” Beno me mona?

Kana Satana lendaka simba Yawu . . .

258 Kana beno zola kima kusalama . . . Ntangu yayi beno fwana baka ndinga ya munu samu na yayi. Kana mu ke na dikani ya kusala kima mosi, mu zaba mbote mingi kulutila kutuba yawu na muntu nionso. Muntu yina ve ke tuba yawu, kasi Satana ke kuwa yawu. Beno me mona? Yandi lenda ve kuzwa yawu, na kati ya ntima ya munu kuna, ntangu nyonso yina Nzambi kele na yawu ya kukangama na Mpeve-Santu, na yina ya kele kati-kati ya munu na Nzambi. Beno me mona? Yandi zaba kima mosi ve samu na yawu tii kuna beno ke zonza yawu, na yina yandi ke kuwa yawu. Mpe mu mekaka . . . Mu ke tuba na bantu ti mu ke sala kima *yayi-mpe-yayi*, mpe beno tala mbote dyabulu kuzenga konso pine yina yandi lenda, samu na kukuma kuna, beno me mona, samu na kubula munu na yawu. Kasi kana mu kuzwa luzayikisu ya Nzambi, mpe kutuba kaka kima ve na zulu ya yawu, kuna ya kele mutindu yankaka.

259 Beno bambuka moyo, Satana ke meka na kumekula. Yandi ke meka na kumekula konso kima yina Dibuundu ke sala. Yandi me meka na kusala yawu. Beto me tala yawu, na nzila ya mbeni ya Klisto.

260 Kasi yayi kele kima mosi yina yandi lenda mekula ve. Ya ke vwanda ve na kima ya mbote samu na yayi, beno me mona, samu yandi zaba Yawu ve. Ya kele ve na mutindu samu na yandi na kuzaba Yawu. Ya kele Kubenda ya Tatu. Yandi zaba kaka kima ve na zulu ya Yawu. Beno me mona? Yandi ke bakula Yawu ve.

261 Kasi ya kele na dinsweki ya kuvwanda na yisi ya Yawu! Nkembo na Nzambi na Mazulu! Mu lenda banza ata fioti ve mutindu mosi, luzingu ya munu nionso, ntangu mu monaka. Ntangu yayi, mu zaba ve yinki . . . Mu zaba kitini yina ke landa kuna, kasi mu zaba ve yinki, yinki mutindu kutendula yawu. Ya ke vwanda ntangu ya yinda ve. Mu me sonika yawu awa, ntangu ya salamaka, kana beno lenda mona awa, “Telema. Kwenda ntama ve kulutila yayi awa.” Mu me tumama ve na kuvwanda fanatiki. Mu ke na kutuba kaka Kieleka.

262 Kasi beno ke bambuka moyo na mwa sapatu yina, yina mu ke mekaka ntangu nionso na kutendula ti moyo yina kele vwanda na lweka *yayi mpe yina*, mpe konsiansi ya kati, mpe bima nyonso ya mutindu yina? Na yina, ya salaka kaka nkonga ya nene ya bamekudi kubanda na manima ya yawu. Wapi mutindu bawu fwana telemisa diboko, mpe kusimba bantu, mpe kuvwanda na

kuningana? Muntu nionso wwandaka vwanda na kuningana na maboko ya bawu.

263 Kasi beno ke bambuka moyo, ntangu Yandi nataka munu kuna, mpe tubaka, “Yayi kele Kubenda ya Tatu yina, mpe muntu mosi ve ke zaba Yawu.” Beno ke bambuka moyo na yawu? [Dibuundu me tuba, “Amen.”—Mu.] Ba-vision ke kondwaka ata fioti ve. Ya kele kieleka ya kulunga.

264 Ntangu yayi beno tala. Beno bambuka moyo na vision ya kimvuka ya bambwetete? Charlie, mu . . . Yawu yayi.

265 Kima mosi ke salama, mu tubaka na beno, sabala yayi, ti beno . . . Ya me vwanda pene-pene ya beno, kasi mu ke kukiyufula kana beno me bakula yawu.

266 Beno bambuka moyo na kuvukana, ya vision ya Bawanzio, ntangu mu katukaka awa samu na kukwenda na Arizona? [Dibuundu me tuba, “Amen.”—Mu.] Beno ke bambuka moyo na *Wapi Ngunga Ya Me Kuma, Batata?* [“Amen.”] Beno ke bambuka moyo na yawu? Beno tala, ya wwandaka kaka na kuningana mosi ya nene ya nzasi, mpe Bawanzio sambwadi monikaka. Ya kieleka? [“Amen.”] Mosi bikanaka ya nzasi, Bawanzio sambwadi monikaka.

Mpe mu monaka Mwana-dimeme ntangu yandi zibulaka kidimbu ya ntete, mpe mu kuwaka, mutindu yawu wwandaka ndinga ya nzasi, mpe mosi ya bivangu yiya tubaka, Kwisa mpe tala.

267 Beno tala, nzasi mosi, Bansangu Sambwadi yina ba tulaka kidimbu mpe yina ba lenda monikisa ve tii kilumbu ya nsuka, ya nsungi yayi. Beno me mona yina mu zola tuba?

268 Ntangu yayi, beno me tala kitini ya mansweki ya sabala yayi? Ya kele yina Yawu kele. Ya kele yina Yawu wwandaka. Ya wwandaka ve muntu, muntu, ya wwandaka Bawanzio ya Mfumu.

269 Beno tala, ya kele na bambangi tatu, bambangi, yina kele ya kuvwanda awa, ti sabala mosi me luta, kulutila sabala mosi me luta, Mu wwandaka kuna na zulu, kuna na miongo, pene ya Mexique, na bampangi zole yina me vwanda awa. Mu wwandaka katula manama, to manama, na dikulu ya pantalon ya munu; mpe kupasuka wakanaka, na kutala, ya wwandaka mutindu, ningisaka myongo. Ntangu yayi, ya kele kieleka. Mu me tubaka ata fioti ve na bampangi ya munu, kasi bawu me mona luswaswanu.

270 Mpe Yandi tubaka na munu, “Ntangu yayi beno kubama. Beno kwenda na este. Tala ntendulu ya vision yina.” Beno me mona? Ntangu yayi, samu na kuzabisa beno, Mpangi Sothmann kele ve na nsaka yina yandi kwendaka kusosa. Beto wwandaka meka na kubaka yawu samu na yandi. Mpe Yandi tubaka, “Ntangu yayi, na nkokila yayi, samu na kidimbu samu na nge, yandi ke sala yawu ve. Nge fwana kukipesa nge mosi na ntangu

yayi samu na kotalana ya Bawanzio yayi.” Mpe mu kuwaka mutindu munu mosi, beno ke bambuka moyo.

271 Mpe mu vwandaka na wesete. Bawanzio vwandaka kwiza na esete. Mpe na yina bawu kwizaka, mu bakakamaka na bawu, (beno ke bambuka moyo na yawu?) na kukwizaka na esete.

272 Mpe Mpangi Fred, na kati awa na nkokila yayi, kele mbangi, mpe Mpangi Norman. Mutindu beto kwendaka, mu mekaka kaka na kundimisa bakala yayi na kubikana samu na kuzwa kitwisi ya yandi. Ya kele kieleka, Mpangi Sothmann? [Mpangi Fred Sothmann me tuba, “Amen.”—Mu.] Yinga, kuna, me telama kaka kuna. Mu me ndimisama; kasi, na yina, Yandi tubaka, “Yandi ke sala yawu ve.” Mu me tubaka ata kima mosi ve; mu kwendaka na ntuala.

273 Kima mosi, yina me vwanda pene-pene ya tenta, kilumbu yina . . . Nge ke bambuka moyo, Mpangi Sothmann. Mpe munu, kaka na ntangu bima yankaka kutubamaka na ntuala, ti mu tulaka nge na Mpangi ya bakala Norman . . . Wapi kisika Mpangi ya bakala Norman kele? Na manima kuna. Yandi zengaka bawu na yisi ya ndefi, ti bawu zolaka tuba ve yina vwandaka salama. Ya kieleka? [Bampangi me tuba, “Amen. Ya kieleka.”—Mu.] Mu balukaka mpe mu vwandaka kwenda ntama ya tenta yina, mutindu *yayi*? Ya kieleka? [“Ya kieleka.”]

274 Samu ti, yayi kele yina ya vwandaka, kieleka yina ya vwandaka, mpe na kuzabaka ti mu lendaka tuba yawu ve tii ya ke salama, kumona kana bantu ke bakula yawu.

275 Mpe beno me tala? “Wanzio mosi yango,” mu tubaka, “na kati kuna, vwandaka Wanzio ya ngitukulu.” Yandi vwandaka tala mingi na munu kulutula bayankaka nionso. Beno ke bambuka moyo na yawu? [Dibuundu me tuba, “Amen.”—Mu.] Ba vwandaka na kati ya kuvukana; tatu na lweka mosi, mpe mosi na zulu. Mpe yina mosi ke landa na lweka ya munu awa, na kutangaka kubanda diboko ya kikento tii na diboko ya kibakala, zolaka vwanda Wanzio ya sambwadi. Yandi vwandaka lezima, ya zolaka tuba mingi samu na munu kulutula bayankaka ya Bawu. Beno ke bambuka moyo? Mu tubaka, “Yandi vwandaka na ntulu ya Yandi ya kuvimba, mutindu *yayi*, mpe vwandaka kwenda na esete” (beno ke bambuka moyo) “mutindu yina.” Mu tubaka, “Ya zangulaka munu; zangulaka munu.” Beno ke bambuka moyo na yawu? [“Amen.”]

276 Yawu yayi, yina na Kidimbu ya Sambwadi, kima yina mu vwandaka kukiyufula luzingu ya munu nionso. Amen! Bidimbu yankaka yina zolaka tuba mingi samu na munu, ya kieleka, kasi, oh, beno zaba ve yina Yayi zolaka kutuba, samu na mbala mosi na luzingu!

277 Mu sambilaka, mu bokaka na Nzambi. Mu—mu—mu . . . Na manima ya lukutakanu ya Phoenix . . . Bantu nionso, kuna na munu, zaba. Mu bikanaka kuna na myongo.

278 Na suka mosi, mu sikamaka mpe kwendaka na Canyon Sabino, myongo yina ya nene, ya ngolo, ya zulu. Mpe mu kwendaka kuna. Mpe ya kele na mwa nzila ya makulu, na manima beno me katuka, beno kwenda na Mongo Lemmon, yina kele bametele makumi yina na nana na kutambula, pene ya bametele yivwa na mvula ya mpembe kuna. Na yawu, kuna na zulu ya mongo, na suka-suka na ntwala ya kilumbu, na kumataka na nzila ya mwa nzila ya makulu yayi, na kutambulaka na zulu ya matadi. Mu twadisamaka na kubaluka na lweka *yayi*. Mpe mu balukaka, mpe mu mataka na matadi mosi ya nene, ya nene, oh, la la, bankama ya bametele mingi na zulu.

279 Mpe mu fukamaka na kati-kati ya matadi yina. Mu tulaka na yisi Biblia *yayi*, mpe mu tulaka na yisi mwa buku yayi. . . mwa buku *yayi* ya fioti. Mu tubaka, “Mfumu Nzambi, yinki vision yayi zola kutuba? Mu—mu kele—mu kele. . .” Mu tubaka, “Mfumu, ya. . . Ya zola tuba ti lufwa ya munu?”

280 Beno ke bambuka moyo, mu tubaka na beno, “Mu banzaka ti ya lendaka vwanda samu na lufwa ya munu, samu ti kima mosi me pasuka tii ya me ningisa kaka munu na bitini-bitini.” Beno ke bambuka moyo na yawu. Bantu yikwa zaba yawu, me kuwaka yawu? [Dibuundu me tuba, “Amen.”—Mu.] Kasi, ya kieleka, beno me mona, beno nionso. Mpe mu banzaka ti ya lendaka tuba lufwa ya munu.

281 Mpe kuna na kati ya kivinga, mu tubaka, “Ya vwandaka. . . Yinki—yinki—yinki ya vwandaka, Mfumu? Yinki—yinki ya zola kutuba? Ya zola kutuba ti mu ke kufwa? Kana ya kele, mbote mingi, mu ke tuba ve na dibuta ya munu. Bika mu landila kaka, beno me mona, kana kisalu ya munu me suka.” Mpe mu tubaka. . .

282 Ntangu yayi, yinki ya vwandaka? Kasi Yandi fidisaka mhangi mosi, beno ke bambuka moyo ti mu tubaka na beno, ti ya vwandaka yawu ve. Ya vwandaka kukwenda na ntwala ya kisalu ya munu. Oh, oh, oh! Beno me bakula yawu?

283 Beno me mona, mpe ya kuvwanda na Canyon Sabino, Tata ya Mazulu zaba yayi, kaka kieleka mutindu beno ke mona yawu kusalama, Bawanzio yango kulumukaka kaka mpe siamisaka Nsangu nyonso kele mutindu mosi. Na yina, beno zaba kana Yawu me katuka na Nzambi, to ve. Yawu tubamaka na ntwala, beno, na nzila ya vision. Mu lendaka tuba na beno ve tii balukutakanu ya nsuka, samu ba yiminaka munu yandi.

284 Na Sabino Canyon, yina vwandaka kuna na suka yina, mu tulaka maboko ya munu na zulu. Mpe ya munu. . . Mupepe me fula yimpu ya munu ya ndombe. Ntangu. . . Mu vwandaka ya kutelama kuna, na maboko ya munu na zulu, mu vwandaka sambila. Mu tubaka, “Mfumu Nzambi, yinki yayi zola kutuba? Mu lenda bakula yawu ve, Mfumu. Yinki mu ke sala? Kana ya

kele ntangu ya munu ya kukwenda na Yinzo, ti mu mata awa, ya kele kisika ba ke tala munu ata fioti ve. Mu zola ve muntu kudila, kana mu ke na kwenda. Mu—mu zola ti dibuta kubanza ti mu me tambula kaka. Mpe ba ke mona munu ve. Bumba munu kisika mosi. Kana mu ke kwenda, mbote, bika mu kwenda. Ya lendaka vwanda ti Joseph ke tala Biblia ya munu ya kuvwanda awa, kilumbu mosi, mpe ti yandi sadila Yawu. Beno me mona, kana mu kwenda, ti mu kwenda, Mfumu.” Mpe mu vwandaka na maboko ya munu na zulu. Mpe, na mbala mosi, kima mosi simbaka diboko ya munu.

²⁸⁵ Mu zaba ve. Mu lenda tuba ve. Mu me kwenda kulala? Mu zaba ve. To mu kotaka na transe? Mu zaba ve. Ya vwandaka vision? Mu lenda tuba na beno ve. Kima kaka mu lenda tuba kele yina mu. . . Kaka kima mutindu mosi mutindu Bawanzio yina vwandaka!

²⁸⁶ Mpe yawu simbaka diboko ya munu. Mpe mu talaka, mpe yawu vwandaka mbele. Mpe ya vwandaka na misanga ya ntalu, ya kieleka; mpe ya vwandaka na mukengi na zulu ya yawu, na wolo. Mpe lutebo vwandaka mutindu ya kolome, mutindu palata, kaka ya vwandaka lezima mingi. Mpe yawu vwandaka na mansala mingi, oh, la la! Mpe mu banzaka, “Yina ke kima ya kitoko mingi ve!” Ya me lunga kaka na diboko ya munu! Mu banzaka, “Ya kele kitoko mingi. Kasi,” mu tubaka, “hé, mu ke vwandaka ntangu nionso na boma ya bima yina, mbele.” Mu banzaka, “Yinki mu ke sala na yawu?”

²⁸⁷ Mpe kaka na ntangu yina Ndinga mosi ningisaka na kati kuna, matadi ninganaka. Yandi tubaka, “Ya kele Mbele ya Ntinu!” Mpe na yina mu basikaka na yawu.

²⁸⁸ “Mbele ya Ntinu.” Ntangu yayi, kana Yawu me tuba, “Mbele ya ntinu. . .” Kasi Yawu me tuba, “Mbele ya Ntinu.” Mpe ya kele kaka na mosi “Ntinu,” mpe ya kele Nzambi. Mpe Yandi kele na Mbele mosi, ya kele Ndinga ya Yandi, yina mu me zingila. Ti, na yawu sadisa munu, Nzambi; mu me telama na zulu ya chaire ya Yandi ya santu awa, na Ndinga yayi ya santu me vwanda awa! Ya kele Ndinga! Amen! Oh, wapi kilumbu beto ke na kuzinga! Wapi kima ya nene! Beno me mona mansweki mpe kinsweki? Ya Tatu. . .

²⁸⁹ Mu vwandaka ya kutelama kuna ntangu yayi me bika munu, Kima mosi kwisaka na munu mpe tubaka, “Kubanga ve.” Ntangu yayi, mu kuwaka ata ndinga. Mutindu na kati ya munu, tubaka. Mu fwana tuba kaka na beno kieleka, kaka kieleka yina salamaka. Kima mosi kotaka, mpe tubaka, “Kubanga ve. Yayi ke Kubenda ya Tatu.”

²⁹⁰ Kubenda ya Tatu! Beno ke bambuka moyo na Yawu? [Dibuundu me tuba, “Amen.”—Mu.] Yandi tubaka, “Nge me kuzwa bantu ya bilanda-landa mingi na yayi, yina nge me meka na kutendula. Kasi,” yandi tubaka, “kumeka ve, Yayi.” Beno ke

bambuka moyo na yawu? Bantu yikwa ke bambuka moyo na vision yina? ["Amen."] Mbote, ya kele bisika nyonso. Ba ke na kubaka yawu na bande, mpe bisika nyonso. Ya me vwanda pene ya bamvula sambanu me luta, bamvula sambwadi me luta. Ya me luta bamvula sambwadi. Yandi tubaka, "Kumeka ve kutendula Yawu." Yandi tubaka, "Yayi kele Kubenda ya Tatu, kasi mu ke kutana na nge na kati kuna." Ya kieleka? ["Amen."] Yandi tubaka, "Kumeka ve. . ."

²⁹¹ Mu vwandaka ya kutelama na mwa sapatu ya bébé, ntangu Yandi tubaka na munu. Yandi tubaka, "Ntangu yayi sala Kubenda ya Nge ya Ntete. Mpe ntangu nge ke sala yawu, mbisi ke kwenda na manima ya mpambu." Yandi tubaka, "Na yina beno tala mbote Kubenda ya beno ya Zole," yandi tubaka, "samu ti Yawu ke vwanda kaka mbisi ya fyoti." Yandi tubaka, "Na yina Kubenda ya Tatu ke kuzwa yawu."

²⁹² Mpe balongi nionso yina vwandaka pene-pene ya munu, bawu tubaka, "Mpangi Branham, beto zaba ti nge lenda sala yawu! Alleluia! Mpangi Branham!" Ya kele kisika mu ke vwandaka ntangu nyonso ya kukangama, na nkonga ya milongi. Beno me mona? Mu zola bantu. Ba zola ti beno tendula nionso, *yayi, yina*.

²⁹³ Mpe mu tubaka, "Mbote, uh, uh, uh," mu tubaka, "Mu zaba ve." Mu tubaka, "Mu me bakula kuloba mbisi. Ntangu yayi," mu tubaka, "ntangu yayi, kima ya ntete beno ke sala. . . Yawu yayi mutindu ya kusala. Beno ke mona bambisi nionso pene-pene ya yawu; beno fwana kuningisa mpambu." Mbote, ya kieleka ya kele batatiki ya kuloba mbisi. Na yawu mu tubaka, "Benda na mbala mosi mpambu yina. Ntangu yayi, beno me mona, ntangu mu ke benda na mbala mosi mpambu, mbala ya ntete, ntangu yayi mbisi ke baka yawu na manima ya yawu." Kasi ba vwandaka bana ya fioti. Mpe ya kele kaka mutindu ba vwandaka kanga bawu.

²⁹⁴ Na yawu kuna mu—mu tubaka, "Na yina nge ke—nge ke vwanda. . ." Mpe mu me benda yawu, na lweka. Mpe mu vwandaka na mbisi, kasi ya monanaka mutindu mpusu na zulu ya mpambu ya vwandaka kaka. . . yandi vwandaka kulutila fioti.

²⁹⁵ Mpe kuna mu vwandaka ya kutelama kuna, mpe Kima mosi tubaka, "Mu tubaka na nge na kusala yawu ve!"

²⁹⁶ Mu bandaka na kudila. Banzila nionso vwandaka ya kuningana pene-pene ya munu, mutindu *yayi*. Mpe mu vwandaka. . . mu vwandaka ya kutelama kuna, ke dila, na yintu ya munu ya kukulumusa mutindu *yina*. Mu tubaka, "Nzambi! Oh, mu. . . Lemvokila munu! Mu—mu kele muntu ya buzoba. Mfumu, ve. . . Lemvokila munu." Mpe mu—mu vwandaka na nzila yayi.

²⁹⁷ Mpe yina, yina mu vwandaka na yawu na diboko ya munu, vwandaka mwa sapatu ya bébé, ya yinda mutindu yayi. Mpe mu vwandaka na nsinga yango, ya vwandaka fioti nene mutindu musapi ya munu, pene ya centimetre mosi, mutindu yayi. Mpe disu na sapatu yayi vwandaka kaka pene ya kitezo ya . . . fioti mingi kulutila millimetre mosi na ndambu, mu banza, na kitini ya fioti, na kati ya disu. Mpe mu vwandaka meka na kukotisa lacet na mwa sapatu yayi, na nsinga yayi ya ba-centimetre zole na ndambu. Huh!

²⁹⁸ Ndinga mosi basikaka, tubaka, “Nge lenda longa ve ba-bébé ya ba-Pentecotiste bima ya kimpeve.” Yandi tubaka, “Ntangu yayi, bika bawu swi!”

²⁹⁹ Mpe kaka na ntangu yina Yandi zangulaka munu. Yandi nataka munu, mpe nataka munu na zulu, kisika lukutakanu mosi vwandaka salama. Ya ke talana mutindu tenta to cathédrale, na mutindu mosi. Mpe mu talaka, mpe ya vwandaka na mwa sanduku mosi, mutindu, mwa kisika mosi na lweka. Mpe mu monaka ti Nsemo yina vwandaka tuba na muntu mosi, na zulu ya munu, Nsemo yina beno ke mona kuna na foto. Yawu me basika na munu, mutindu *yayi*, mpe me kwenda na tenta yina. Mpe yandi tubaka, “Mu ke kutana na nge kuna.” Mpe yandi tubaka, “Yayi ke vwanda Kubenda ya Tatu, mpe nge ke tuba na Yawu na muntu ve.”

Mpe na Sabino Canyon, Yandi tubaka, “Yayi kele Kubenda ya Tatu.”

³⁰⁰ Mpe ya kele na bima tatu ya nene yina ke kwendaka na Yawu. Mpe mosi yina me monisama pwelele bubu yayi, to, mazono; yankaka yina me monisama pwelele bubu yayi; mpe ya kele na kima mosi yina mu lenda tendula ve, samu ti ya kele na ndinga ya kuzabana ve. Kasi mu me telama kaka kuna mpe me tala kaka mbala mosi na Yawu. Mpe yayi kele Kubenda ya Tatu yina ke na kwiza. Mpe Mpeve-Santu ya Nzambi . . . Oh, la la!

Ya kele samu na yina Mazulu nyonso vwandaka swi.

³⁰¹ Ntangu yayi, mu—mu ke sala mbote na kutelama kaka awa, beno me mona. Mu kaka—mu ke tala kaka, mu ke tuba dyaka ve yina me tala Yawu. Beno me mona?

³⁰² Na yawu, beno bambuka kaka moyo, na Kidimbu ya Sambwadi, ya kele samu na yina Yawu zibukaka ve. Beno me mona, ya kele samu na yina Yawu monikisaka Yawu ve, muntu mosi ve zolaka zaba Yawu.

³⁰³ Mpe mu zola ti beno zaba, na ntwala mu zaba Ndinga mosi samu na Yawu, vision yina kwisaka bamvula me luta. Beno ke bambuka moyo na yawu? [Dibuundu me tuba, “Amen.”—Mu.] Mpe awa Yawu kele, kaka mutindu yankaka yayi kele, ke na kutambula kaka mbala mosi na kati ya Ndinga kieleka kisika Yawu vwandaka. Mpe Nzambi zaba ntima ya munu, mu me banzaka ata fioti ve kima ya mutindu yina, mpe awa Yawu

vwandaka. Ntangu me luta ti beto ke banza yawu ve. Uh-huh. Oh, la la!

³⁰⁴ Yina ke lakisa ti Yawu keke ya Nzambi, samu ti, beno me mona, Yawu kieleka ya kulunga na bansilulu ya Nzambi, kubanda nsuka ya Nsangu. Beno tala. Beno tala ntangu yayi, samu na Nsangu ya ntangu ya nsuka, Kidimbu yayi. Na manima ya nyonso, Yandi—Yandi me monikisa Bidimbu nyonso sambanu, kasi Yandi ke tuba kima ve na zulu ya Sambwadi. Mpe Kidimbu ya ntangu ya nsuka, ntangu Yawu ke banda, ya ke vwanda kieleka kinsweki ya muvimba, landila Biblia, na ntuala ya kuzaba Yawu. Mpe beno bambuka moyo, Apocalypse 10:1-7, 1 tii 7, kapu 10:1 tii 7, “Na nsuka ya Nsangu ya wanzio ya sambwadi, mansweki nyonso ya Nzambi ke zabana.” Beto keke na ntangu ya nsuka, kuzibuka ya Kidimbu ya Sambwadi.

³⁰⁵ Ntangu yayi, wapi mutindu mu me zaba? Kilumbu yina, Lumingu me luta, sabala mosi me luta bubu yayi, ntangu mu vwandaka longa na zulu ya “Beno vwanda ya kukikulumusa! Beno vwanda ya kukikulumusa! Beno bambuka moyo, Nzambi ke salaka na bima ya fioti.” Mu zabaka ve yina kieleka ya vwandaka zonzila. Mpe ntangu yayi mu ke mona yawu. Ya keke na mutindu mosi ya kukikulumusa! Beno ke banza ti kima ya mutindu yina ke monisama na Vatican to. . . Kasi Ya ke kaka mutindu Jean Baptiste. Ya ke kwisa mutindu mbutukulu ya Mfumu ya beto, na kati ya kidikilu. Nkembo na Nzambi! Na yawu sadisa munu, ngunga me kuma pene-pene! Amen! Beto keke awa. Oh, la la!

³⁰⁶ Ntangu yayi beno me mona yawu, Kieleka ya vision ya Nzambi, Bawanzio sambwadi ke nata munu na weste? Ba katukaka na wesete, na kuvutukaka na esete, na kunataka awa samu na Nsangu yayi na nkokila yayi. Oh, la la!

³⁰⁷ Ntangu yayi, Ndinga ya nzasi yina ya nene, mpe kisalu yina salamaka awa, me monisama pwelele, ti Yawu. . . mpe me lakisa ti Yawu vwandaka ya Nzambi. Beno banza kaka ntangu yayi. Mu zabaka ve Bidimbu yayi, mpe ba monisaka yawu sabala yayi. Ya keke na muntu yina ke banzaka na yawu, na Bawanzio sambwadi yina vwandaka Yayi, na kuvwandaka Nsangu yina vwandaka basika, Bawanzio yango vutulaka munu awa samu na Yawu? Beno me mona?

³⁰⁸ Beno bambuka moyo, Munati-nsangu ya sambwadi vwandaka. . . Minati-nsangu sambwadi vwandaka. . . Yandi yina Mosi samu na munu, Wanzio ya sambwadi, Yawu monanaka mingi samu na munu kulutila nionso yina. Ntangu yayi, beno me mona, bawu vwandaka ya kutelama mutindu *yayi*. Ntangu yayi, beto zola kaka beno kutala. Mpe mu vwandaka ya kutelama *awa*, mpe mu vwandaka tala mbote bayankaka yina. . .

³⁰⁹ Beno me mona, nkonga mosi, ya ntete, ya bandeke ya fyoti, mapapu nyonso vwandaka kubwa. Beno ke bambuka

moyo na yawu? Mpe bawu nyonso kwendaka na esete. Mpe nkonga ya zole, vwandaka lezima mingi, bandeke ya nene mingi, ya vwandaka mutindu bayembe, mapapu ya bansongi. Ba vwandaka pumbuka na esete. Kubenda ya Ntete, Kubenda ya Zole, na manima yina vwandaka Bawanzio yina vwandaka landa. Mpe mutindu. . .

³¹⁰ Mu vwandaka ya kutelama kaka kuna, mpe kupasuka yayi me suka. Mpe mu vwandaka tala na lweka *yayi*, kuna na weste, mpe Bawu kwisaka mpe bakaka munu kaka, na kati ya Kuna. Mu me basika mbala mosi na luzabu ya munu. Mpe mosi ya Bawu, vwandaka kwiza, vwandaka Yandi yina vwandaka talana ya ngitukulu mingi samu na munu, vwandaka Yandi yina na ya munu. . . Ya ke vwanda na diboko ya kikento, kisika mu kotaka na kimvuka ya bambwetete. Kasi na kutangaka na diboko ya kikento na diboko ya kibakala, ya zolaka vwanda Wanzio ya sambwadi, beno me mona, yina vwandaka luta. Ntangu yayi, beno bambuka moyo, Minati-nsangu sambwadi.

³¹¹ Beno ke bambuka moyo na pyramide ya Ditadi ya mpembe, ya ndosi ya Junior Jackson yina mu me tendulaka samu na beno? [Dibuundu me tuba, “Amen.”—Mu.] Beno me mona? Beno tala, nkokila yina mu kwendaka, mpe mu. . . Ya vwandaka na bandosi sambanu yina kwizaka, mpe mosi na mosi ya bawu mbala mosi na kima mutindu mosi. Na yina vision bandaka, mpe fidisaka munu wesete. Mpe, Junior, yandi vwandaka tala mbote na mwa ntangu. . . Beno tala. Beno tala mutindu ya kele ya kulunga!

³¹² Ntangu yayi, mu ke—mu ke tula kivuvu mpe mu ke tula kivuvu ti beno bantu me bakula ti mu ke meka na kutula lemvo yayi na Yesu Klisto, Nani kele Mfumu ya Yawu nyonso. Mpe ya kele samu na yina kaka beno me kuwaka munu ve kuzonza mutindu yayi ntete, na luzingu ya beno, kasi ngunga yayi ke na kubelamaka. Beno me mona? Beno me mona? Beno tala.

³¹³ Ntangu yayi samu na kukumisa yawu kieleka, samu na beno, na yawu ya lenda vwanda ya kifuluka na maza. Mu ke na kukubamaka dyaka na kubika beno. Mu zaba ve kisika mu ke kwenda. Mu fwana longa Nsangu ya mbote bisika yankaka. Kasi ntangu yayi, ti. . .

³¹⁴ Beno lenda tuba, “Mu me kuwaka bufanatiki ya mutindu yayi.” Mu zaba ve yinki; mu lenda fundisa muntu yankaka ve.

³¹⁵ Mu fwana pesa kaka mvutu na Nzambi samu na yina mu. . . samu—samu na munu mosi. Kasi ya me vwandaka ntete na ntangu mosi mu me tubaka na beno kima mosi na Nkumbu ya Mfumu, yina vwandaka mbote ve, na bamvula nyonso yayi? [Dibuundu me tuba, “Ve.”—Mu.] Muntu yankaka ve lenda tuba mutindu yina, samu mu ke tubaka yawu kaka mutindu Yandi tubaka yawu.

³¹⁶ Ntangu yayi bika mu talisa na beno ti yayi kele kaka kieleka, mpe kusiamisa yawu.

317 Ntangu yayi beno bambuka moyo, “Kana ya kele na muntu ya kimpeve to profete, Munu Mfumu ke tuba na yandi na ba-vision, mpe ke zabisa yandi na nzila ya bandosi.” Kutendula bandosi, yawu yina. Joseph, yandi lendaka tendula bandosi, mpe kutuba mpe—mpe kumona ba-vision. Ya kieleka?

318 Ntangu yayi beno tala yayi, ti, ntangu yayi, ntangu yayi, ntangu yayi kusalamaka, Junior vwandaka ya kutelama na mfinda yina vwandaka—vwandaka na pyramide ya nene samu na yawu, mutindu yina. Mpe ya vwandaka na kima yina ba sonikaka na zulu ya matadi, mpe mu vwandaka monisa Yawu na bantu. Ya kieleka, Junior? [Mpangi Junior Jackson me tuba, “Ya kieleka.”—Mu.] Pene ya mvula mosi na ntwala yawu salama.

319 Mpe beno tala kima ya kulanda ntangu yayi. Mu bakaka mwa kitini ya kisengo mosi mpe mu zengaka Yawu, mpe kuna na kati vwandaka Ditadi ya mpembe yina vwandaka na kima mosi ve ya kusonika na zulu ya Yawu. Mpe, na ntangu yina, mu bandaka na wesete. Mpe mu tubaka na bawu nionso, mu tubaka, “Kukwenda ve na weste. Vwanda awa mpe tala Yayi tii kuna mu ke vutuka.” Yandi kwendaka na wesete, samu na kupasuka; vutukaka na este, na Mpeve-Santu ke tendula Ndinga yayi ya kukonda kusonika. Ntangu yayi, kana ya kele ve kieleka Nzambi ya Ngolo nyonso, mu zola beno kuzaba yina kele.

320 Samu na yinki mu ke na kumeka na kutuba mutindu yayi, bankundi? Ya kele samu na kulakisa beno ti beto me kuma na ntangu ya nsuka. Ntangu yayi, kana bayankaka kele kieleka na mutindu ya kulunga na Ndinga, mutindu mosi Yayi kele kieleka na mutindu ya kulunga na Ndinga! Beto kele awa. Beto me kuma na nsuka, bankundi.

321 Ntama ve ya ke vwanda “ntangu ke basika.” Ba-million ke zimbisa baluzingu ya bawu. Ba-million ke vwanda, yina ke kwikila ti bawu me kuzwa mpulusu, ba ke tanga bawu nsuni samu na nsungi ya atomique. Beto ke na kuzinga na ngunga ya nsuka. Na lemvo ya Nzambi ya Ngolo nionso, na lusalusu ya Yandi na bantu ya Yandi, ti ba lendaka vingila na ntwala na mwa ntangu fioti na ntwala kumonana ya Klisto! “Bantangu yikwa, Mpangi Branham?” Ya lendaka vwanda na bamvula makumi zole; ya lendaka vwanda na bamvula makumi tanu; ya lendaka vwanda na bamvula nkama mosi. Mu zaba ve. Mpe ya lendaka vwanda na suka; ya lendaka vwanda dyaka na nkokila yayi. Mu zaba ve. Mpe muntu nyonso ke tuba ti bawu zaba, ti bawu kele na foti. Beno me mona? Bawu zaba ve. Nzambi, kaka, zaba.

322 Ntangu yayi beno tala. Na yawu beno sadisa munu, na nzila ya Nzambi, mu ke tuba Kieleka, ti Bayayi kele na kimpeve ya kutendula na munu, vwandaka swasikisa mabanza na nzila ya Mpeve-Santu. Mpe, na nzila ya mosi na mosi ya Yawu, me talisa kisika ya Yawu na kati ya Biblia.

³²³ Ntangu yayi, yinki kinsweki yayi ya nene kele na nsi ya Kidimbu yayi, mu zaba ve. Mu zaba yawu ve. Mu lendaka tanguna yawu ve. Mu lenda tuba na Yawu ve, kaka yina Yawu—kaka yina Yawu tubaka, kasi mu zaba ti Yawu vwandaka Banzasi Sambwadi yina vwandaka wakana ke landisana bawu mosi kintwadi, na kubulaka kaka bambala sambwadi. Mpe Yawu zibulaka kima yankaka yina mu monaka. Na yina, ntangu mu monaka Yawu, mu talaka ntendulu. Yawu lutaka na nswalu nyonso kuna, mpe mu lendaka ve kutunguna Yawu. Ya kele kaka kieleka. Beno me mona? Ngunga kele ntete ve samu na Yawu.

³²⁴ Kasi, Yawu ke kota na manaka yina, beno me mona. Yawu ke kwisa pene-pene. Na yawu, kima samu na beno na kusala kele kubambuka moyo ti mu ke zonza na beno na Nkumbu ya Mfumu. Beno yilama, samu ti beno zaba ve wapi ntangu kima mosi lenda salama.

³²⁵ Ntangu yayi, ntangu ya ke kota na bande, yina Yawu kele, yina mu banza ke tinda mafunda kumi ya bankundi ya munu ntama na munu. Samu ti, bawu ke tuba, ti, “Mpangi Branham ke na kumeka na kutula yandi mosi, mpe kusala yandi mosi, kisadi to profete, to kima mosi, na ntwala ya Nzambi.” Beno bika mu tuba na beno, bampangi ya munu, yina kele foti.

³²⁶ Mu ke tuba kaka na beno yina mu monaka mpe yina ba tubaka na munu. Mpe ntangu yayi beno—beno sala nyonso yina beno zola. Mu zaba ve nani ke...yinki ke salama. Mu zaba ve. Mu zaba kaka ti Banzasi Sambwadi yina me simba dinsweki yina. Mazulu vwandaka swi. Muntu nionso me bakula? [Dibuundu me tuba, “Amen.”—Mu.] Ya lendaka vwanda ntangu, ya lendaka vwanda ngunga ntangu yayi, ti muntu yayi ya nene yina beto ke vingila kukota na kusalu lendaka kota na kusalu.

³²⁷ Ya lendaka vwanda na ministere yayi, yina mu me meka na kuvutula bantu na Ndinga, me sala lufulu; mpe kana ya kele mutindu yina, mu ke bika beno, samu na mambote. Ya ke vwanda ve na zole na kati ya beto awa na ntangu mosi. Beno me mona? Kana ya kele mutindu yina, yandi ke zanguka; mu ke kulumuka. Mu zaba ve.

³²⁸ Kasi mu me kuzwa bweso, na nzila ya Nzambi, samu na kutala mpe kumona yinki Yawu vwandaka, beno me mona, samu na kumonisa yawu. Ntangu yayi, ya kele Kieleka.

³²⁹ Mpe mu ke kwikila ti beno me bakula bima yina vwandaka salama na sabala yayi. Mu ke kwikila ti beno talaka mwana-bakala ya Collins yina vwandaka kuna, vwanda kufwa, na nkokila yina; mwana-kento yina ya fioti, na leucemie.

³³⁰ Kimfumu ya Nzambi ke na kwiza. Mpe Yawu ke na kukumaka ya kulutula yimbi na positif, mutindu ya vwandaka. Ntangu yayi, yina zolaka niongisa bantu. Na kunungisama, na kusantisama, na mbotika ya Mpeve-Santu, mpe na manima *awa*,

awa. Beno me mona? Beto ke belama kaka na Nzambi, ntangu nyonso.

331 Beno lenda mona ve, milongi ya ba-Methodiste, mutindu nsangu ya beno ya kusantisama vwandaka na zulu ya yawu yina Luther longaka?

332 Beno ba-Pentecotiste, beno lenda mona ve nsangu ya beno ya mbotika kele na zulu ya yina ba-Methodiste longaka? Beno zaba yina mu zola kutuba?

333 Oh, beto me kuzwa bima mingi yina ke na kusalama! Mpe ya kele kieleka. Mpe kana ya kele na muntu yina ke yinaka yimbi, mpe bantu ke tuba kima yina kele kieleka luvunu mpe Kieleka ve, mu ke yinaka yawu.

334 Kasi mu—mu zola Kieleka ya ngolo, ata ti Yawu ke yayi na lweka *yayi* to na lweka *yina*. Kana Yawu kele Kieleka, Nzambi na nsuka ke lakisa Yawu mutindu Kieleka. Mpe kana Yandi sala yawu ve, mosi ya bilumbu yayi ntama mingi ve, na yina vision ya munu vwandaka ya kusungama ve. Ntangu yayi beno me mona kisika mu me vwanda munu mosi.

335 “Wapi ntangu ya ke vwanda, Mpangi Branham?” Mu lenda tuba na beno ve. Mu zaba ve.

336 Kasi, mosi ya bilumbu yayi, kana beto ke kutana diaka ve na zulu ya ntoto yayi, beto ke kutana kuna na—na Kiti ya Lufundusu ya Klisto. Mpe beno ke tala, ti, na kati ya kivinga yina, luzayikisu yina me katuka na Nzambi, kaka mutindu bayankaka nyonso kele na yawu, ti Bawu. . . Mosi ya dinsweki ya Kidimbu yina, kikuma Yawu me monisama pwelele ve, Yawu vwandaka Banzasi Sambwadi yina basisaka bandinga ya Yawu. Mpe Yawu yina, na mutindu ya kulunga. Samu, kima mosi ve zaba kima mosi samu na Yawu. Yawu sonamaka mpe ve. Na yawu, beto kele na ntangu ya nsuka. Beto kele awa. Mu ke tonda Nzambi samu na Ndinga ya Yandi.

337 Mu ke tonda Yandi samu na Yesu Klisto. Samu ti, kukondwa kufidisa Yandi samu na munkayulu ya masumu ya beto, beto nyonso ke vwanda na kati ya poto-poto ya nene ya disumu, ata kivuvu. Kasi, na lemvo ya Yandi, Menga ya Yandi—ya Yandi ke sukula disumu nyonso. Kaka mutindu ditono ya ntinta na kati ya kantini ya Javel, beno ke kuzwa ntinta dyaka ve. Ntangu masumu ya beto me fungama, ya me tulama na Menga ya Yesu Klisto; ata mbala mosi ve ti bawu ke zabana dyaka. Nzambi me zimbana yawu; ya me salamaka ata fioti ve. Mpe ntangu nyonso yina Munkayulu yango kele kuna na kukatula—masumu samu na beto, kuna kaka yina. Kaka yina, beno me mona. Beto—beto kele dyaka ve misumuki. Beto kele Miklisto, na lemvo ya Nzambi. Beno bambuka moyo, na beno mosi beto lenda vwanda kaka yimbi mutindu beto vwandaka ntete. Kasi, beno me mona, lemvo ya Nzambi me monana na beto, mpe ya kele yina me sala beto

yina beto kele bubu yayi, bampangi ya babakala mpe bampangi ya bakento Miklisto.

338 Yayi me vwanda sabala mosi ya nene samu na munu. Mu me lemba. Mabanza ya munu me lemba. Samu ti mu—mu me . . . na nyonso yina mu lendaka sala. Mpe kima mosi ya ngitukulu vwandaka landila, konso kilumbu. Mu ke vwanda na ngitukulu; kutambula na kati ya kivinga, mpe kuvwanda kuna baminuti fyoti, mpe kumona Kima kubaluka kaka munu ya muvimba.

339 Mpe, awa, mu ke kota kuna mpe ke baka banoti. Mu ke baka babuku ya Docteur Smith, Uriah Smith, mpe, oh, misoniki nyonso mpe nyonso, mpe kutanga na kati, kutanga na babuku ya bawu. Mu ke tuba, “Ntangu yayi *awa* kele Kidimbu ya Sambanu. *Awa* kele Kidimbu ya Yiya. Ntangu yayi yinki muntu yayi ke tuba? Yandi ke tuba, ‘Mbote, Yawu vwandaka mutindu *yayi, yina, to yankaka.*” Mu ke tala awa mpe mu ke kuzwa muntu yankaka. Yandi tubaka ti Ya vwandaka mutindu *yayi-mpe-yina*. Mpe ya ke talana mutindu mu kaka . . . Ya simbaka kaka mbote ve. Beno me mona?

340 Na yina mu banzaka, “Mbote, yinki Yawu kele, Mfumu?” Mpe mu vwandaka tambula na nsi na mwa ntangu fioti. Mu ke fukama mpe ke sambila. Mu ke vutuka mpe mu ke baka Biblia; mu ke vwanda, mu ke tanga. Mu ke vutuka mpe ke kwenda.

341 Na yina, na mbala mosi, ntangu mu me vwanda swi, awa Yawu me zibuka kaka mutindu yina. Na yina mu ke baka kilapi na nswalu nionso, mpe mu ke sonika Yawu mutindu yayi, nionso yina mu vwandaka mona mpe mu vwandaka sala. Mu vwandaka tala Yawu, mutindu yayi, tii kuna mu sonikaka Yawu.

342 Na manima mu vwandaka baka, kilumbu ya muvimba, samu na kukwenda kutala yayi, mpe kumona kana Yawu vwandaka ya kukwama nzila nyonso na Masonuku. Na yina, “Beno lakisa bima nyonso.” Beno me mona? Mu kele na Yayi awa.

343 Mpe mu banza, “Ntangu yayi, ya kele na bantu mingi yina vwandaka na ba-vision. Ya kele na mingi ya baluzayikisu.” Kana ya kele ya kuswaswana na Ndinga, beno bika yawu swi; ya kele kieleka, beno bika yawu swi.

344 Ntangu yayi, ntangu yayi, na yina mu ke longuka Yayi mpe na yisi mutindu *yayi*, mu ke longuka yawu mutindu *yayi*. Mu ke sonika mwa bima awa. Mu banzaka, “Mbote, ntangu yayi, kalasi ke vwanda na kyese na kuwa yayi, samu ti ya ke wisana *awa* mpe ya ke wisana *awa*. Ntangu yayi, beto mona, yinki yayi ke tuba *awa*? Yinga. Mpe, yinga, yawu yayi, kaka *awa.*” Beno me mona?

345 Mpe kuvutula Yawu na nzila ya Biblia, mpe kangaka kima yango, na kati ya sabala. Yawu yina, na ba-bande. Kukwisa ya mbote na beno. Mpe mu me sala yawu na luzabu ya munu nionso, na nsi ya kimpangi ya Baklisto, lemvo ya Nzambi, na bantu nionso, na nzila ya Yesu Klisto. Mu me sala nyonso yina mu zaba.

346 Beno me vwanda kalasi mosi ya kulutila kitoko. Ata muntu mosi ve lendaka vwanda kitoko mingi kulutila beno yina kele ya kuvwanda awa. Beno nionso me kwisa awa na ngunga mosi na suka, tii na ngunga ya tanu, na ntangu bawu zibulaka dibuundu mpe kotisaka . . . ti bantu kukota. Nge me telama na madidi; nge me vwanda na mvula ya mpembe; nge me sala nionso; nge me telama pene-pene ya bibaka, tii kuna makulu ya nge sala mpasi. Mu ke mona babakala, kuvwanda. Bakento kuvwanda, mpe bayankaka ke telama, mpe mutindu yina, ya kuvwanda pene-pene ya bawu. Mu banzaka, “Mfumu, ya muvimba . . .”

347 Yayi me vwanda sabala ya ngitukulu. Nionso me vwanda mutindu ya ngitukulu, wapi mutindu, ntangu bantu ke kwizaka, beno mona bawu ya kutelama na ngaanda, na banela, na bakielo, kuna na manima, bisika nionso, samu na kuwa. Mu me lunga ve na kuvwanda nzonzi, mu kele ve ya kulunga samu na kuvwanda nzonzi. Mu—mu kele na mayele mingi, na kuzaba ti mu kele ve, yina mu ke longi ve. Kasi samu na yinki bantu ke vwanda mpe ke kuwa mutindu yina? Samu na yinki bawu ke sala yawu? Bawu ke kwisa ve samu na kuwa muntu ya mutindu munu. Kasi ba ke kwisa samu ya kele na Kima mosi na kati ya yawu, yina ke benda bantu. Ya kieleka. Beno me mona? Ya kele na Kima mosi na kati ya yawu, yina ke na kubenda bawu.

348 Mutindu kento ya munu telemaka awa na estrade mpe yimbaka, ntangu mu bandaka:

Bawu katukaka Esete mpe Wesete,
 Bawu katukaka na ntoto ya ntama,
 Samu na kusala feti na Ntinu, samu na kudya
 mutindu banzenza ya Yandi;
 Wapi mutindu ya kusakumuna kele bizyeti
 yayi!
 Na kutalaka kizizi ya Yandi ya santu
 Kulezima na Nsemo ya Kinzambi;
 Bayina ke vwanda ya kusakumuna na lemvo ya
 Yandi,
 Mutindu misanga na yimpu ya Yandi ke lezima.

349 Bika ti beno bumba yawu ntangu nionso na mabanza ya beno, “Samu na kuvwanda na yinti ya kieleka na Yimpu ya Yesu Klisto.” Paul tubaka na Dibundu, “Beni kele—beni kele matadi ya ntalu, to, misanga ya Yimpu ya Yandi.” Beto zola kuvwanda misanga ya Yimpu ya Yesu Klisto.

350 Beto zola ve, beto me tulaka ata fioti ve muntu na kati ya yawu. Beno me zimbana kima mosi samu na munu. Mu kele mpangi ya beno ya bakala, nsumuki yina me vuluka na lemvo, yina me lunga ve na kuzinga. Ya kele kaka kieleka. Mu ke tuba yawu ve samu na kuvwanda ya kukikulumususa; ya kele mambu. Ya kele ve na kima mosi na kati ya munu, ata kima ya mbote ve, ata fyoti ve.

351 Kasi lemvo ya Nzambi me bika meso ya munu ya mputu, ya fioti beno tala na manima ya rido ya ntangu mpe beno mona bima yango kuna, mpe mu ke vutuka.

352 Ntangu mu vwandaka mwana-bakala ya fioti, mu zolaka bantu. Mu ke zolaka ntangu nionso muntu mosi samu na kuzola munu mpe kutuba na munu. Muntu ve lenda sala yawu, samu na nkumbu ya dibuta. Muntu ve lenda zonza na munu.

353 Kasi ntangu mu pesaka lusalusu ya munu na Nzambi, na yina . . . Bantu ya beto, lufulu, vwandaka Irlandais, mu banzaka, “Ya lenda vwanda . . . Bawu nyonso vwandaka bantu ya Katolika, mpe ya lenda vwanda ti ya ke vwanda Yawu.” Mu kwendaka *kuna*, mpe Yandi vwandaka mutindu mosi. Mpe mu kwendaka na dibuundu ya Ntete ya ba-Baptiste, mpe Yandi vwandaka mutindu yankaka.

Mu tubaka, “Mfumu, ya fwana vwanda na mutindu mosi ya kieleka.”

Mpe Kima mosi tubaka, “Ya kele Ndinga.”

Mu me simba Ndinga yina. Beno tala konso vision, bisika nionso.

354 Kilumbu mu tulaka ditadi yina ya nsongi kuna, mpe tulaka yawu kuna, mu sonikaka kuna na zulu yina Yandi talisaka munu na suka yina na vision. “Tatamana na kuzabisa yawu ata ya vwanda ntangu ya mbote, to ya yimbi; semba mpe ngana na mvibudulu nionso mpe Malongi. Samu ti ntangu ke kwiza ntangu bawu ke vwanda ve na Malongi ya madidi; kasi na manima ya bansatu ya bawu mosi ke kutika samu na bawu mosi kintwadi, mutindu milongisi, yina vwandaka sala yawu na makutu; mpe ke yambula Kieleka, samu na masolo ya luvunu.” Mpe mu me mona bayinti yina zole, yina mu telemaka kuna, mu ke sala kima ya mutindu mosi. Ya kieleka. Mpe beto me kuma kisika yango. Mpe ya kele kieleka. Mpe, ntangu yayi, beno ke ve . . .

355 Beno bambuka moyo. Bika mu bondila beno diaka. Beno tuba ve, “Matondo na nge,” na muntu nionso, na mutindu nionso. Beno tuba ve, beno banza yawu, mulongi mosi to kima mosi, muntu mosi ya kufwa; ya kele na kima ya mbote samu na yandi. Samu ti, ya kele ve. Mu ke kipe ve nani yandi kele. Ya kele ve na kima ya mbote na muntu nyonso. Ya kele kieleka.

356 Kana ya kele na nkonga ya muvimba ya bampungi na zulu awa, mpe mosi ya bawu zolaka bula muziki mosi, ya kele muntu . . . Bampungi yina kele kuwakana ve. Ya kele muntu yina lenda bula mpungi, yina zaba yina yandi ke sala, yina ke bula mpungi. Mpungi kele na kima ve ya kusala na yawu. Muningu ke katukaka na mayele na manima ya yawu. Ya kele kieleka. Na yawu, bampungi nyonso kele mutindu mosi.

357 Bantu nionso kele mutindu mosi. Baklisto nionso kele mutindu mosi. Ya kele ve na babakala ya nene na kati-kati ya beto. Beto kele ve babakala ya nene, bakento ya nene ve. Beto nyonso kele bampangi ya babakala mpe bampangi ya bakento, bawu nyonso mutindu mosi, na kati ya ntangu mosi. Beto kele ve “nene.” Mosi ke salaka ve ya kulutila nene na yankaka, ata kima ve, samu na kusala. Ve, tata. Kasi beto nionso kele kaka bantu.

358 Beno meka ve kutendula bima. Beno meka ve na kusala kima ya kulutila samu na kuzinga luzingu ya pene-pene, na kupesaka lukumu mpe lukumu na Yesu Klisto. Muntu nionso me bakula yawu ntangu yayi? [Dibuundu me tuba, “Amen.”—Mu.] Mpe na yina beno zola Yandi na ntima ya beno ya muvimba. Beno ke sala yawu?

Mu zola Yandi, (Mpe mu zola!) Mu zola Yandi
Samu Yandi zolaka munu ntete
Mpe futaka mpulusu ya munu
Na yinti ya Calvaire.

359 Lukumu na Nzambi! Bantu nionso me bakula na mutindu ya kulunga? [Dibuundu me tuba, “Amen.”—Mu.] Muntu nyonso ke kwikila? [“Amen.”] Beno bambuka moyo ntangu mu bandaka ntete, “Nani me kwikila nsangu ya beto? Na yandi diboko ya Mfumu me monisama?” Yandi me monisa na beno, kyadi ya Yandi, bumbote ya Yandi? Amen. Beno bambuka kaka moyo, beno zola Yandi na ntima ya beno ya muvimba.

360 Mu ke vutuka na yinzo ntangu yayi. Mu ke vutuka dyaka awa, kana Mfumu zola, na manima ya kilumbu ya ntete ya Ngonda ya sambanu.

361 Mu banza, kana Mfumu tula yawu na ntima ya munu, mu banza ti kilumbu mosi na été ya ntete yayi, mutindu Ngonda ya sambanu to kisika mosi, ya lendaka vwanda kubwa na ntangu ya ntete, kana Mfumu vutuka nswalu ve, mu ke zola kuvutuka mpe kusala bampimpa sambwadi yankaka, samu na Bampungi Sambwadi ya nsuka. Beno ke zola yawu? Beno ke zola yawu? [Dibuundu me tuba, “Amen.”—Mu.] Beno ke sambila samu na munu, ti Nzambi ke sadisa munu? [“Amen.”] Mbote mingi.

362 Tii mu ke kutana diaka na beno, beno bambuka moyo na nkunga yayi ya mbote ya ntama:

Mu zola Yandi, mu zola Yandi
Samu Yandi zolaka munu ntete
Mpe futaka mpulusu ya munu
Na yinti ya Calvaire.

363 Ntangu yayi mu zola ti beno kulumusa yintu ya beno. Mu zola sambila samu na beno. Na ntwala pasteur kumanisa, mu zola kusambila samu na beno.

364 Tata ya beto ya Mazulu, bika ti bantu, Mfumu, kubakula. Na yina, mu ke kwikila ti ya kele na bayankaka yina kele ve. Kasi,

Tata, bika bawu—bawu zaba kikuma. Mpe ti bawu bakula, Tata, ti—ti ya kele lemvo ya Nge na bawu ti bima yayi me monisama. Mpe mu zola kutonda Nge, Mfumu, samu na luzabu ya kuzaba bima yayi yina Nge me monisa na beto.

³⁶⁵ Mpe mu ke sambila samu na muntu nyonso yina kele awa, muntu nyonso yina kele na balukutakanu. Kana ya kele na bayina ke kwikila ve, bika, Mfumu, bawu kukuma bakwikidi.

³⁶⁶ Mu ke sambila samu na bayina nyonso ke kuwa Bansangu na bande. Mpe kana Yawu kubwa, na yina Yawu ke vwanda, na ntembe ve, na bayinzo mpe bisika ya bantu mingi ya kukondwa lukwikilu yina ke vwanda mutindu yankaka; kasi, Tata, mu ke sambila samu na mosi na mosi, ti ntete bawu tuba dyambu ya kuvweza, ti bawu lenda vwanda ntete mpe kutala Masonuku na yina me tubama, mpe na yina beno tuba na Nge ti bawu kele kieleka ya kusungama mpe zola kuzaba kana yayi kele Kieleka, to ve. Mpe mu ke sambila samu na bawu, Tata.

³⁶⁷ Mpe mu ke sambila samu na bayina me telama na lweka ya bibaka yayi, bayina me telama na ngaanda, bayina me vwanda na kati ya matoma ya bawu, samu na bana ya fyoti, mpe samu na bayina nyonso wandaka. Mpe kaka bawu nyonso, Mfumu, mu ke sambila samu na bawu.

³⁶⁸ Mpe mu ke sambila ti bisambu ya munu kuzwa mvutu, ti Nge ke sakumuna bawu. Ya ntete, Mfumu, pesa konso muntu Luzingu ya Kukonda nsuka. Mu ke sambila ti ya ke vwanda ve na mosi ya bawu yina ke zimbana, ata mosi ve.

³⁶⁹ Mpe ntangu yayi, Tata, beto zaba ve ntangu dyambu ya nene yayi ke vwanda. Kasi ntangu beto ke mona bidimbu yayi kumonika, mpe Masonuku ke salama, ya ke nata ntima ya beto na kitezo ya zulu. Mpe mu ke sambila, Tata Nzambi, ti Nge ke sadisa beto.

³⁷⁰ Mu ke sambila ti Nge ke sadisa pasteur ya beto ya luzolo, Mpangi Neville. Sala yandi, Mfumu, ya kifuluka na lemvo mpe ya kifuluka na ngolo, mpe na lubakusu, ti yandi lenda baka Madia yayi ba bumbaka mpe kudisa bana-mameme ya Nzambi.

³⁷¹ Mfumu, mu ke sambila ti Nge ke katula kimbevo na beto. Bika yawu salama, ti ntangu bantu ke kuma ya kubela, ti ba ke bambuka moyo na Menga ya kulunga yina kele na Mfumu Yesu ya kuvwanda na autel, samu na kukatula-masumu. Mpe mu ke sambila ti bawu beluka na mbala mosi.

³⁷² Mpe mu ke sambila ti Nge ke katula ntama ngolo ya Satana na kati ya bawu, samu na kulembisa bawu, to kumeka na kusadila bawu balusambu. To, katula ntama bangolo nyonso ya mbeni, Mfumu. Santisa beto na Ndinga ya Nge. Pesa yawu, Mfumu.

³⁷³ Na yina, Mfumu, mu ke sambila ti Nge ke sadisa munu. Mu—mu—mu me banda na kulemba, Mfumu. Mu zaba ti bilumbu

ya munu lenda vwanda dyaka ve mingi. Mpe mu ke sambila ti Nge ke sadisa munu, na kubika munu kuvwanda ya kukwikama, Mfumu, mpe ya kusungama mpe ya kieleka, ti mu lenda vwanda na kiyeka ya kunata Nsangu na mutindu ya yawu me tumisa samu na munu na kunata. Mpe ntangu ya ke kuma ntangu yina mu fwana vwanda, mpe mu ke kuma na Nzadi, mpe bitembo kubanda na kukota, O Nzambi, bika mu vwanda na lenda ya kupesa Mbele yayi ya ntama na muntu yankaka yina ke vwanda ya kusungama na Yawu, Mfumu, mpe ke nata Kieleka. Pesa yawu, Mfumu. Mpe, tii kuna, sadisa munu na kuvwanda na ngolo mpe na mavimpi ya mbote, mpe na kikesa.

³⁷⁴ Sadisa dibuundu ya munu. Sakumuna beto kintwadi, Mfumu. Beto kele ya Nge. Beto ke na kutala ntangu yayi ti Mpeve ya Nge kele na kati-kati ya beto. Beto ke kwikila ti Nge ke pesa mvutu na bisambu ya beto. Na yina, beto ke kukipesa beto mosi na Nge, na Ndinga ya Nge, samu na kisalu ya bilumbu ya beto nionso na zulu ya ntoto yayi, na Nkumbu ya Mwana ya Nzambi, Yesu Klisto, Mvulusi ya beto ya luzolo, samu na nkembo ya Yandi. Amen.

Mu... (Nzambi sakumuna nge!)... Mu zola
Yandi (na ntima ya munu nyonso),
Samu Yandi zolaka munu ya ntete.

³⁷⁵ Nzambi sakumuna nge, Mpangi Neville...?... Vwanda na kisika ya kisalu...?...

KIDIMBU YA SAMBWADI KE LANDILA

³⁷⁶ [Beno me sukisa kaka na kuwa *Kidimbu Ya Sambwadi* mutindu ba longaka yawu na muvimba ya yawu na Lumingu na nkokila, na kilumbu ya 24 ya Ngonda ya tatu, na mvula 1963 na Branham Tabernacle na Jeffersonville, na Indiana. Mpangi Branham vwandaka zola ve ti bande yayi ya kisina kudasika. Kilumbu yina landaka, na Kilumbu ya ntete, na Ngonda ya tatu na kilumbu ya 25, na mvula 1963 Mpangi Branham kwendaka na kivinga ya motele ya Mpangi Fred Sothmann mpe Mpangi James Maguire, yina vwandaka na kiyeka na ntangu yina ya kusala ba-bande. Mpangi Branham tubaka na bampangi yayi ya babakala, “Mu zola ve ti nsangu yayi kudasika mutindu ya kele.” Na manima ya kuwa bande yandi mosi, yandi tumaka bampangi na kusukisa bande na kisika mosi, mpe na kisika yina (kubanda na paragraphe 261) mpe yandi kangaka na bande kitini ya malu-malu ya miniti pene ya makumi zole na yinda (paragraphes 377-415). Kitini ya malu-malu yayi bakaka kisika ya kitini ya nsuka ya ntete (paragraphes 261-375). Bande yayi vwandaka mutindu mosi kaka ya *Kidimbu Ya Sambwadi* tii na mvula 1966. Na manima Mpangi Branham kwendaka, kimvuka ya administration ya William Branham Evangelistic ndimaka na kimvuka na kumwangisa bande ya ntete yina salamaka na

tabernacle. Kubanda ntangu yina, mitindu zole yayi me kumaka na maboko ya bantu nionso. Beto me bwela ntangu yayi nsangu ya Mpangi Branham na bande mosi, na *Kidimbu Ya Sambwadi* ya ntete. Ndinga yina ke landa beno ke kuwa ke vwanda Mpangi Branham na kivinga ya motele na Kilumbu ya ntete, na kilumbu ya 25 ya Ngonda ya tatu, na mvula 1963—Mu.]

377 Ya ke vwanda kima ya mbote yina yandi zaba ve kima na zulu ya Yawu. Samu, kana yandi sala yawu, na yawu yandi lenda mekula Yawu. Yawu yina mwa mayele ya yandi na kusalaka mambu.

378 Na yawu, kuna, Nzambi salaka Yawu ya kubumbama mingi na yinza ya muvimba, mpe na Mazulu, ti ya kele ve na mutindu ya lubakusu Yawu, kaka mutindu Nzambi ke talisa Yawu, Yandi mosi.

379 Ntangu yayi mu zola beno kutala, na nkokila yayi, ti na Kidimbu ya Sambanu, ya vwandaka na lukanu ya tatu ya Kidimbu ya Sambanu.

Ya vwandaka na lukanu ya bima tatu ya minati-mpunda.

380 Ya vwandaka na lukanu ya bima yayi nionso. Yina ke vutula beto na tatu. Mpe sambwadi, diaka, beno me mona, Bidimbu Sambwadi, Bambungu Sambwadi, mpe nionso yina. Ntangu yayi, na kati ya butatu mpe sambwadi, kele lutangu ya Nzambi na mathématique ya Yandi ya kumonikisa Ndinga ya Yandi.

381 Ntangu yayi beno tala, mutindu na bingana, ntangu yayi, ya vwandaka na bampunda tatu yina basikaka. Mosi ya bawu vwandaka mosi mpembe, mosi vwandaka ya mbwaki, mosi vwandaka ndombe. Mpe na yina, na mpunda ya yiya, na yina, bawu nionso vukanaka kintwadi. Beno me mona, lukanu ya tatu.

382 Ntangu yayi, Nzambi salaka kima mutindu mosi. Nzambi salaka mutindu mosi ntangu Yandi fidisaka nkosi ya Yandi, yina vwandaka Ndinga ya Yandi, samu na kunwanisa mbeni ya Klisto.

383 Na yina beto ke mona ti Yandi fidisaka ngombe na ntangu ya lukwamusu, kibulu ya munkayulu. Mpe na ntangu yayi ya lukwamusu, ya kele nyonso bantu zolaka sala, vwandaka sala kaka, mpika, mpe ba vwandaka kukipesa bawu mosi samu na munkayulu.

384 Na yina beto ke tala, na nsungi yina landaka, yina vwandaka nsungi ya basungiki, Nzambi fidisaka ndwenga ya muntu, mutindu yintu ya muntu na zulu ya Kibulu, yina vwandaka ngolo yina basikaka na basungiki.

385 Ntangu yayi beno me tala? Konso. . . Kuyituka ve ti bantu ya bilumbu yayi ke na kuzinga diaka na mbandukulu, mutindu ya vwandaka na nsungi ya basungiki, samu ti bawu ke mona kaka yawu na mutindu ya dibuundu ya kutala yawu. Bawu ke mona yawu na mutindu yina baseminere me longa yawu.

Yina vwandaka nzila ya Nzambi na ntangu mosi, kasi beto me zingila yawu.

³⁸⁶ Ntangu yayi beto kele na nsungi ya ngononi, luzayikisu ya kumonisama, kima nyonso. Ntangu yayi beno fwanikisa yayi na Apocalypse kapu ya 10, nzila ya 1 tii 7. Mpe beto ke mona awa na Apocalypse yayi, na Apocalypse awa, 10:1 tii 7, ti, “Na bilumbu ya ndinga ya Nsangu ya wanzio ya sambwadi, zolaka sukisa mansweki nyonso ya Nzambi.”

³⁸⁷ Ntangu yayi beto ke mona, mpe, na yayi, ti Kidimbu ya Sambanu, ntangu yayi vwandaka ya kufunguka, ya vwandaka samu na balukanu ya tatu. Ntangu yayi, awa vwandaka balukanu.

³⁸⁸ Kima ya ntete, vwandaka, mwense ya kulala zolaka luta na ntangu ya Lukwamusu samu na mvedolo. Yandi zolaka vwanda ya kuvedisa na masumu ya yandi ya kukondwa lukwikilu mpe kumanga Nsangu. Yayi, yandi vwandaka ya kusala na ntangu ya Lukwamusu. Beto ke mona bawu dyaka awa na Apocalypse 7, na kati-kati ya kapu ya 6 mpe ya 7 awa, ti yandi kumaka ya kuvedila, mpe ba pesaka yandi bilele. Ntangu yayi, yandi kele ve Kento ya makwela. Kasi ya kele dibuundu, bantu ya kuvedila yina—yina—yina kuzwaka ve bweso, mu banza, samu na kuzwa Nsangu, to na mutindu mosi bawu vwandaka meso ya kufwa na nzila ya baprofete yayi ya luvunu. Mpe bawu—bawu kuzwaka ve siansi, mpe dyaka bawu kele kieleka ya kusungama na ntima. Mpe Nzambi zaba ntima ya bawu. Mpe awa bawu kele ya kuvedisa, na kati ya ntangu yayi.

³⁸⁹ Beno ke tala yawu, ntangu yankaka ya kumekula, ya kele samu na Israel, ntangu yandi ke vukana. Yina kele lupangu ya zole. Nzambi ke vedisa Israël na ntangu ya Lukwamusu. Na kati ya mafuku yina ke vukana kuna, ya ke vwanda na bayina ba soolaka nkama mosi na makumi yiya na yiya ya mafunda, mpe ba ke kuma ya kuvedila, mpe. Nzambi ke na kuvedisa Israel.

³⁹⁰ Beno tala, ya kele na ntoto ya muvimba yina ke na kukumaka ya kuvedila. Ya ke vwanda na kima mutindu yina ngonda, bambwetete, mpe yinza ya muvimba, ke vwanda ya kuvedila. Beno me mona yinki ya kele? Ntoto ke vutuka ya malu-malu yawu mosi, na kuvwandaka ya kuvedila, na kukubama samu na Millenium. Millenium ke na kwiza. Mpe, beno me mona, nyonso yina kele na mvindu na kati ya yawu kele kuvwanda ya kuvedisa na kati ya Kidimbu ya Sambanu.

³⁹¹ Ntangu yayi, ntangu yayi, beno me tala? Na kuzibuka ya Kidimbu ya Sambwadi yayi, ya kele mpe na kati ya dinsweki ya bima tatu. Yandi yayi, mu kele. . . ke tuba mpe me tuba, ti ya kele mansweki ya Banzasi Sambwadi. Banzasi Sambwadi na Mazulu ke monisa mansweki yayi. Ya ke vwanda kaka na Nkwizulu ya Klisto, samu ti Klisto tubaka muntu ve zabaka ntangu Yandi ke vutuka.

³⁹² Beno me tala, ntangu ba-Juif yufulaka Yandi yawu? Beno zaba. . . Ntangu beto fwanikisaka Masonuku awa na Matthieu 24, na Bidimbu sambanu, Kidimbu ya Sambwadi sukaka. Samu ti, beno me mona, Klisto tubaka, “Kaka Nzambi Yandi mosi zabaka; ata mpe Bawanzio ve.” Kukondwa ntembe, Yawu vwandaka mpe ve ya kusunama. Beno me mona, bawu vwandaka swi; kima mosi ve salamaka kuna. Bawanzio zaba Yawu ve. Muntu mosi ve zaba ntangu Yandi ke kwisa.

³⁹³ Kasi ya ke vwanda—ya ke vwanda na Bandinga Sambwadi, ya Banzasi yayi, yina ke monisa luzayikisu ya nene na ntangu yina. Na yawu, mu banza, na beto bayina. . . Kana beto zaba Yawu ve, mpe kana beto. . . Ba ke zaba Yawu ve tii ntangu yina. Kasi ya ke talisama na kilumbu yina, na ngunga yina ba fwana monikisa yawu. Na yawu, kima samu na beto na kusala kele kuvwanda na buzitu na ntwala ya Nzambi, mpe kusadila Yandi, mpe kusala nyonso yina beto zaba mutindu ya kusala, mpe kuzinga mbote, Muklisto ke zinga. Awa, ntangu yayi, beto ke tala ti Kidimbu ya Sambanu me zibuka na beto; beto ke mona Yawu. Mpe beto zaba ti Kidimbu ya Sambwadi yayi lenda kota ve na ntwala ya bantu tii ngunga yina ke kwiza.

³⁹⁴ Ntangu yayi, ya vwandaka na kikuma mosi yina Nzambi bikaka Bandinga Sambwadi yayi kuwakana. Samu, Yawu fwana kwisa, beno me mona. Samu. . . Beto ke tala ti Klisto, Mwana-dimeme, bakaka Buku na diboko ya Yandi, mpe Yandi zibulaka Kidimbu yina ya Sambwadi. Kasi, beno me mona, ya kele dinsweki ya kubumbama. Muntu mosi ve zaba Yawu. Kasi, Yawu—Yawu, kaka na yina Yandi tubaka, “Muntu mosi ve ke zaba Nkwizulu ya Yandi.” Ba ke zaba diaka ve mansweki yayi ya Banzasi Sambwadi. Na yina, beno me mona, ya ke vukana kintwadi.

³⁹⁵ Na yina, beto kele na lubakusu ya Yawu, bubu yayi, samu ti bayankaka ya Yawu nyonso ke monana; kasi yayi kele monana ve. Kasi mu vwandaka ya kuvwanda na kati ya kivinga ya munu, mpe mu kuwaka yayi. . . to, mu kuwaka yawu ve, mu zolaka tuba, kasi mu monaka Yawu ke zibuka na Banzasi Sambwadi yayi. Ntangu yayi, ya kele ntama mutindu beto lenda kwenda, kaka kuna.

³⁹⁶ Mpe ntangu yayi mu ke na kivuvu ti mosi na mosi ya beno ke sadila Nzambi mpe ke sala yina kele kieleka. Mpe beno zola Yandi, luzingu ya beno nyonso, mpe beno sadila Yandi. Mpe Nzambi ke keba nyonso yankaka.

³⁹⁷ Ntangu yayi, beto kele, na kumanisa awa ntangu yayi, na lemvo ya Nzambi, mansweki nionso ya Bidimbu sambanu yina ba me kanga, mpe beto me bakula mpe beto me zaba awa ti Kidimbu ya Sambwadi ke zabana ve na ntwala ya bantu.

³⁹⁸ Ntangu yayi, Nkwizulu ya Yandi, na ngunga ya Nkwizulu ya Yandi, ntangu kubeba ya ntoto, beno zaba. Yandi tubaka kuna,

“Yinki ke vwanda kidimbu ya nkwezulu ya nsuka ya yinza?” Na Matthieu 24, kuna kisika bawu yufulaka Yandi kyuvu yina. Yandi kwendaka kuna. Yandi tubaka samu na yina me tala Israel me vukana mutindu yinsi, na nzila ya 31, ya Matthieu 24:31. Kasi kuna Yandi bandaka na kumata, beno me mona. Kuna beno ke mona. . . “Benoni longuka kingana ya yinti ya fike. Ntangu beno ke mona yawu kubasisa makasa ya yawu, mbote, beno zaba ti printemps ke na kubelama. Mpe na yina ntangu beno ke mona yayi kusalama, na yina beno zaba ti ntangu me belama.” Benoni me mona, Israel ke vukana na yinsi ya yandi mosi. Kasi, beno tala, Yandi zimbanaka luzayikisu ya Kidimbu yayi ya Sambwadi.

³⁹⁹ Mpe awa, ntangu Kidimbu ya Sambwadi, ntangu Yandi zibulaka Yawu, Yandi mpe zimbanaka Yawu diaka, beno me mona. Na yina beto ke mona ti Ya kele mansweki ya muvimba, na yina ngunga me lunga ntete ve mansweki kuzabana. Na yawu, beto kele ntama yayi, mpe bayankaka ya Yawu ke zabana kaka pene ya ntangu ti Yesu ke monika dyaka na zulu ya ntoto, samu na Kento ya Yandi ya makwela, to nyonso yina ke salama na ntangu yina. Ntangu yayi, tii na ntangu yina, beto nionso kusambila, beno zinga mbote, ya kusungama, Muklisto ke zinga, ke vingila na Nkwizulu ya Yandi.

⁴⁰⁰ Mpe ntangu yayi kana bande yayi ke kubwa na diboko ya muntu mosi kisika mosi kuna, beno meka ve na kusala mutindu nyonso ya isme na zulu ya yawu. Kima kaka beno ke sala, beno ke landila kaka na kusadila Nzambi. Samu ti, kinsweki na nene yayi kele nene mingi ti Nzambi zolaka bika ve Jean kusonika Yawu. Yawu vwandaka nzasi wakanaka, kasi Yandi. . . na kuzabaka yawu, vwandaka sila beto ti Yawu ke zibuka. Kasi, na ntangu yayi, Yawu me zibuka ve.

⁴⁰¹ Mpe ntangu yayi beto ke vutula matondo na Nzambi samu na yina Yandi me lakisa beto. Mu vwandaka ya kuvwanda na kati ya kivinga na zulu kuna bilumbu nana. Mpe Nsangu yina mu me tendula na beno, mingi na kati ya beno awa ke bakula. Mpe mu silaka ti ya vwandaka na kima mosi vwandaka salama, na kimpeve, ntangu nionso, ti ya kieleka beno vwandaka kondwa yawu. Mpe tala yina yawu kele; yawu kele nsiamisa ya kieleka ya ntendulu yayi ya Masonuku yina Nzambi fidisaka.

⁴⁰² Samu ti, ntete beto kota na Yawu, mpe mu kwendaka na wesete, Mfumu talisaka munu vision kilumbu mosi, pene ya ngunga kumi, na suka mosi. Mpe mu me kwisa mpe mu me tendula yawu awa, ti mu me mona yawu; mu me zaba ve yina yawu vwandaka. Ya vwandaka kimvuka ya Bawanzio sambwadi. Beto ke bambuka moyo na yawu. Beno ke kuzwa yawu na bande, yina ba me bokila, *Wapi Ntangu Ya Kele, Tata?* Mbote, ntangu yayi, ya kele kieleka yina beno ke na kumona ntangu yayi. Bawanzio sambwadi. . . Mu vwandaka na wesete.

403 Beno ke bambuka moyo, mwa minati-nsangu ya fyoti; bawu vwandaka kwenda na esete. Minati nsangu ya zole, bayembe, mwa fyoti ya kulutila nene, bawu vwandaka kwenda na esete. Mpe kuna mu talaka . . . Ba vwandaka na munu, ntangu nyonso. Yina vwandaka Ntete mpe Kubenda ya Zole.

404 Ntangu yayi, ya Tatu katukaka na wesete, na kukwendaka na ntwala na mbangu ya nene, ya ngolo, mpe Ba bakaka munu. Yina me vutuka na este, na dinsweki ya Bidimbu Sambwadi yayi. Kaka mutindu ya me tuba na—na ndosi ya Junior Jackson, ti Mfumu me bika mu tendula samu na yandi kuna, “Na kati ya pyramide yina, ya vwandaka na Ditadi ya mpembe yina ba sonikaka ve.” Ya kele samu na yina mu zolaka kwenda na wesete, samu na kuvukana na Nsangu ya Bawanzio yayi, samu na kuvutuka awa samu na kumonisa Yawu na dibuundu. Beno bambuka moyo, mu tubaka, “Bima yina ke salama ke vwanda awa na dibuundu.” Ya kele kaka kieleka.

405 Kima yankaka, mu zola beno kutala yina kusalamaka. Mpe kana beno ke na kuwa bande, ya *Wapi Ntangu Ya Kele, Tata?*, beno ke tala ti Wanzio mosi yina vwandaka na lenda ve samu na munu. Bayankaka ya Bawu monanaka kaka na mumesanu. Kasi Wanzio yayi vwandaka Wanzio yina zabanaka ve. Yandi vwandaka ya munu yina bikanaka, na kuvukana ya bambwetete na mutindu ya pyramide.

406 Mpe, beno bambuka moyo, ya vwandaka na pyramide, kisika vwandaka Ditadi ya mpembe ya mansweki yina ba sonikaka ve na zulu. Mpe Bawanzio me nata munu na pyramide yina ya Bawu mosi, mansweki ya Nzambi me zabana kaka na Bawu. Mpe, ntangu yayi, Ba vwandaka Minati-nsangu yina kwisaka kutendula pyramide yina, to Nsangu yina ya kinsweki ya Bidimbu Sambwadi yayi yina kele na kati ya pyramide.

407 Ntangu yayi, Wanzio, vwandaka na diboko ya munu ya kikento, ya kieleka ya zolaka vwanda Wanzio ya nsuka, to ya sambwadi, kana beto ke tanga Yawu kubanda diboko ya kikento na diboko ya kibakala. Samu, Yandi vwandaka na diboko ya munu ya kikento; mu vwandaka tala na Yandi, na wesete, Yandi vwandaka kwenda na esete, ya ke vwanda na lweka ya kikento. Na yawu, ya ke vwanda Nsangu ya wanzio ya nsuka, ya mfunu mingi. Beno bambuka moyo mutindu mu tubaka ti Yandi vwandaka na ya Yandi, Yandi balulaka yintu ya Yandi na manima; mpe mapapu ya Yandi ya nene, ya meno; mpe mutindu Yandi kwisaka pene-pene ya munu. Ntangu yayi, yina kele Kidimbu ya Sambwadi yayi. Ya kele dyaka kima ya mfunu. Mpe beto kele . . . Beto zaba ve yina Yawu kele, na yina, samu ti Yawu kele ve na muswa ya kuzibuka.

408 Kasi ntangu yayi, mosi na mosi ya beno na lukutakanu me tala ti, wapi mutindu ya lukutakanu ya me vwanda! Muntu nyonso monanaka kaka ti ya vwandaka na . . . kaka na nsongi ya

kiti ya bawu. Mpe muntu nyonso ya kutelama awa, na ngunga mosi, na ngunga ya zole na manima ya midi, na kuvingilaka bielo samu na kuzibula, mpe kutelama awa na ntuala. Ya kutelama pene-pene ya bibaka; bintala me kangama, mpe nionso yina.

⁴⁰⁹ Yinki ya kele? Ya me vwanda Mpeve-Santu yina me fidisa Minati nsangu yayi, mpe Bawu me monisa Yawu na beto. Mpe na yina beno tala mutindu Yawu me wisana na Ndinga, na mutindu ya kieleka.

⁴¹⁰ Mpe na yina beno nionso kuzaba ti yayi kele Kieleka, Yandi zabisaka yawu na ntuala pene-pene ya bangonda zole ntangu yayi, to kulutila yina, ntete yawu salama. Ti, ntangu mu kwendaka na wesete, na kuzabaka Yawu ve; mu vutukaka awa na ntendulu mutindu Yandi pesaka Yawu. Ntangu yayi beno bambuka moyo, na vision, Yandi tubaka na munu kima mosi ve na vision ntangu Yandi nataka munu. Mu vwandaka na boma, mu vwandaka na boma ya kufwa, kufwa na kupasuka. Beno me mona, Ba lendaka ve kusala yawu.

⁴¹¹ Ntendulu kwisaka kaka mutindu mu vwandaka na nsatu ya Yawu, yina vwandaka na kati ya kivinga, mpe mu pesaka Yawu kaka mutindu Yandi pesaka Yawu.

⁴¹² Ntangu yayi, beno me mona, bankundi, ba-vision ke kondwaka ve. Ya kele ntangu nyonso ya kulunga. Ya kele kaka kieleka.

⁴¹³ Ntangu yayi, vision, mpe dyaka Ndinga, mpe dyaka disolo, mpe bansungi ya dibuundu, mpe nyonso, ke vukana kintwadi. Na yawu, ya kieleka mu lenda tuba, ti, na mutindu ya mbote ya lubakusu ya munu, mpe landila Ndinga ya Nzambi, mpe vision, mpe luzayikisu, ntendulu ya yawu kele **MUTINDU ME TUBA MFUMU**.

⁴¹⁴ Ntangu yayi, ti Mfumu sakumuna beno nyonso, mosi na mosi, kulutila mingi, na yina beto ke telama ntangu yayi mpe beto ke yimba nkunga yayi ya mbote ya ntama ya dibuundu. Nzambi sakumuna beno, mosi na mosi. Amen.

⁴¹⁵ [Mpangi Branham me bwela bandonga yiya yina ke landa, yina ke banda na paragraphe 374-375 ya Nsangu ya yandi ya mazono na nkokila, na kilumbu ya 24 ya Ngonda ya tatu, na mvula 1963—Mu.]

Mu... (Nzambi sakumuna beno!)... Mu zola
Yandi, (na ntima ya munu nyonso),
Samu Yandi zolaka munu ya ntete.

Nzambi sakumuna nge, Mpangi Neville...?... Bikana na kisika ya kisalu...?...



KIDIMBU YA SAMBWADI KNG63-0324E
(The Seventh Seal)

BANDANDANI YA LUZAYIKISU YA BIDIMBU SAMBWADI

Nsangu yayi ya Mpangi William Marrion Branham, kulongamaka na Kingelesi, na Lumingu na nkokila, na kilumbu ya 24 ya Ngonda ya tatu, na mvula 1963, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2023 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kisdilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org